

## **Venuwa'ata Yamumuna LUKE gi'etoladina amanadi**

Bana Luke keke Yesu yana yo'o tuwelo kalivana, kadu keke kwanamiYuda au yo'o tulidiyao kalivana adi egana lakahina miGilika. Bana yana melala ka'i Anidiyoka Siliya ana fafaliya, ada doketa yadi faisewa gi'abina. Bona Gilika gihalamane-hagihagiyena, ada yana etoladi vaita kaliva nuwanuwahuyana.

Hida Luke yana buki nagona, ada gi'etoladina be badi miGilika Yesu kahihina hinahalamanena be nuwadi ginavaina. Medema fa'ina yo'o tulidiyao kalivai-dina kahihidi tulina tulina giyakahidi, ada Yesu tomiyababi moya'aida fa'ideya gihobu'ela ma givehawala. Yana vekaliva kahihina matana matana gilukahihiyena, kadu yana hinekalikali keke yo'oyo'ogaga au kadu kaliva vevine sa'eyana sa'eyana fa'idiya gi'awatalatalainena. Kadu'e Yaubada ana hawadavadava, Alu'aluwa Mahalina yana faiwala, ve'ove'o'ola, koyokoyo kadu wakalivadiyao ma nuwanuwai-dina fa'idiya givenuwa'ata.

Tu bana Luke tauna keke Yesu yana gugai ana to'ita, tu badi to'ita agaidiya halamana gilele-hagihagiyena be Kaiwabu Yesu ana vetumagana ana nuwanuwa velemo'ena ide ginahawaveleveleda.

1-4 Yo siule Kauveya Tiyofilo. Keke gavana fa'ina tu vaita gidalubodaku be Yesu kahihina

matana matana amine o fa'iniya gada'etoladina be higa ana nuwanuwa kaliva yadi vehawala againe ahe unogalidi-ma nuwanuwai-dina au velemo'ena ma unahalamanena. Boi badi kaliva Yesu yana gugai give'inubena be ginauwena ana abalauyabu ma taudiyao matadiya hi'itana ada yana venuwa'ata hilumamalena au gaitomai-dina hihawavelevelema. Kaliva tufoidi moya'aidi hivegalena be gavadi gavadi hinafameya hilakayemu, medema kahihidi hi'etoladina, badi to'itai-dina hihawavelevelema amine. Siule Kauveya, badi hi'etoladina tu iya tauku kahihi matatabuna matana matana ana abave'inuba be gina ana abalauyabu yaku wa'idibumuhiga galele-hagihagiyena, fa'ina vaita gidalubodaku be kadu iya kahihi-nadi o fa'iniya gana'etoladina.

*Yoni yana tubuga fa'ina Gabeliyela Sakalaiya givenuwa'atana.*

<sup>5</sup> Kahihi-nadi hidede amine. Helodi Yudiya ana fafali givehimeyena ana toveya abaveyao ana tofaisewa sa'eyana gimiyami ana egana Sakalaiya. Tofaisewai-dina yadi yo'o tulina tulina ada bana Sakalaiya Abaiya yana yo'o kalivana. Meda vavinena Elisabeti abaveyao ana tofaisewa adi yo'o kwamayokuna higa bana Eloni bwanenena. <sup>6</sup> Ada adi'iseluga yadi dewa yegayegana Yaubada matane. Kaiwabu yana vehimeya yana hawata moya'aina hi'ita'itave'avina, keke tamo adi wavita. <sup>7</sup> Tu Elisabeti kakalina fa'ina natudi keke, ada adi'iseluga hivesilakai-mo'a.

<sup>8-9</sup> Himiyami tu Sakalaiya yana yo'o yadi faisewa manuwa-tafalolo hinagene ana tova

gilakayemu. Abaveyao ana tofaisewa yadi dewa amine kaliva sa'eyana sa'eyana adi egana kabala againe hi'etoladina digo gowa againe hidodo-yo tofaisewa sa'eyana matana lowolowogina tu kabala givaina. Medema tova-nadi Sakalaiya ana egana hivaina higa Kaiwabu yana manuwa-tafalolo againe gidaluku be vanedimodimo ana egana inisenisi gidakabuna. <sup>10</sup> Giluku be inisenisi gikabukabuni tu kaliva moya'aidi melaleya hivaga'auta amanadi Yaubada hihawahawadavadavana. <sup>11</sup> Au Yaubada yana tovenuwa'ata Sakalaiya againe auhe'ama gilakayemu, inisenisi ana aba'akabu i'atagine gimidi. <sup>12</sup> Ada Sakalaiya gi'ita-yo ase'asena gi'akolukoluna kadu gimatautave'ine. <sup>13</sup> Tu tovenuwa'ata gigahena gigayo, "Sakalaiya, keke unamatauta. Ya ve'o'ola Yaubada ahe ginogalina. Tu vavine Elisabeti natu kaliva ginavenatunena ada unavewagana Yoni. <sup>14</sup> Bana kwamana aimo ya abavemwamwala be ya abagakahikahi, kadu kaliva moya'aidi yana tubuga fa'ina hinavemwamwala. <sup>15</sup> Fa'ina bana'e aimo ginakaiwabu Yaubada matane. Ana hawata ma oine kadu mali gufa laulaugina keke ginayuni. Hinana hinavenatunena ana toveya Alu'aluwa Mahalina ginaluvaiye-vagahina. <sup>16</sup> Bana natu-nadi miIsileli tufoidi moya'aidi Yaubada yadi Kaiwabu againe ase'asedi ginakiviviyena. <sup>17</sup> Bana wai ginanagoni tu Kaiwabu wai ginamulina. Yana wafaiwala kadu yana wanuwanuwa tuwai-mo'ena Elaiya Yaubada bonana gi'awatalatalainena amine, meda bana ginafaisewa. Yana laumamala

againa kaliva ase'asedi natudiyao agaidiya ginakiviviyena be hinaveyao. Kadu todibutoyoga nuwadi ginakiviviyena be yadi dewa koyona hinahegeni-yo hinanuwanuwa-hagihagi. Au hidedemi Kaiwabu yana ela fa'ina kaliva ase'asedi ginakidewedewena.” Tovenuwa'ata yana gahe au hidede amine.

<sup>18</sup> Tu bana Sakalaiya tovenuwa'ata gitoliyena gigayo, “Gavaiya'amine ganahalamaneni ya gahe velemono'ena o ka'i keke? Fa'ina hima gavekaliva kadu vavineku givekwamayoku.”

<sup>19</sup> Au tovenuwa'ata gigayo, “Iya Gabeliyela. Yaubada matane gamidimidi ma Bana loseyanina gi'iveniniseku be againiya ga'ela higa hida valeya hagihagina gadalukahihiyena. <sup>20</sup> Tu unogali! Yaku gahe keke udavetumaganeni fa'ina, ago ginasebodana. Lukahihi unafaniyena unanunauwena tu gaitomai-nadi gagaheyenama tova gilubodana againe ginalakayemu-yo agoseboda ginahavaina.” Au hidedemi tovenuwa'ata gigahe.

<sup>21</sup> Tu gava melaleya kaliva Sakalaiya hibodabodana, ada yana miyafa'ila manuwatafalolo hingenefa'ina aimo nuwadi ginauna. <sup>22</sup> Hibodaboda tu gilakayemu againe gahe keke anafaiweya. Au kaliva buye hive'agahegahe higayo, “Ka'i hima manuwatafalolo againe gi'eno'ita fa'ina agona gisebodana.” Gahe keke anafaiweya fa'ina u'une gilukahihi.

<sup>23</sup> Ada ahe yana faisewa ana aituha giluyabuna, au giyewana yana manuweya. <sup>24</sup> Himiyami tu vavinena Elisabeti givehifuga ada vaikohi

faifi agaidiya keke yo'oya gidanunaudadana au gimiyami yana manuweya. <sup>25</sup> Gigahe gigayo, “Ho Kaiwabu! Wona velemona Bana Tonuwak-abubu! Boi kakaliku fa'ina yaku wawowom-umu tu tova hidevama Kaiwabu gifaiwalaveleku-yo natuku ganuhagana, fa'ina yaku wowomumu yo'o matadiya givaihegena.” Au hidedemi Elisabeti gigahe.

*Yesu yana tubuga fa'ina Gabeliyela Meli givenuwa'atana.*

<sup>26</sup> Tu Elisabeti ahe vaikohi sikisi gihegedi againe, Yaubada yana tovenuwa'ata ana egana Gabeliyela Galili ana melala sa'eyana againe gi'iveninisena, melala ana egana Nasaledi. <sup>27</sup> Ulaulatanina sa'eyana againe gi'iveninisena, kwamayoku-nadi kaliva ana egana Yosefa gisetagona. Bana Yosefa Devida bwanenena ada ulaulatanina ana egana Meli. <sup>28</sup> Tovenuwa'ata kwamayoku againe gi'ela gigayo. “Siule Meli, O Yaubada ginuwadoge-mo'e! Bana Kaiwabu a Toveluga.”

<sup>29</sup> Tu bana Meli tovenuwa'ata yana gahe fa'ina ase'asena gi'akolukoluna lakahina ada nuwana givegafo'uya'uya gigayo, “Gavadi-yo hidedemi givesiuleyeku?” <sup>30</sup> Au tovenuwa'ata gigahena gigayo, “Meli, keke unamatauta, fa'ina Yaubada yana nuwadoga againiya givetalaiyena. <sup>31</sup> Aimo unavehifuga be natu kaliva unavenatunena ada unavewagana Yesu.

<sup>32-33</sup> Bana kikaiwabuna ada hinavewagana Tomiyagetane-mo'ane Natuna. Ada Yaubada

Kaiwabu ginakivekaiwabuna be bwanenena Devida yana didiga'u'u ginavelena au Yakobu yana yo'o agaidiya ginavehimeya-vagata. E, yana abavehimeya ginaduva-vagata tova inaga inaga keke ana abalauyabu.” Au hidedemi tovenuwa'ata gigahe.

<sup>34</sup> Tu Meli gigayo, “Iya hima vineulatana keke moganeku tu gavaimi-yo ganavehifuga?”

<sup>35</sup> Au tovenuwa'ata gigayo, “Alu'aluwa Mahalina ginaluvaiye be Tomiyagetane-mo'ane yana faiwaleya o ginayava. Hidema fa'ina kwamana unavenatunena ma Mahalina ana kwamana ada hinavewagana Yaubada Natuna. <sup>36</sup> Wa'ita, o hina Elisabeti givekauve'a-mo'a tu givehifuga. E, bana kwamayoku hihawavekakalena-ma ahe yana vaikohi sikisi gihegedi. <sup>37</sup> Au mema gaitoma moyo'aidi vitadi au Yaubada ana tagalowalowa.”

<sup>38</sup> Hidedemi gigahe-yo Meli gigayo, “Yamu-muna. Iya Kaiwabu ana agetoga. Gavaimi ugaheyena medemi agaikuya gidalakayemu.”

*Meli Elisabeti againe giwakawaka.*

<sup>39-40</sup> Gimiyami tu Meli gikidewadewa be gilowoga, Yudiya ana avala'oya againe gimaduna ana melala sa'eyana againe gihobudamana be higa Elisabeti gina'itana. Sakalaiya yana manuweya giluku-yo Elisabeti gilusiuleyena. <sup>41-42</sup> Ada Elisabeti Meli yana lusiule ginogalina againe kwamana kamone gikolekole lakahina au Alu'aluwa Mahalina Elisabeti giluvaiye-mo'ena be gikova'awafatafata gigayo, “O'eni ma Yaubada

ahe ginuwakabubuye-mo'e. Ya vemwamwala mali vevine moya'aidi yadi vemwamwala gitubuhegena kadu kwamana unavenatunena-ma Yaubada yana nuwakabubu lakahina ginanuhagana. <sup>43</sup> Gavadi-yo hida nuwakabubu lakahina iya ganuhagani, higa o yaku Kaiwabu hinana u'ela agaikuya uwakawaka? <sup>44</sup> U'ita, ya lusiule ago ganogalina againe kwamana kamokuya vemwamwala gi'ayauneni-yo gikolekole lakahina. <sup>45</sup> Gavadi unanuhagana Kaiwabu gigaheyena-ma uvetumaganena fa'ina, ya vemwamwala gavatubuga!”

*Meli yana kwelidavadava.*

<sup>46</sup> Tu Meli givebutu gikwelidavadava gigayo, Ase'asekuya Kaiwabu gadavadavana,

<sup>47</sup> kadu Yaubada aku Tokibababala againe alu'aluwaku givemwamwala lakahina

<sup>48</sup> Iya ana agetoga nonogana gi'itanuwakabubuyeku.

Adamoya be aimo hinanunauwena kaliva adi hewahewa moya'aidi yaku vemwamwala gavatubuga medema hinayakayakahina.

<sup>49</sup> Fa'ina Bana Tofaiwala-mo'a abayaulowoga iya fa'ikuya gifaisewana, Bana ana egana mahamahalina.

<sup>50</sup> Gaveyao Bana hive'amohimohinena medema agaidiya yana hinekalikali, adi hewahewa adi hewahewa.

<sup>51</sup> Nimana yana faiwala ahe ginaseyemaunena. Gaveyao nuwahinagediya hiseselakalaka medema ahe ginaluyauyauledi.

<sup>52</sup> Tokikaiwabu ahe ginakihobuyedi  
be yadi didiga'u'u hinahegena,  
tu tonuwahobu ginakilakahidi.

<sup>53</sup> Nuwakabubu tulina agaidiya  
tomafulauga ahe ginave'ahiyauwadi,  
tu wakalivadiyao makagekagediyao  
ginawavidi be hinana.

<sup>54-55</sup> Tuwai-mo'ena bwanenedeyao agaidiya  
yana veluga fa'ina giwonadabadaba,  
Abelhamo ana unumamomo buye'i.  
Mena yana gahe keke havahavaina  
au yana hinekalikali againe  
nuwana ahe ginanunauyena,  
kadu yana wonadabadaba amine  
ide miIsileli ana agetogamomo  
ahe ginakive'avida ada veluga fa'ina.

Au hidedemi Meli yana kwelidavadava. <sup>56</sup> Ada  
auwe vaikohi tohiye amine Meli Elisabeti buye  
himiyami tu muliya giyewana yana melaleya.

*Yoni Tobafitaiso yana tubuga fa'ina.*

<sup>57</sup> Meli gina tu Elisabeti yana venatuna ana tova  
giyemu be kaliva givenatunena. <sup>58</sup> Tobohiyadiyao  
kadu yadi yo'o kalivadi valeyadi hinogalina higa  
Kaiwabu gihinekalikaliyedi lakahina, ada badi'e  
buye hivemwamwala.

<sup>59-60</sup> Tu kwamana ana aiyeta eita givaidi againe  
hivaga'auta be Yaubada yana iya'iyaya wowone  
hinatomogolohina. Hinuwanuwa vaita tamana  
ana egana amine hidaluwatuyena Sakalaiya ma



hinana himadugahe higayo, “Keke-mo'a! Egana kanavelena Yoni.”

<sup>61</sup> Badi higayo, “Hima gavana-yo hida egana keke tamo ami yo'o agaidiya gidawahini tu hida kwamana ginawahini?”

<sup>62</sup> Au tamana againe u'udi hilewalewana be higa hinahalamanena gava egana ginaluwatuyeni. <sup>63</sup> Au aba'etoladi give'o'ola be gi'etoladina, “Ana egana Yoni.” Ada moya'aidi hiyaulowoga. <sup>64</sup> Ada auhe'ama awana gita'ala be agona gi'afolena ada givebutu gigahegahe Yaubada gidavadavana. <sup>65</sup> Au yadi yo'o buye himiyami-ma himatautave'ine. Ada Yudiya ana avala'oya melalidi tulina tulina agaidiya gaitomai-dina moya'aidi hilakayemu-ma fa'idiya hilulukahihi. <sup>66</sup> Ada moya'aidi valeyai-nadi againe nuwadi givegafo'uya'uya higayo, “Hida kwamana aimo gavadi ginagani?” Au hidedemi higage fa'ina Kaiwabu gifaiwalavelena ma hi'itana.

*Sakalaiya yana kwelidavadava.*

<sup>67</sup> Tu Alu'aluwa Mahalina Yoni tamana Sakalaiya giluvaiyena be Yaubada yana venuwa'ata gigaheye-vagahina gigayo,

<sup>68</sup> Kaiwabu miIsileli yada Yaubada kanadavadavana fa'ina yana yo'o ahe gina'itanuwakabubuyeda, ada vita agaidiya ginatutuvehobuda.

<sup>69</sup> Ada Tokibababala fifiwalana yana tofaisewa Devida bwanenena ma ide fa'ideya gina'iveyemaunina.

<sup>70</sup> Tuwai-mo'ena falofita mahamahalidiyao  
Yaubada bonana hi'awatalatalainena  
ada yana wonadabadaba hidede amine.

<sup>71</sup> Nibaideyao agaidiya ginakibababaleda,  
kadu gaveyao moya'aidi hivenikohiyeda  
medema agaidiya ginalugolegoleda.

<sup>72-73</sup> Kadu bwanenedeyao ginahinekalikaliyedi  
ada yana veyao mahamahalina  
kadu yana wonadabadaba buye  
bwaneneda Abelahamo againe gisena,  
medema againe nuwana ginanunauyena.

<sup>74</sup> Gigahe vaita ide miIsileli  
nibaideyao nimadiya ginalugolegoleda  
be Bana againe adafaiweya kanafaisewa  
kanadavadavana keke yada wamatauta.

<sup>75</sup> Kadu yada dewa mahamahalina  
be yada nuwanuwa yegayegana  
Bana matane adafaiweya kanamiyami  
yawaida ana aituheya.

Au hidedemi Yaubada yana kibababala fa'ina  
Sakalaiya gigahe. <sup>76</sup> Kadu Sakalaiya natuna fa'ine  
gigaheye-vagahina yana gahe gi'alavekwelina gi-  
gayo,

O natuku, Tomiyagetane-mo'ane  
bonana ana to'awatalatalaina  
amine kaliva o hinavewaga.

O wai unanagona be Kaiwabu  
yana eda unakidewedewena.

<sup>77</sup> Kaiwabu yana yo'o unavenuwa'atadi  
yadi dewa koyodi hinahegedi-yo  
Kaiwabu yadi koyona ginayawelina  
be hidedemi adi kibababala hinavaina.

<sup>78</sup> Au nuwakabubu hidedemi hinanuhagana

fa'ina yada Yaubada Tohinekalikali-mo'a.  
Kauwana gilaka be gituvemahalida amine,  
ada Tokibababala nuwada ginakivemahalina.

<sup>79</sup> Kadu badi uyuyuya be alika liline  
himimiyami-ma ginakivemahalidi,  
ada aseniwalova ana eda againe  
moya'aida ginasiviviyeda.

Au hidedemi Sakalaiya natuna yana faisewa  
fa'ina gigaheye-vagahina. <sup>80</sup> Ada bana kwa-  
mana gilakalakata tu yana nuwanuwa againe  
gi'ase'asevatu, ada babigaga againe gimiyami gi-  
nunauwena tu yana iveyemu ana tova miIsileli  
yadi yo'o matadiya.

## 2

*Yesu gitubuga.*

*Madiu 1:18-25*

<sup>1</sup> Tu Yoni kabi'one miLoma badi miYuda  
yadi fafaliya hivehivehimeya. Medema tovai-  
nadi Loma Tokaiwabu ana egana Sisa-Ogosito  
gimiyami. Bana givehimeya be fafali tulina  
tulina kalivadi adi egana hida'etoladi be higa  
yana yo'o adi kilagalaga ginahalamanena.

<sup>2</sup> Mena eganayaudi-nadi yaudi nagona ada bana  
Kwiliniyo Siliya ana fafali againe givehivehimeya  
ana toveya gilakayemu. <sup>3</sup> Au moya'aidi  
eganayaudi fa'ina sa'eyana sa'eyana taudiyao  
yadi melaleya hina.

<sup>4</sup> Tu kadu Yosefa Galili melalina ana egana  
Nasaledi againe gitauya Devida yana melala

---

**1:80:** Sam 106:10 Aba 17:7, 22:16-17 Md 3:3, 11:10, Ais 40:3

**1:80:** Ais 60:1-2, 9:2, Md 4:16, Yo 8:12 Md 3:1-6

Yudiya againe gihobudamana, melala ana egana Bedelihema, fa'ina bana Devida bwanenena yana yo'o kalivana. <sup>5</sup> Bedelihema againe Meli buye hina eganayaudi fa'ina. Tu bana kwamayoku gisetago-mo'ena aimo keke buye hidamiyami tu givehifuga. <sup>6</sup> Yuwadedei himiyami tu yana venatuna ana tova a giyemu. <sup>7</sup> Au yana tomo'ainagona givenatunena, kaleko vaita fai amine medema againe hifafana au yomuyomu adi kwame againe hive'enobalina fa'ina wakawaka-manuwa gimaga-mo'a be yadi abaga keke.

*Lobama ana tovenuwa'ata to'itave'avina sifi hiyemaunidi.*

<sup>8</sup> Tu Bedelihema awa'awanine to'itave'avina sifi yadi sifi ubuleya himiyamiyatago-malalagedi. <sup>9</sup> Himiyami tu Yaubada yana tovenuwa'ata sa'eyana giyemaunidi ada Kaiwabu yana mahalina ve'akinamanamalina gituvemahali-'owodi yo himatautave'ine. <sup>10</sup> Tu tovenuwa'ata gigahedi gigayo, “Keke wanamatauta, au wanogali! Valeya haghagina agaimiya ga'aliyena be valeyai-nadi againe omi mi'sileli ami yo'o vemwamwala lakahina wanunuhagana. <sup>11</sup> Adamo'uya-mo'a Devida yana melala againe Tokibababala omi fa'imiya gitubuga, Bana'e Yaubada yana Tovegida Keliso Kaiwabu. <sup>12</sup> Yaku gahe au vele-mo'ena ma ana iya'iyaya hidede amine. Fwefweya kaleko vaita fai amine againe hifafana-ma wanunuhagana,

fwefweyai-nadi yomuyomu adi kwame againe gidadauda.”

<sup>13-14</sup> Gigahe-yo auhe'ama lobama ana tolugaviya adi yo'o lakahi-mo'ena bana tovenuwa'ata buye himiyami, Yaubada hidavadavana higayo, “Yaubada getane-mo'ane kanakivekaiwabuna, gava babiya kaliva gaveyao Yaubada yana nuwakabubu hinuhagana, medema agaidiya kukuya ginayemu.”

<sup>15</sup> Au hidede amine lobama ana tovenuwa'ata Yaubada hikwelidavadavani tu hinuyabuyabudi be lobameya hiywadi. Hina-yo to'itave'avina sifi buye hive'agahegahe higayo, “Wa'ela be kanana Bedelihema againe kanahobu gaitoma ahe gilakayemu be Yaubada ide agaideya gigaheyena-ma kana'itana.”

<sup>16</sup> Au himaduna be hilele Meli Yosefa hinuhagadi kadu fwefweya buye'i, Bana yomuyomu adi kwame againe gidauda. <sup>17-18</sup> Ada ahe hi'ita-yo au kwamana kahihina gavaimi tovenuwa'ata givenuwa'atadi medemi hi'awatalatalaina, ada gaveyao moya'aidi to'itave'avina sifi yadi gahe hinogalina, medema hiyaulowoga. <sup>19</sup> Tu mena gaitomai-dina agaidiya Meli nuwadi ginunauyena be tova moya'aina hinuwanuwadadana. <sup>20</sup> Badi to'itave'avina sifi ma hiywadi Yaubada ana egana hikikilakahina, gaitoma moya'aidi ahe hinogalidi be hi'itadi fa'idiya hidavadavana. Yadi ita meda tovenuwa'ata yana gahe amine.

*Yesu hiluwatuyena be manuwa-tafalolo againe hinauwena.*

21 Tu kwamana ana aiyeta eita givaidi-yo Yaubada yana iyaliyaya wowone hinatomogolohina ana toveya hivewagana Yesu, eganai-nadi aimo hinana keke hidavehifuga tu lobama ana tovenuwa'ata giyakahina.

22-24 Tu tova giyemu be yadi yegayega fa'ina tafalolo sa'eyana hinafaisewana Mosese yana buki-vehimeya againe Yaubada givehimeyedi amine. Kadu Yaubada yana vehimeya sa'eyana tuwai-mo'ena Mosese gi'etoladina-ma amine hihuluva. Vehimeyai-nadi ma kaliva tomo'ainagona sa'eyana sa'eyana wanasevehiledi be Yaubada yana giba fa'ina. Au Yosefa be Meli kwamana Yelusalema againe hinauwena be Yaubada matane hinasena. Kadu abaveyao yadi yegayega fa'ina hinauwena, Yaubada buki-vehimeya againe gisena-ma amine, higa bunebune luhei o ka'i bututula kabi'odiyao luhei.

25 Tu kaliva sa'eyana Yelusalema againe gimiyami ana egana Simiyoni. Bana kaliva yegayegana Yaubada gimatamatausena kadu Yaubada yana Tovegida miIsileli ginakibababaledi-ma yana yemu fa'ina gilulauboda. Ada Alu'aluwa Mahalina bana againe gimiyami. 26 Ada boi Alu'aluwa Mahalina bana againe gihawavemogatala higa vaita keke ginamadu'alika tu nagona Yaubada yana Tovegida Keliso gina'itana. Gina'itani-yo gina'alika. 27-28 Au kwamana hi'aliyena-ma tovai-nadi Alu'aluwa Mahalina Simiyoni gigahena be manuwa-tafalolo againe giluku. Yosefa Meli kwamana Yesu hi'aliyena be hinahuluvina buki-

vehimeya gigahе amine ma Simiyoni kwamana gifewana be Yaubada gidavadavana. <sup>29</sup> Yana kwelidavadava hidede amine.

Kaiwabu-yo, adamoya iya ya tofaisewa yaku wanuwayamumu unavega'auleku.

<sup>30</sup> Fa'ina Tokibababala O uvegidenama tauku matakuya ahe ga'itana.

<sup>31</sup> Kibababalai-nadi ana eda ukidewedewena yo'o tulina tulina matadiya

<sup>32</sup> Bana'e yo'o tulidiyao yadi mahalina, kadu Bana fa'ine ya yo'o miIsileli kaiwabu lakahina ananuhagana.

Au hidedemi Simiyoni yana kwelidavadava.

<sup>33</sup> Tu kwamana tamana hinana Simiyoni yana gahe Yesu fa'ine hiyaulowogena. <sup>34-35</sup> Au Simiyoni give'o'oledi be Yaubada ginanuwakabubuyedi tu hinana Meli gigahedi gigayo, “Wa'ita, hida kwamana Yaubada givegidena be miIsileli tufoidi moya'aidi hinavenikohiyena-ma adi agolaufofola hinanuhagana tu tufoidi moya'aidi Bana againe hinahawahegedi-ma adi kibababala hinanuhagana. Kadu Yaubada Bana ginasena iya'iyaya fa'ina, higa kaliva tufoidi moya'aidi hinahawavekoyoyeni-yo yadi nuwahinage kabu'avane ginayemu. Ada kadu omi ase'asemi gina'u'aulolo vaita giyo gida'onani.”

*Bana Ana Yesu fa'ine gi'awatalatalaina.*

<sup>36-37</sup> Kadu'e kwamayoku sa'eyana gimiyami ana egana Ana, Fanuweli natuna Aseli yana yo'o kwamayokuna, ada bana Yaubada bonana

---

**2:34-35:** 1Veh 12:1-4, Yem 13:2,12,15, 1Veh 12:8 Ais 52:10

**2:34-35:** Ais 49:6, Yo 8:12 Ais 8:14, 1Ko 1:23, 1Fi 2:6-8

ana to'awatalatalaina. Ulaulatanine ginagi ada malamala seveni moganena buye himiyami tu gisikwa-yo anakaibe gimiyami ma ana malamala eiti-fowa (84) givaidi. Ada au givekauve'a-mo'a. Tu tova moya'aina gitafatafalolo manuwa-tafalolo keke ma'i gidahegehegeni, uyadayada be bogi Yaubada gihawadavadavana gilabelabewaviyo tu give'ove'o'ola. <sup>38</sup> Ada Meli Yosefa manuwa-tafalolo againe kwamana Yaubada matane hisena ma bai-nadi againe Ana giyemu, lilidiya gimidi be Yaubada givesiuleyena, kadu miYelusalema agaidiya kwamana fa'ine gigahegahe gigayo, "Hida kwamana ada Tokibababala, Bana'e fa'ine kalulauboda amanadi."

<sup>39</sup> Tu Yosefa Meli gavadi moya'aina gilubodadi be hidafaisewani Yaubada yana vehimeya gigahe amine, medema hiluyabuni-yo Galili ana fafaliya hiyewadi be taudiyao yadi melala Nasaledi againe hilakayemu. <sup>40</sup> Ada kwamana gilakalakata tu nuwane gififaiwala kadu nuwana gi'ayauyauga-mo'a. E, Yaubada yana nuwadogeya gimiyami.

*Kwamana Yesu tovehawala buye manuwa-tafalolo*

*againa hive'agahegahe.*

<sup>41</sup> Tu malamala sa'eyana sa'eyana hinana be tamana Yelusalema againe hinauna tafalolo ana egana lobama ana tovenuwa'ata yana Abamaduviviya ana tova againe. <sup>42</sup> Bana Yesu ana malamala tuwelo givaidi againe badi buye hina tafalolo againe yadi dewa amine. <sup>43</sup> Ada tafalolo



ahe gihavaini-yo hinana tamana hiyewadi tu kwamana Yesu Yelusalema againe gimiya, keke hidahalamaneni. <sup>44</sup> Tu badi hivaitana yo'o hinagediya buye hidanauna fa'ina, aiyeta sa'eyana hinauna tu tobohiyadiyao kadu yadi yo'o agaidiya hivebutu hilelena. <sup>45</sup> Ada hi'l'avani-yo hiyewadi Yelusalema againe hilelena. <sup>46</sup> Hilelele tu aiyeta anaveto againe manuwa- tafalolo hinagene hinuhagana, tovehawala hinafadiya givetogani tu badi givanevanenegedi kadu gitotoliluveluvedu. <sup>47</sup> Au moya'aidi yana nuwahuya yana bonalaufata hinogalini-yo ase'asedi gi'alilihiwana. <sup>48</sup> Tu hinana tamana hi'itana againe hiyaulowoga. Badi hinana higahena higayo, “Natuku, gavadi-yo hidedemi uhuluvima? Tama be ima'e yama wanuwavita o alelele.”

<sup>49</sup> Bana gigahedi gigayo, “Gavadi-yo waleleleku? Vaita omi wadahalamaneni gilubodaku be Kamaku yana manuweya gadamiyami.” <sup>50</sup> Tu yana gahe hilukayokayoyena.

<sup>51</sup> Au Bana badi buye hina Nasaledi againe hiyewadi, ada buye himiyami tu bonadi gi'abi'abina. Badi hinana ma gaitomai-dina moya'aina agaidiya nuwadi ginunauyena. <sup>52</sup> Tu Yesu yana wanuwahuya gilakata ada Bana againe Yaubada be kaliva nuwadi giyamumu.

### 3

*Yoni tobafitaiso yana laumamala.  
Madiu 3:1-10 Maki 1:1-6 Yoni 1:19-23*

1-2 Loma Tokaiwabu ana egana Sisa-Taibiliyo malamala fiftini givehivhimeya tu Yaubada bonana Yoni Sakalaiya natuna againe gilakayemu, bana babigaga againe gimiyami-tu. Medema tovai-nadi Fonitiyo-Failato Yudiya ana fafali givehivhimeyena, bana Helodi Galili ana fafali givehivhimeyena ada tobohiyana Filifi Ituliya be Tilakonaidi adi fafali givehivhimeyedi, kadu bana Laisaniya Abilene ana fafali givehivhimeyena. Au hidedemi tovehimeya adi loi, tu tovai-nadi againe Anasi be Kaiyafasi abaveyao ana tofaisewa adi tokaiwabu.

<sup>3</sup> Au Yaubada Yoni againe gigahe-yo Yoni gufa ana egana Yolidani awa'awanina moya'aina agaidiya ginunudadana tu gilulumamala gigayo, “Yami dewa koyona wanavenikohiyena be wanabafitaiso. Wananuwavilana be Yaubada yami koyona ginayawelina.” <sup>4</sup> Boi tuwai-mo'ena Yaubada bonana ana to'awatalatalaina ana egana Aiseya yana buki againe gi'etoladina amine, meda Yoni gihuluva. Aiseya gigayo,

Kaliva agona hinogalina wala'aiya gikovakovadadana

gigayo, Kaiwabu yana eda wanavetauna yana eda ase'asemiya wanakidewedewena.

<sup>5</sup> Nu'awa'awahagana wanavetauna, oya lakahidi kabi'odi wanayalamoidi, eda nupalabaladi wanakivetuvetunudi, kadu eda dabodabodi wanalu'ukeukedi.

<sup>6</sup> Wana'ihagihagi be kaliva moya'aidi Yaubada yana kibababala hina'itana. Au hidedemi Aiseya yana gahe.

<sup>7</sup> Tu Yoni kaliva moya'aidi bana againe hiyo'oyo'o be ginakivebafitaisoyedi-ma agaidiya gigahe gigayo, “Omi vaita oloto koyona ana egana vaiba natuneyao amine. Hakwadi givenuwa'atami-yo, vaita Yaubada yana ila'a omi agaimiya wada'oseni? Keke amifaiweya Yaubada wana'oseni. <sup>8</sup> Omi wagahe vaita yami koyona wadahegeni-yo wadahaagavilami. Au dewa yamumuna wanafaisewani-yo yami hagavila au velema'ena ma anahalamanena. Kadu keke wanavebutu taumiyao agaimiya wanagahe wanagayo, Ide Abelahamo bwaneneneyao fa'ina kadu ide Yaubada natuneyao. Au gagahemi Yaubada anafaiweya ginakilowemi tu hida kabala agaidiya kaliva ginabubudi be Abelahamo ana yo'oya ginasedi. <sup>9</sup> Kadu'e adamoya tamuyoko ahe hiyadalina be ai hinalu'inubadi, ada ai sa'eyana sa'eyana guwadi keke yamumuna ma hinataladi be ai'ala'alata againe hinahegedi. Ai-dina amine omi'iyao.”

<sup>10</sup> Au hidedemi Yoni gigahegahe tu yo'oyo'o higahena higayo, “Au gavadi anagani?”

<sup>11</sup> Bana gigayo, “Hai kaliva ana aikeva luhei, medema gilubodana be kaliva ana aikeva keke ma gidavelena. Meda anafaiweya a'a gidafolakena.”

<sup>12</sup> Kadu takesi ana toyaudi hi'ela be hinabafitaiso ada higahena higayo, “Tovehawala, ime gavadi anagani?”

<sup>13</sup> Yoni gigahedi gigayo, “Takesi ana manigaga wanayaudi, keke taumiyao fa'imiya wanavai-kawowoni.”

<sup>14</sup> Tu kadu tolugaviya tufoidi hitoliluluveluvena higayo, “Kadu ime gavadi anagani?” Bana gi-

gayo. “Keke kaliva yadi lokoloko wanalemadi kadu keke kaliva wanakiholiholidi. Fatami fa'ina wanavenuwakibokibo.” Au hidedemi Yoni giga-hedi.

*Yoni Tobafitaiso Yesu inubana fa'ina givenuwa'ata.*

*Madiu 3:11-12 Maki 1:7-8 Yoni 1:24-34*

<sup>15</sup> Tu kaliva moya'aidi Yaubada yana Tovegida Keliso yana yemu fa'ina hilulauboda, ada hivebutu Yoni fa'ine nuwahinagediya hinuwanuwa vaita ka'i bana Keliso-mo'ena o ka'i keke. <sup>16</sup> Yoni yadi nuwahinage gibonalaufata gigayo, “Iya'eku ma gufa againe gakivebafitaisoyemi tu kaliva sa'eyana gifaiwalahegeku-ma gi'ela'ela. Bana kikaiwabu-mo'ena tu iya kwamana kabisoku fa'ina keke akufaiweya Bana againe ganave'agetoga-yo ana ageyafayafa adi aba'aiyauga ganayauni. Bana'e ma Alu'aluwa Mahalina againe tufoimi ginakivebafitaisoyemi be ginavemagami, tu tufoimi ai'ala'alata againe ginakivebafitaisoyemi mema higa vaita ginavematahiwadiyemi. <sup>17</sup> E, aimo gina'ela ada yana abasaibutu ana gi'e lakahina gina'abina be witi ana abavagakolukolu againe ginasibutuna. A'a-mo'ena yana kweda againe gina'ive'ave'ahina tu yogona ai gi'alata-vagata ma againe ginaluve'alahina.” <sup>18</sup> Au hidedemi Yoni gilumamaledi kadu enohega tulina tulina amine Yaubada yana Venuwa'ata Yamumuna fa'ina gil'u'ageyedi.

<sup>19</sup> Tu Yoni tovehimeya Helodi gidakeyena. Bana Helodi tobohiyana vavinena adi egana Helodiyasi giluhabuyedi fa'ina gidakeyena, kadu yana dewa koyona moya'aina fa'ina gidakedakeyena. <sup>20</sup> Helodi koyona moya'aina gifaisewadi tu koyona sa'eyana buye give'atutamo'aina higa Yoni deliya gisena.

*Yoni Yesu gikivebafitaisoyena.*

*Madiu 3:13-17 Maki 1:9-11*

<sup>21-22</sup> Tu Yoni aimo keke deliya gidaluku tu kaliva moya'aidi gikikivebafitaisoyedi ana toveya, kadu Yesu gikivebafitaisoyena. Yesu gibafitaiso gihavaina give'ove'o'ola tu lobama gi'ayavalina be Alu'aluwa Mahalina ana ita vaita bunebune amine Bana againe gihobu'ela. Au ago'ago lobameya gikova gigayo, “O'eni Natu'ase'aseku. Nuwaku ukiveyamumu-mo'ena.” Au hidedemi Yaubada gigahe.

*Yesu bwanenenyao fa'idiya.*

*Madiu 1:1-17*

<sup>23</sup> Tu Yesu tauna ma ana malamala teti givaidiyo yana faisewa givebutuna. Kaliva hivaitana Yesu tamana Yosefa tu Yosefa tamana Heli,

<sup>24</sup> Heli tamana Matata, Matata tamana Livai, Livai tamana Meliki, Meliki tamana Yanai, Yanai tamana Yosefa, <sup>25</sup> Yosefa tamana Matatiya,

Matatiya tamana Emosi, Emosi tamana Nahumi,

Nahumi tamana Esilai, Esilai tamana Nagai,

<sup>26</sup> Nagai tamana Madi, Madi tamana Matatiya,  
Matatiya tamana Semeini, Semeini tamana  
Yoseki,  
Yoseki tamana Yoda, <sup>27</sup> Yoda tamana Yowanani,  
Yowanani tamana Lesa, Lesa tamana Seluba-  
bela,  
Selubabela tamana Saladiyeli, Saladiyeli  
tamana Neli,  
<sup>28</sup> Neli tamana Meliki, Meliki tamana Adi,  
Adi tamana Kosami, Kosami tamana  
Elimadamu,  
Elimadamu tamana Eli, <sup>29</sup> Eli tamana Yosuwa,  
Yosuwa tamana Eliyesa, Eliyesa tamana Yolima,  
Yolima tamana Matata, Matata tamana Livai,  
<sup>30</sup> Livai tamana Simiyoni, Simiyoni tamana  
Yuda,  
Yuda tamana Yosefa, Yosefa tamana Yonama,  
Yonama tamana Elayakimu, <sup>31</sup> Elayakimu  
tamana Meleya,  
Meleya tamana Mena, Mena tamana Matata,  
Matata tamana Nadani, Nadani tamana Devida,  
<sup>32</sup> Devida tamana Yese, Yese tamana Obedi,  
Obedi tamana Bowasi, Bowasi tamana Salam-  
oni,  
Salamoni tamana Nasoni, <sup>33</sup> Nasoni tamana  
Aminadabu,  
Aminadabu tamana Adimina, Adimina tamana  
Ani,  
Ani tamana Hesiloni, Hesiloni tamana Felesi,  
Felesi tamana Yuda, <sup>34</sup> Yuda tamana Yakobu,  
Yakobu tamana Aisake, Aisake tamana Abela-  
hamo,  
Abelhamo tamana Tela, Tela tamana Naho,  
<sup>35</sup> Naho tamana Seluke, Seluke tamana Leu,  
Leu tamana Feleke, Feleke tamana Iba,

Iba tamana Sila, <sup>36</sup> Sila tamana Kenani,  
 Kenani tamana Afakesedi, Afakesedi tamana  
 Semi,  
 Semi tamana Nowa, Nowa tamana Lemeki,  
<sup>37</sup> Lemeki tamana Metusela, Metusela tamana  
 Inoki,  
 Inoki tamana Yaledi, Yaledi tamana Mahalalila,  
 Mahalalila tamana Kenani, <sup>38</sup> Kenani tamana  
 Inosi,  
 Inosi tamana Seti, Seti tamana Adama,  
 Adama tamana Yaubada.

## 4

*Setani Yesu gi'aladibidibiyena.*

*Madiu 4:1-11 Maki 1:12-13*

<sup>1-2</sup> Tu Yesu Yolidani againe gibafitaiso gihavaina, Alu'aluwa Mahalina ahe giluvaiyemo'eni yo givehimeyena be babigaga againe gina aiyeta foti agaidiya gimiyamiyanana tu Setani gi'ala'aladibidibiyena. Ada aiyetai-dina agaidiya keke tamo a'a gida'u'ani fa'ina mafu gilauna.

<sup>3</sup> Au Setani gi'ela gigahena gigayo, “Ka'i velemo'ena O'eni Yaubada Natuna, hida kabala unavehimeyena be ginave'a'a.”

<sup>4</sup> Tu Yesu gigayo, “Yaubada bonana eto'etoladina gigahe gigayo, Keke a'a-mo'a gagana againe kaliva yawaimi wanavivaini.”

<sup>5-6</sup> Kadu'e Setani gi'ela Yesu oyeya gilakavena, babi ana abavehimeya tulina tulina givehawalena ada auhe'ama Yesu gi'ita'auhi'owodi kadu gigahena gigayo, “Hida abavehimeya moya'aina adi kikaiwabu buye O ganavele. Abavehimeyai-dina adi wakikaiwabu iya

nimakuya hdadauda, ada hakwadi nuwanuwaku ganavelena, au ganavelena. <sup>7</sup> Ka'i O'eni agaikuya unadavadava, abavehimeyai-dina matatabudi ganavele.”

<sup>8</sup> Yesu gibonalaufata gigayo, “Yaubada bonana eto'etoladina gigahe gigayo, Yaubada yami Kaiwabu againe wana'odu'odu, Bana anakaibe wanahawadavadavana.”

<sup>9-11</sup> Kadu'e Setani gi'ela Yelusalema againe ginauwena be manuwatafalolo ana udu'uduya gilakavena gigahena gigayo, “Ka'i O'eni velemo'ena Yaubada Natuna, au hidedei tu babiya una'auhifu, fa'ina Yaubada bonana eto'etoladina gigahe gigayo, Iya Yaubada yaku tovenuwa'ata ganavehimeyedi be hina'itave'avi, ada nimadiya o hinakamohi be age keke kuga ginatalani.” Au hidedemi Yaubada yana gahe sa'eyana Setani giyakahina.

<sup>12</sup> Yesu gibonalaufata gigayo, “Yaubada bonana eto'etoladina hidedemi gigahe gigayo, Ka'i o tauni vita againe unavetalaiye digo, keke Yaubada ya Kaiwabu yana leme ana ve'o'ola againe unagalualuvani.” Au hidedemi Yesu gigahe.

<sup>13</sup> Ada au Setani aladibidibi tulina tulina agaidiya Yesu gicaluvaluvana gihavaina, ginuyabuyabuna be kadu aimo mali aituheya.

*Yesu yana faisewa givebutuna.*

*Madiu 4:12-17,23-24 Maki 1:14-15,39*



14 Tu Alu'aluwa Mahalina yana faiwala Yesu againe gimiyami tu Galili ana fafaliya kadu giyewana, ada medema awa'awanina moya'aina agaidiya ana valeya give'aliyahega. 15 Yadi manuwabavehawala adi egana sinagogi agaidiya givehavehawala, ada moya'aidi hidavadavana.

*MiNasaledi Yesu hikilowena.*

*Madiu 13:53-58 Maki 6:1-6*

16 Tu Nasaledi againe Yesu giyemu, medema melalai-nadi againe gilakata. Ada sabati againe manuwabavehawala againe giluku yana dewa amine. Au gitowamidi be Yaubada bonana ginahawana. 17 Ada kaliva sa'eyana buki tuwai-mo'ena Aiseya gi'etoladina-ma givelena. Yesu buki givaina digo giluyagilina ada yana maita ginuhagana be gihawana-ma hidedemi gigahe.

18 Kaiwabu Alu'aluwana agaikuya gimimiyami, givegideku be koyokoyo agaidiya valeya yamumuna ganalumamalena. Hida venuwa'ata fa'ina gi'iveniniseku, yogoyogonidiyao adi aiyauga hinavaina tomatakoyo hina'ita-havagi.

Kadu gi'iveniniseku be tonuwavita nuwadi ganakiveyamumuna.

19 Givegideku be kaliva ganavenuwatadi Yaubada yana nuwadoga ana tova a giyemu. Au hidedemi Aiseya yana gahe Yesu gihawana.

20 Tu Yesu gihawa gihavaina, buki gi'uwana digo toleme giveleyeweni tu gihiyoto. Ada moya'aidi manuwabavehawala againe himiyami-ma hi'itakwanekwanena. 21 Au Yesu givebutu gigahedi gigayo, "Adamoya mena

Yaubada yana gahe wanogalina-ma gilakayemu velemo'ena.”

<sup>22</sup> Ada kaliva moya'aidi hihawaveyamumuyena ada gahe nuwa'abi'abina amine gilukahihi fa'ina nuwadi givegafo'uya'uya higayo, “Bana hidevama Yosefa natuna tu yana gahe ana nogala vaita kaliva sa'eyana.”

<sup>23</sup> Yesu gigahedi gigayo, “Gavaita yada gahegahe sa'eyana agaikuya wanayakahina. Hidedemi wanagayo, O doketa fa'ina tauni unasiveyawa. Kafeneumi againe aituha fifiwalana ufaisewana be valeyana anogalina amine, meda hidei tauni ya melala againe unafaisewana.

<sup>24</sup> Au hidedemi omi wanagaheku tu iya gagahemi velemo'ena, ka'i falofita Yaubada bonana tauna yana yo'o agaidiya gina'awatalatalainena, keke hinavenogaleni. Meda omi yaku yo'o wanahuluviku. <sup>25-26</sup> Wanogali! Omi wahalamanena tuwai-mo'ena Elaiya yana toveya keke ma'ita wehi gidalugaga ginunauwena malamala tohiye kadu hafuna, ada melala moya'aina agaidiya loka lakahina gilakayemu. Medema tovai-nadi sikwa moya'aidi Isileli ana fafaliya himiyami tu Elaiya yana yo'o miIsileli hikilowena fa'ina, Yaubada keke badi yadi sikwa agaidiya Elaiya gida'iveniniseni be ginavelugadi. Au vinemiSalefadi sikwasikwadi adikaibe agaidiya gi'iveninisenena. Badi yadi melala keke Isileli ana fafaliya, au Saidoni ana fafaliya. <sup>27</sup> Meda anafaiweya tuwai-mo'ena Yaubada bonana ana to'awatalatalaina ana egana Elaisa yana toveya, tovedawodawowo moya'aidi Isileli ana fafaliya himiyami tu keke tamo badi

agaidiya gidasiveyawani, au Neyamani anakaibe gisiveyawana ada bana keke kwanamiIsileli au kwanamiSiliya.” Au hidedemi Yesu miNasaledi gigahedi.

<sup>28</sup> Tu kaliva moya'aidi manuwa-abavehawala againe himiyami tu Yesu yana gahe miIsileli keke yadi wavetumagana ma fa'idiya hinogalini-yo hinuwakoyove'ine. <sup>29</sup> Au hitowamidi Yesu hiwavina be melala gihegena. Yadi melala oya fafaline hive'alahina fa'ina kabune hinauwena higa sefa againe hidatuwavelowona. <sup>30</sup> Tu Yesu yo'oyo'o hinafadiya ginu-mo'a be gina.

*Yesu kaliva wayafunena gikiveyamumuna.*

*Maki 1:21-28*

<sup>31</sup> Yesu gina tu Kafeneumi Galili ana fafali againe gihobu'ela, ada sabati againe givebutu kaliva givehawaledi. <sup>32</sup> Ada yo'o yana vehawala fa'ina hiyaulowoga, fa'ina yana gahe ase'ase'i'onagina vaita tovehimeya velemo'ena amine.

<sup>33-34</sup> Tu mena manuwa-abavehawala againe kaliva sa'eyana wayafunena gimiyami. Yafune koyona giluvaiyeni-yo gikova'awafatafata gigayo, “Ha! Yesu kwanaNasaledi gavadi ime agaimeya unagani-yo u'ela? Ka'i O u'ela be ime yafune ama loi unamunuma-yo anabwavi? O ya inuba gahalamanena. O'eni Yaubada yana Kaliva Mahamahalina.”

<sup>35</sup> Yesu yafune gihawatana gigayo, “Gi'alove. Una kaliva unuyabuyabuni.” Yesu gigahe-yo

yafune yo'o hinafadiya kaliva gibaina be ginuyabuyabuna tu kaliva keke tamo vita gidanuhagani.

<sup>36</sup> Kaliva moya'aidi hi'ita-yo hiyaulowogamo'a buye hive'agahegahe higayo, “Hima hida gava gahe yo yana wafaiwala kadu yana wa'abavehimeya yafune givhimeyedi be kaliva hinunuyabuyabudi?” <sup>37</sup> Ada Yesu valeyana melala moya'aina Kafeneumi awa'awanine give'aliyahega.

*Yesu to'aulolo moya'aidi gisiveyawadi.*

*Madiu 8:14-17 Maki 1:29-34*

<sup>38</sup> Tu Yesu gimidi manawa-abavehawala againe gihobu tu Saimoni yana manuweya giluku. Tu Saimoni lawana hi'aulolo lakahina wowodi vaita ai, ada badi fa'idiya Yesu hive'o'olena be ginavelugadi. <sup>39</sup> Au Yesu gina gi'odutagodi au wowodi ana lukalalava gihawatana be gituluna. Ada auhe'ama himidi be hivebutu adi wakawaka adiga hikidewedewena.

<sup>40</sup> Kauwana giholuholu tu gaveyao moya'aidi agaidiya to'aulolo yadi aulolo tulina tulina himiyami, medema Yesu againe hi'aliyedi ada nimana badi agaidiya gisena be moya'aidi gisiveyawa-'owodi. <sup>41</sup> Kadu yafune kaliva tufoidi moya'aidi hiluvaiyedi-ma hinulovelovedi hikova higayo, “O'eni Yaubada Natuna.” Tu Yesu gihawatadi be keke hinagahe, fa'ina Bana Yaubada yana Tovegida ma hihalamanena.

*Yesu Yudiya melalidi agaidiya gilulumamala.*

*Maki 1:35-39*

<sup>42-43</sup> Hida mala gilauna Yesu gilowoga be gina melalagaga againe be anakai be ginamiyami fa'ina. Tu yo'o hivemulitawaina be Bana againe hi'ela vaita hinasiveyewana tu gigahedi gigayo, “Gilubodaku be Yaubada yana abavehimeya ana Venuwa'ata Yamumuna kadu mali melala agaidiya gadalumamalena. Hidema ana inuba fa'ina Yaubada givegideku be gahobu'ela.” <sup>44</sup> Ada au manuwa-abavehawala ana egana sinagogi Yudiya melalidi agaidiya gilulumamala.

## 5

*Yesu tobayauma gikovadi be hinamuliyena.*

*Madiu 4:18-22 Maki 1:16-20*

<sup>1</sup> Tova sa'eyana Yesu tobu ana taliyeya gimidi gilulumamala tu yo'oyo'o hiveve'atuwahega be Bana liline hinayemu Yaubada bonana hinanogalina. Mena tobu ma ana egana Genesaleda yo Galili. <sup>2</sup> Ada waka luhei avaleya hibilakahidi-ma gi'itadi. Tobayauma ahe hihobu yadi alevatu hi'ikolakola. <sup>3</sup> Au waka sa'eyana Saimoni yana waka medema againe giyage, ada give'o'olena be ma'i ginatalalaka. Au wakeya gihiyoto yo'o givehawaledi.

<sup>4</sup> Givehawaledi gihavaina Saimoni againe gigahe gigayo, “Ni'uya wanatalalaka be yami alevatu wanasehobuyena igana wanave'onadi.”

<sup>5</sup> Tu Saimoni gigayo, “Kauveya, bogi againe anaudadana-wayoga mala gilauna keke tamo igana adave'onadi. Tu O ya vehimeya againe kadu alevatu ganasehobuyena.”

<sup>6</sup> Saimoni tobohiyana buye alevatu hidase-hobuyena ma igana keke sa'eyadi hiyo'oyo'o ada moya'ai-mo'edi hive'onadi, iganeya yadi alevatu hivekaninina. <sup>7</sup> Au tobohiyadiyao waka velugana againe hiluwahiyedi be hina'ela hinavelugadi. Hi'ela tu waka luhei iganeya hivemagadi ada yadi waka kabisona hidaboluna.

<sup>8</sup> Tu Saimoni-Fita gi'itana againe tugana give'etodonena Yesu againe gi'ibo'ula gigayo, “Ho Kaiwabu, yaku dewa koyona fa'ina unanuyabuyabuku.” <sup>9</sup> Hidedemi gigahe fa'ina igana moya'ai-mo'edi hive'onadi againe ase'asena gi'alilihiwana kadu tobohiyaneyao buye'i. <sup>10</sup> Meda anafaiweya Yemesa Yoni, Sebedi natuneyao, ase'asedi gi'alilihiwana Saimoni ahenao buye bayaumeya hififaisewa amanadi. Tu Yesu Saimoni gigahena gigayo, “Keke unamatauta. Tova adamoya be tova gi'ela'ela againe keke igana tu kaliva unave'onadi be hinamuliyeku.” <sup>11</sup> Ada yadi waka avaleya hibilakahidi au gaitoma moya'aidi hidibutoyogedi be Yesu againe hivetomuliya.

*Yesu tovedawodawowo gikiveyamumuna.*

*Madiu 8:1-4 Maki 1:40-45*

<sup>12</sup> Tova sa'eyana Yesu melala sa'eyana againe gimiyami tu tovedawodawowo-mo'a Bana againe gi'ela. Kaliva Yesu gi'ita-yo gi'ibo'ula-mo'a be gihawayafeyafena gigayo, “Kauveya, ka'i O nuwanuwa amine o afaiweya yaku aulolo unakolana.”

<sup>13</sup> Gigahe-yo Yesu nimana gitunena be gikibwa'ena ada gigahena gigayo, “Ika, Iya

nuwanuwaku. Unayamumu.” Ada auhe'ama ana dawodawowo gihavaina.

<sup>14</sup> Au Yesu givehimeyena higa keke tamo hakwadi againe ginahawavemogatala. Gigayo, “Abaveyao ana tofaisewa againe unamaduna be wowo unavehawalena. Boi tuwai-mo'ena Mosese givehimeya amine, manuga luhei kadu sifi higa abaveyao fa'ina unanauwedi be moya'aidi hina'ita-yo o ahe uyamumu velemo'ena ma hinahalamanena.”

<sup>15</sup> Tu Yesu valeyana give'aliyahega-mo'a ada yo'oyo'o hivagavaga'auta be bonana hinanogalina kadu yadi aulolo againe hinabwaina. <sup>16</sup> Atu Yesu yo'o ginunuyabuyabudi be ginauna melalagaga agaidiya give'ove'o'ola.

*Yesu tovefela gisiveyawana.*

*Madiu 9:1-8 Maki 2:1-12*

<sup>17</sup> Tova sa'eyana Yesu givehavehawala tu badi tonagona tafatafalolodiyao adi egana Falisi kadu Mosese yana vehimeya ana tovehawala Bana liline hihiyoto, badi Galili be Yudiya melalidi moya'aina agaidiya kadu Yelusalema againe hitauya be hi'ela amanadi. Ada Yaubada yana faiwala kaliva adi siveyawa fa'ina Yesu againe gimiyami. <sup>18</sup> Mededei kaliva sa'eyana walogina gi'a'uwana-ma gimiyami. Ada kaliva tufoidi bana kaliva ana iviya gidauda-ma hiwahina be higa hinalukuwena Yesu matane. <sup>19</sup> Tu yo'o lakahina fa'ina hilukuwe-wayoge keke adifaiweya. Au manuwa getane hilakavena be manuwa getana

hikakina, ada tofefela wa'ivina kaliva hinafadiya hisehobuyena Yesu matane.

<sup>20</sup> Yesu kaliva ana to'aliya yadi vetumagana gi'ita-yo tofefela gigahena gigayo, “Kusebo, ya koyona ahe gayawelidi.”

<sup>21</sup> Tu vehimeya ana tovehawala be Falisi hivebutu nuwahinagediya higahegahe higayo, “Ha! Hida kaliva gigahe vaita Bana koyona adi to'aiyawela. Bana vaita hakwadi-yo Yaubada gihawatagoni, fa'ina Yaubada anakaibe koyona adi to'aiyawela?”

<sup>22</sup> Hidede amine nuwahinagediya hitolilivaluva tu Yesu yadi nuwanuwa gi'ayauneni-yo gigahedi gigayo, “Gavadi-yo ase'asemiya watolilivaluva? <sup>23</sup> Gavaimi tofefela againe ganagahe-yo ginalakayemu? Ka'i ganagayo, Ya koyona ahe gayawelidi, o ka'i ganagayo, Umidi be unaudadana. Hadema vehimeya vita-mo'ena? Me kaliva ana siveyawa vaita vita-mo'ena, fa'ina ka'i ganavehimeya tu keke ginayamumu, au taumiyao amifaiweya wana'itahalamanena kaliva adi siveyawa keke akufaiweya. <sup>24</sup> Tu hida kaliva ganasiveyawana be wana'itani-yo Iya fa'ikuya wanagahe wanagayo, Velemodi. Bana Tohobu'ela kaliva yadi koyona adi aiyawela ana tagalowalowa.” Ada au tofefela againe gigahe gigayo, “Againiya gagahe. Umidi, a ivi uwahi be una ya manuweya.”

<sup>25</sup> Auhe'ama tofefela moya'aidi matadiya gimidi, ivi gidudauvena-ma gi'uwana ada giwahina be gina yana manuweya. Ginauna tu Yaubada ana egana gikikilakahina. <sup>26</sup> Au



moya'aidi hi'ita-yo ase'asedi gi'alilihiwana be Yaubada ana egana hikilakahina kadu himatautave'ine higayo, “Keke kanawona! Adamoya iya'iyaya ka'itayauyogena.”

*Yesu Livai gikovana be Bana againe ginaveto-muliya.*

*Madiu 9:9-13 Maki 2:13-17*

<sup>27</sup> Muliya Yesu gilowoga ginauna tu takesi ana toyaudi sa'eyana gi'itana, ana egana Livai. Bana takesi ana abayaudi againe gihiyoto. Ada giga-hena gigayo, “Unamuliyeku.” <sup>28</sup> Au gitowamidi gaitoma moya'aidi gidibutoyogedi tu Yesu againe givetomuliya.

<sup>29</sup> Tu muliya bana Livai yana manuweya avemwamwala lakahina Yesu fa'ine gisena, ada takesi ana toyaudi adi yo'o lakahina kadu mali kaliva badi buye hi'enolukekela be hi'au'a.

<sup>30</sup> Tu Falisi be vehimeya ana tovehawala badi Falisi ahenao ma Yesu ana tomuliya agaidiya hi'alawoluwolu higayo, “Gavai'ona-yo wama takesi ana toyaudi be tokoyona velugadiyao buye wa'a'au'a?”

<sup>31</sup> Ada Yesu yadi gahe ginogalini-yo gigahedi gigayo, “Badi yadi aulolo keke ma keke doketa againe hinana, tu to'aulolo ma nuwanuwadi doketa yana leme. <sup>32</sup> Ada toyamumu keke doketa yana leme hinaleleni amine, meda anafaiweya Iya gahobu'ela be keke toyamumu vehimeya hi'ita'itave'avina-ma ganakovadi. Au gahobu'ela tokoyona ganakovadi be yaku leme againe hina-hagaviladi fa'ina.”

*Labewaviyo fa'ina Yesu hitoliluveluvena.*

*Madiu 9:14-15 Maki 2:18-20*

<sup>33</sup> Tu Falisi Yesu higahena higayo, “Tova moya'aina Yoni ana tomuliya hilabelabewaviyo tu hive'ove'o'ola kadu meda ime Falisi ama tomuliya hihuluhuluva, tu a tomuliya ma tova moya'aina a'a hi'au'a bwai hiyuyu.”

<sup>34</sup> Yesu gigayo, “Tonagi aimo ana yo'o buye hinamiyami ana toveya, keke amifaiweya ana yo'o kalivadi wanavehimeyedi vaita nagi ana avemwamwala againe hinamiya-kawowo be a'a keke hina'ani. <sup>35</sup> Tu aimo tonagi hinanauwena lauveya ana toveya, au medema tovai-nadi ana yo'o hinamiya-kawowo, a'a keke hina'ani. Meda anafaiweya Iya yaku kaliva buye amimiyami fa'ina keke hidalabelabewaviyo.” Au hidedemi Yesu gigahedi.

*Dewa tuwaina kadu dewa ivaguna keke gidalubodada be*

*kanave'atutamo'aini.*

*Madiu 9:16-17 Maki 2:21-22*

<sup>36</sup> Kadu'e Yesu gahetalahobuhobu sa'eyana badi agaidiya gilukahihiyena gigayo, “Ka'i kaliva nuwanuwana aikeva gikoyo-ma ginabwadina digo, keke kaleko ivaguna againe kasimina ginasikaninini bwadi fa'ina. Ka'i hidede amine gidahuluva, au kaleko ivaguna gisikaninina-ma gidakivekoyona, kadu bwadi kaleko ivaguna keke aikeva tuwaina gidalubodani fa'ina ana ita tulina. <sup>37</sup> Kadu keke tamo hakwadi oine ivaguna manugose kwafilidi tuwaina againe ginahiwani. Ka'i hidede amine gidahiwana digo, oine ivaguna gidatubuga be kwafilidi tuwaina ahe

gikwakwana-ma gida'afolena ada au oine babiya gidamadu-'owoga kadu kwafilidi gidakoyo. <sup>38</sup> Au gilubodana be oine ivaguna kwafilidi ivaguna agaidiya hidahiwana. <sup>39</sup> Kadu keke tamo hakwadi oine tuwaina hinayuni-yo muliya nuwanuwana oine ivaguna ginayuni. Au ginagahe ginagayo, Oine tuwaina anayu haghagi-mo'ena.” Au hidedemi Yesu kaliva yadi dewa tuwaina nuwadi gi'abina-ma gigahetalahobuhobuyedi.

## 6

*Sabati ana vehimeya fa'ina.*

*Madiu 12:1-8 Maki 2:23-28*

<sup>1</sup> Tu sabati sa'eyana againe Yesu ana tomuliya buye witi ana faheya hinunudadana tu ana tomuliya hivebutu witi nafona hikikikolukolu be himutumutuvemavemauna tu hi'au'a. <sup>2</sup> Tu badi tonagona tafatafalolodiyao adi egana Falisi hi'itadi-yo higayo, “Gavadiyo sabati ana vehimeya keke wada'itave'avini?”

<sup>3-4</sup> Yesu gigahedi gigayo, “Ada tokaiwabu Devida tuwai-mo'ena gimiyami-ma kahihina ma'i wahawahawana o ka'i keke? Tova sa'eyana bana'e tobohiyaneyao buye mafu gilaudi tu Yaubada yana manuweya giluku a'a Yaubada matane hisena-ma givaina tu hawahawatana nonogana gi'ana kadu yana kalivamomo giveledi be hi'ana. Mena a'ai-nadi moya'aidi fa'idiya hawahawatana tu abaveyao ana tofaisewagaga adifaiweya hina'ana.” <sup>5</sup> Au hidedemi gigahedi kadu gigayo, “Iya Tohobu'ela sabati ana

to'itave'avina. Kaliva yadi dewa sabati againe Iya gavehivehimeyena.”

*Yesu kaliva nimana koyona sabati againe gikiveyamumuna.*

*Madiu 12:9-14 Maki 3:1-6*

<sup>6</sup> Kadu sabati sa'eyana againe manuwa-abavehawala againe giluku be givehavehawala, ada kaliva sa'eyana gimiyami nimana i'atagina gifwalele-vagata. <sup>7</sup> Tu Mosese yana vehimeya ana tovehawala kadu badi Falisi nuwanuwadi gaitoma sa'eyana hinanuhagani-yo Yesu hinahawavekoyoyena fa'ina, hi'ita'ita-kwanekwanena be hina'itana ka'i nimakoyo sabati againe ginakiveyamumuna o ka'i keke. <sup>8</sup> Tu Yesu yadi nuwanuwa gihalamaneni-yo au nimakoyo againe gigahe gigayo, “Umidi be u'ela we'ai.” Au gitowamidi be gina Yesu liline.

<sup>9</sup> Ada Yesu gigahedi gigayo, “Ganatoliluluvuva agaimiya. Yada buki-vehimeya sabati fa'ina gavaimi givehimeyeda? Ka'i kaliva sabati againe kanakiveyamumuna o ka'i kanakivekoyona? Ka'i kanalugolegolena o ka'i kanaluve'alikana?”

<sup>10</sup> Ada moya'aidi gilumataviledi tu nimakoyo againe gigahe gigayo, “Nima utune.” Au ni-mana gitunena ada auhe'ama giyamumu. <sup>11</sup> Tu vehimeya ana tovehawala be Falisi hinuwakoyove'ine, hivebutu hive'agahegahe vaita gavaimi hinaga-yo Yesu hinaluve'alikani.

*Yesu ana tomuliya tuwelo givenuwadadanedi.*

*Madiu 10:1-4 Maki 3:13-19*

<sup>12</sup> Himiyami tu Yesu gina gilaka oyeya be ginave'o'ola, ada Yaubada againe give'o'olamalalau. <sup>13</sup> Mala gilauna ana tomuliyamomo gikovadi be hi'ela ada kaliva tuwelo agaidiya givenuwadadana be givewagadi afositolo higa bonana ana towahidadana. <sup>14-16</sup> Adi egana hidede amine. Saimoni tu Yesu givewagana Fita, taina Anidulu, Yemesa be Yoni, Filifi, Batolomiu, Madiu, Tomasi, Yemesa Alifiyo natuna, Saimoni bana hivewagana yo'o miLoma hivenibainedi-ma kalivana, Yudasi Yemesa natuna kadu Yudasi-Isikaliyota bana Yesu nibaineyao nimadiya gihawavemogatalena amanadi.

*Yesu kaliva moya'aidi givelugadi.*

*Madiu 4:23-25*

<sup>17</sup> Tu Yesu ana yo'o tuwelo givenuwadadanedi gihavaina, buye hihobu babi lulube'une himidi. Medede againe ana tomuliyamomo adi yo'o lakahina hivaga'auta kadu yo'oyo'o mali kaliva badi buye himiyami, Yelusalema be Yudiya melalidi moya'aina agaidiya hitauya kadu Taiya be Saidoni adi fafaliya taliyeya hitauya amanadi. Badi hi'ela be Yesu bonana hinanogalina kadu yadi aulolo againe ginasiveyawadi. <sup>18</sup> Badi wayafunediyo fa'ina vita hinuhagana-ma kalivai-dina Yesu gikiveyamumudi. <sup>19</sup> Ada moya'aidi higaluvaluva vaita hinakibwa'ena, fa'ina yadi kaibwa'e againe faiwala Yesu againe giyemu be medema againe adi siveyawa hivaina.

*Tufoidi yadi wavemwamwala tufoidi yadi watagiya.*

*Madiu 5:1-12*

<sup>20</sup> Tu Yesu ana tomuliya gi'itadadanidi gigahedi gigayo,

“Omi gaveyao venuwahobu ana koyokoyo, yami vemwamwala gavatubuga!

Gavadi-yo? Aimo Yaubada yana itave'avina againe wamimiyami, ase'asemiya givehivehimeya.

<sup>21</sup> Omi gaveyao adamoya mafu gilaulaumi, yami vemwamwala gavatubuga!

Gavadi-yo? Aimo Yaubada ginave'ahiyauwami.

Omi gaveyao adamoya watagitagi, yami vemwamwala gavatubuga!

Gavadi-yo? Aimo wanavelavelaiga.

<sup>22</sup> Omi gaveyao kaliva hitalahagiyemi hivenikohiyemi hi'ihawadamanemi kadu Iya Tohobu'ela yaku kaliva fa'ina hihawavekoyoyemi yami vemwamwala gavatubuga!

<sup>23</sup> E, hidedemi hinahuluvimi ana toveya wanavemwamwala wanagakahikahi, fa'ina ami laufata lakahina aimo lobameya gidadauda. Wa'ita, omi hihuluvimi amine, meda bwanenediyao Yaubada bonana ana to'awatalatalaina hihuluvidi.

<sup>24</sup> Tu hoiyoi omi gaveyao adamoya wakalivamiyao!

Gavadi-yo? Yami abavemwamwala ahe babiya wanuhagana.

<sup>25</sup> Hoiyoi omi gaveyao adamoya wa'ahiyauwa!

Gavadi-yo? Aimo mafu ginalaulaumi.

Hoiyoi omi yami waselakalaka wavelavelaiga!

Gavadi-yo? Aimo wana'ase'u'aulolo kadu  
wanatagitagi.

26 Hoiyoi omi kaliva moya'aidi  
hinahawaveyamumuyemi-ma kalivai-  
mina!

Wa'ita, bwanenediyao falofita fwayafwayadiyao  
hihawaveyamumuyedi, ada badi hihulu-  
vidi amine meda omi hihuluvimi.

*Yesu tokivekoyo adi nuwakabubu fa'ina  
gilukahihi.*

*Madiu 5:38-42*

27 Tu omi moya'aimi wavanevanenegeku-  
ma agaimiya gagahe. Badi hitalahagiyemi-ma  
wananuwakabuyedi. Badi hivenikohiyemi-ma  
agaidiya wana'igibagiba yamumuna. 28 Badi  
hi'alatabutabuyemi-ma fa'idiya wanave'o'ola  
be higa Yaubada ginanuwakabubuyedi. Badi  
hikivekoyomi-ma fa'idiya wanave'o'ola. 29 Ka'i  
tamo hakwadi navanavami ginatafina au fafalina  
wanahawahegena be ginatafina. Kadu ka'i tamo  
hakwadi ami aikeva vewabana ginalemami, au  
ami seti keke wananuwaloloni. 30 Gaveyao  
moya'aidi tamo gavadi fa'ina hinave'o'olemi, au  
wanaveledi. Ka'i tamo hakwadi yami lokoloko  
ginavaina, au keke yaudiyewa fa'ina bana againe  
wanagahe. 31 Gavaiya'amine nuwanuwami  
kaliva omi hinahuluvimi, au medede amine kadu  
badi wanahuluvidi.

*Hakwadi keke agaimiya gida'igibagiba,*

*medema wananuwakabubuyena.*

*Madiu 5:43-48*

<sup>32</sup> Ka'i tonuwakabubugaga wananuwak-abubuyedi tu keke tonuwalolona wananuwak-abubuyedi, medema huluvai-nadi fa'ina Yaubada keke ginahawaveyamumuyemi. Wa'ita, tokoyona badi hinuwakabubuyedi-ma kadu agaidiya hinuwakabubu. <sup>33</sup> Kadu ka'i kaliva tufoidi agaimiya hina'igibagiba hagihagina ada badi'iyagaga agaidiya meda omi wana'igibagiba hagihagina, au medema huluvai-nadi fa'ina Yaubada keke ginahawaveyamumuyemi. Wa'ita, tokoyona to'igibagiba yamumuna agaidiya meda hi'igibagiba yamumuna. <sup>34</sup> Kadu ka'i yami mani o lokoloko badi kaliva adifaiweya hinaveleyewemi-ma wanaveledi tu badi keke adifaiweya hinaveleyewemi-ma agaidiya wananuwalolonena, au medema huluvai-nadi fa'ina Bana Yaubada keke ginahawaveyamumuyemi. Wa'ita, tokoyona mali tokoyona agaidiya hifolafolaka be higa aimo yadi folaka ana kiveyewa hinanuhagana.

<sup>35</sup> Tu omi keke badi amine wanahuluva. Nibaimiyao wananuwakabubuyedi, agaidiya wana'igibagiba yamumuna kadu wanafo-lafolaka tu yami folaka ana kiveyewa keke wananuwenuweni. Ka'i hidedemi wanahuluva, au aimo ami laufata lakahina wananuhagana kadu ami ita vaita Tomiyagetane-mo'ane natuneyao amine. Fa'ina Bana'e badi tonuwalolona kadu badi yana nuwakabubu keke hidavesiuleyeni-ma ginuwakabubuyedi.

<sup>36</sup> Tamami lobameya gihinekalikaliyemi amine,



meda omi kaliva wanahinekalikaliyedi.” Au hidedemi Yesu gigahe.

*Omi keke tovehimeya amine yo kaliva yadi dewa*

*wanalagani.*

*Madiu 7:1-5*

<sup>37</sup> Kadu gigayo, “Keke tovehimeya amine yo mali kaliva yadi dewa wanalagani be Yaubada kadu omi keke ginalagami. Keke mali kaliva wanahawavekoyoyedi be Yaubada kadu omi keke ginahawavekoyoyemi. Mali kaliva yadi koyona wanavenuwauluyena be Yaubada kadu yami koyona ginavenuwauluyena. <sup>38</sup> Wanafolafolaka be Yaubada kadu agaimiya ginafolafolaka. Yana folaka hidede amine. Kaliva nau'a againe a'a ginadodona gina'atudonedonena kadu ana tufo ginadodo-havagilena tu gina'ahiwahiwana au yami vainuwana againe ginabihiwana amine, meda Yaubada yana folaka lakahi-mo'ena agaimiya. Ka'i omi lakahina amine wanafolaka, au Yaubada lakahina amine agaimiya ginafolaka. Ka'i kabi'ona amine, kadu kabi'ona.” Au hidedemi Yesu gigahe.

<sup>39</sup> Kadu Yesu hidedemi gigahetala-hobuhobuyedi gigayo, “Gavaimi be tomatakoyo tomatakoyohiyana edeya ginanagoyeni? Keke adifaiweya fa'ina adi'iselu awalolo againe hinabe'u. <sup>40</sup> Tosikulu keke yana tovehawala yana nuwahuya gidatubuhegeni, tu tosikulu hinasikulu-'owoga yo yadi halamana yadi tovehawala yana halamana amine.

<sup>41</sup> Gavadi-yo ai ulana vaita koyona kabi'ona amine tobohiya matane u'ita'itani tu ai-mo'ena vaita koyona lakahina amine tauni mataniya keke udanuwenuwani? <sup>42</sup> Ka'i ai-mo'ena o mataniya gidadauda-ma keke uda'ita'itani, au keke-mo'a afaiweya tobohiya unagaheni unagayo, Tobohiyaku, ai ulana mata againe ganavaihegena. O meya luhei. Nagona ai-mo'ena tauni mataniya unavaihegena, higa ya dewa koyo-mo'ena unahegena, ada au afaiweya una'ita-hagihagiyena be ai ulana tobohiya matane unavaihegena, higa yana dewa koyona fa'ina unakivetuvetununa.

*Yesu kaliva yadi dewa ai guwana againe giluvefosena.*

*Madiu 7:15-20*

<sup>43</sup> Wa'ita, keke tamo ai yamumuna guwana koyona gidaveguweni. Meda anafaiweya ai koyona keke guwana yamumuna gidaveguweni. <sup>44</sup> Ai sa'eyana sa'eyana guwadi againe kahalama-nena. Fa'ina fiki keke ai-kawowo againe kadakoluni, kadu kelefiki keke aboda againe kadakoluni. <sup>45</sup> Meda kaliva yamumuna ase'asena yamumuna fa'ina dewa yamumuna amine gihuluhuluva, kadu kaliva koyona ase'asena koyona fa'ina dewa koyona amine gihuluhuluva. Gava nuwanuwa kaliva ase'asena givemagana au medede amine gigahegahe.

*Manuwa ana to'aiyogona adi'iselu kahihidi.*

*Madiu 7:24-27*

<sup>46</sup> Gavadi-yo aku egana wayakayakahini wagagayo, Kaiwabu, Kaiwabu, tu keke bonaku wada'abi'abini? <sup>47</sup> Gaveyao agaikuya hi'ela'ela bonaku hinoganogalina be hi'abi'abina, medema manuwa ana to'aiyogona againe ganaluvefosena. <sup>48</sup> Bana'e ma anafaiweya kaliva manuwa giyogona. Nagona babi giyalana tunugina ogola givehobuna be kuga againe gibakina. Muliya gufa gihobu vaita manuwa gida'alugeni tu kaliva giyogo-hagihagiyena fa'ina gidauda yamumuna. <sup>49</sup> Atu gaveyao bonaku hinoganogalina tu keke hida'abi'abini, medema kaliva yana manuwa makameya giyogona, keke ogola gida'aiyala. Tu muliya gufa gihobu againe manuwa auhe'ama gimadube'u ada au gi'ayaweli-'owona.” Au hid- edemi Yesu gi gahe.

## 7

*Yesu Loma togiyomatana ana agetoga gisiveyawana.*

*Madiu 8:5-13*

<sup>1</sup> Tu Yesu yana vehawala moya'aina yo'o matadiya gilukahihiyena gihavaina, gina Kafeneumi againe. <sup>2</sup> Medede againe Loma togiyomatana sa'eyana gimiyami, ada ana agetoga gi'aulolo lakahina, kabisona gida'alika. Ada togiyomatana nuwanuwana lakahina agetogai-nadi. <sup>3</sup> Ada Yesu valeyana ginogalini-yo miYuda adi tonagona tufoidi Bana againe gi'iveninisedi be hinayowanina, togiyomatana ana agetoga ginasiveyawana fa'ina.

4-5 Yesu againe hiyemu-yo hive'o'oladona higayo, “Hida togiyomatana kaliva hagihagina. Gilubodana be yana ve'o'ola udavenogalena, fa'ina nuwanuwana yada yo'o kadu tauna yana maniya yama manuwa-abavehawala Kafeneumi againe gikivemididina.”

6-7 Au Yesu badi buye hina. Hinauna tu manuwa hi'ivedaveda'ufona au togiyomatana tobohiyaneyao gi'iveninisedi be bonana Yesu againe hinayakahina vaita tauna gidagayo, “Kauveya, keke Tauni una'ivewowologilogi, fa'ina iya keke kaliva yamumuku yo yaku manuweya afaiweya unaluku. Medema fa'ina keke tauku gadakilakahiku-yo againiya gada'ela. Au mededei unamiya tu unavehimeya be O bonaniga aku agetoga ginasiveyawana. <sup>8</sup> Hidede amine afaiweya unavehimeya ma a gahalamanena, fa'ina iya kadu abavehimeya gavaina. Yaku tonagona yana vehimeya dibune gamimiyami, kadu yaku tolugaviyamomo yaku vehimeya dibune himimiyami. Yaku tolugaviya sa'eyana gavehimeyena gagayo, Una, ada au gitowamidi be gina. Kadu velugana gagahena gagayo, U'ela we'ai, ada au gi'ela. Kadu aku agetoga againe gagahe gagayo, Hidedemi unafaisewa, ada au yaku vehimeya amine gifaisewa.”

<sup>9</sup> Ada Yesu togiyomatana bonana ginogalini-yo bana fa'ine giyaulowoga au gihagavilana yo'oyo'o himuliyena-ma agaidiya gigahe gigayo, “Biyao! Wona velemona keke-mo'a tamo kwanaIsileli yana wavetumagana gadanuhagani

hida kwanaLoma yana vetumagana amine.”  
 10 Ada au kaliva togiyomatana gi'iveninisedi-  
 ma hiyewadi manuweya hiluku-yo agetoga ahe  
 gibwaina-ma hinuhagana.

*Yesu sikwa natudi alikeya gisivemididina.*

11 Tu Yesu gimiyami tu gina melala ana egana  
 Neini againe. Ana tomuliya kadu yo'o lakahina  
 hivebwa'uliyena. 12 Melala tufone giyemuyemu  
 tu to'alika hiwahiwhinawena be hinahuyana.  
 Bana to'alika sikwa natudi kwanatubu'eya ada  
 yo'o lakahina sikwa hivebwa'uliyedi. 13 Ada  
 Kaiwabu gi'itadi-yo gihinekalikaliyedi gigahedi  
 gigayo, “Keke wanatagiya.” 14 Au gina vaya  
 gikibwa'ena ada towahi himididi-vagata. Yesu  
 to'alika gigahena gigayo, “Kwamana, umidi!”

15 Gigahe-yo to'alika gimidi givebutu  
 gigahegahe, ada Yesu kwamana hinana  
 giveleyewedi. 16 Au moya'aidi himatautave'ine  
 be Yaubada ana egana hikilakahina higayo,  
 “Yaubada bonana ana to'awatalatalaina lakahina  
 agaideya gilakayemu.” Kadu higayo, “Yaubada  
 gi'ela be ide yana yo'o gina'itanuwakabubuyeda.”  
 17 Ada au valeyai-nadi Yudiya melalina moya'aina  
 kadu awa'awanina moya'aina gina giluyabuna.

*Yesu Yoni Tobafitaiso yana tolilualuva gifata-  
 tana.*

*Madiu 11:1-5*

18 Tu mena Yesu yana gugai moya'aina fa'ina  
 Yoni ana tomuliya hivenuwa'atana, bana Yoni  
 aimo deliya gimiyami-tu. 19 Au Yoni ana to-  
 muliya adi'iselu giyowanidi be Kaiwabu againe

gi'iveninisedi higa hinatoliluluveluvena hinagayo, “Yaubada yana Tovegida gina'ela-ma ime abod-abodana. Ka'i O'eni bana kalivai-nina o ka'i kaliva sa'eyana aimo anabodana?”

<sup>20</sup> Ada badi kaliva adi'iselu ahe Yesu againe hiyemu-yo higahena higayo, “Yoni Tobafitaiso againiya gi'iveninisema ada nuwanuwana ginahalamanena ka'i O'eni Yaubada yana Tovegida aimo gina'ela-ma kalivai-nina o ka'i kaliva sa'eyana aimo anabodana.”

<sup>21</sup> Ada medema tovai-nadi Yesu kaliva moya'aidi yadi aulolo tulina tulina agaidiya gisiveyawadi. Badi wayafunediyo gikiveyamumudi kadu tomatakoyo tufoidi moya'aidi matadi gikiveyamumuna. <sup>22</sup> Au Yesu Yoni yana kaliva gigahedi gigayo, “Wanana ada gavaimi wanogalina kadu wa'itana-ma Yoni wanavenuwa'atana, higa tomatakoyo matadi gimahalina, tofefela hinunudadana, tovedawodawowo yadi aulolo gihavaina, totagakweu tagadi gi'afolena, to'alika himididihavagi, kadu koyokoyo Venuwa'ata Yamumuna Yaubada yana kibababala fa'ina hi'ela'ela hinoganogalina. <sup>23</sup> Kadu Yoni yana tolilualuva inubaku fa'ina ma wanagahena hai kaliva Iya fa'ikuya keke gidanuwaluga medema yana vemwamwala gavatubuga!” Au hidedemi Yesu gigahedi.

*Yesu Yoni Tobafitaiso fa'ina gilukahihi.  
Madiu 11:7-19*

<sup>24</sup> Badi Yoni ana tovenuwa'ata ahe hina tu Yesu yo'oyo'o agaidiya givebutu Yoni fa'ine gilukahihi gigayo, “Boi omi'iyao Yoni wa'itana yamina babigaga againe ana toveya, wanuwanuwa ma vaita gavadi wada'itani? Isisi'u bolimana againe gilewalewa amine, ka'i wana vaita kaliva kowakowana wada'itani? <sup>25</sup> Keke hidede amine wada'itani tu wana be ka'i gavadi wana'itani? Ka'i kaliva ana wavaigau vaita wada'itani? Keke, fa'ina kaliva adi vaigau kikaiwabuna kadu yadi walokoloko himimiyami-ma tokikaiwabu yadi manawa lakahina againe himimiyami.

<sup>26</sup> Au wanagaheku, omi wana ka'i gavadi wana'itani? Ka'i wawaitana Yaubada bonana ana to'awatalatalaina wana'itani? E, wona velemona to'awatalatalaina wa'itana tu bana Yoni ma to'awatalatalaina moya'aidi gikaiwabuhegedi.

<sup>27</sup> Tuwai-mo'ena bana Yoni fa'ine Yaubada bonana eto'etoladina gigahe higa vaita Yaubada yana Tovegida againe gidagahe gidagayo,

U'ita! Yaku tovenuwa'ata gana'iveninisena  
be bana wai ginanagona,

ya eda kaliva ase'asediya ginakidewedewena.

<sup>28</sup> Gagahemi bana Yoni kaliva moya'aidi babiya hitubuyemu-ma gikaiwabuhegedi, tu gava kaliva ana egana kabisona Yaubada yana yo'ogaga agaidiya tu givetumagane-mo'eku, medema Yoni ana egana ginakaiwabuhegena.” Au hidedemi Yesu gigahe.

<sup>29</sup> Tu kaliva moya'aidi kadu takesi ana toyaudi Yesu yana gahe hinogalina againe, higahe higayo, “Wona velemona Yaubada yana eda tunutunugina.” Hidedemi higahe fa'ina boi hihawahegedi

be Yoni gikivebafitaisoyedi. <sup>30</sup> Tu tonagona tafatafalolodiyao adi egana Falisi be Mosese yana vehimeya ana tovehawala Yoni yana bafitaiso hidibutoyogena, ada medema againe Yaubada yana inuba badi fa'idiya hikilowena.

<sup>31</sup> Kadu Yesu gigayo, “Tu omi kaliva hida tovainadi babiya watubuyemu-ma gavadi amine yo ganahawaluvelvemi? Yami huluva gava dewa againe ganaluvefoseni? <sup>32</sup> Au omi we'owe'o amidiya, melaleya hihiyoto tu hivetavetaunega. Yo'o sa'eyana yo'o velugadi agaidiya hikovakova higayo,

Modawa akalikalina tu omi keke wadavagavaga wadayeluyelu.

Alulaukuhi vaita alika ana tova amine tu omi keke wadatagitagiya.

Gavaimi anaga-yo nuwami anakiveyamumuni?

<sup>33</sup> Meda anafaiweya Yoni gi'ela ada keke a'a yamumuna gida'u'ani kadu keke oine gidayuyuni, ada au omi wahawavekoyoyena vaita bana wayafunena. <sup>34</sup> Tu Iya Tohobu'ela ga'ela ada a'a yamumuna ga'au'ana oine gayuyuna, ada au kadu Iya wahawavekoyoyeku wagayo, Wa'ita, Bana hima to'a-fa'ila oine ana toyu-fa'ila, kadu takesi ana toyaudi kadu tokoyona velugadiyao givevetobohiyantedi. Hidedemi wagahe tu gavaimi anahuluva-yo nuwami anakiveyamumuni? <sup>35</sup> Tu Yoni kadu Iya'eku ama'iselu Yaubada yana nuwahuya againe ka'i velemono'ena affaisewa ma yama faisewa guwana



againa wanahalamanena.” Au hidedemi Yesu yo'lo agaidiya gigahe.

*Yesu kwamayoku udo'udona yana koyona giyawelina.*

<sup>36</sup> Tova sa'eyana tonagona tafatafalolodiyao adi egana Falisi kalivana Yesu giyowanina be buye hina'a. Yesu giyemu-yo giluku Falisi yana manuweya gi'enolukekela be gina'a.

<sup>37</sup> Mena melala againa kwamayoku sa'eyadi himiyami yadi dewa udo'udona. Yesu Falisi yana manuweya gi'au'a-ma valeyana hinogali-yo bunama hiwahina be hi'ela, bunamai-nadi aba'aihiwaga kugakugana againa gidauda, kuga ana egana alabasita. <sup>38</sup> Au kwamayoku Yesu wakwaune hi'ela Bana agene himidi hitagitagi tu hivebutu matailudi againa agena hivebutana, ada u'udi tunugina againa hiluvehavehayana. Kadu yadi wave'amohimohina agena hiveyaugina bunama againa hibunamina.

<sup>39</sup> Tu bana Falisi Yesu giyowanina-ma gilitadi-yo nuwahnagene gigahe gigayo, “Ka'i hida kaliva Yaubada bonana ana to'awatalatalaina velemona digo, gava kwamayoku hikibwa'eni ma gidahalamanena higa kwamayoku koyodi.”

<sup>40</sup> Ada Yesu Falisi yana nuwahnage gihalamaneni-yo gigahena gigayo, “Saimoni, yaku nuwanuwa sa'eyana againiya ganagahayena.” Bana gigayo, “Tovehawala, au ugahe.”

<sup>41</sup> Yesu givebutu gigahetalahobuhobuyena gigayo, “Wakalivana sa'eyana kaliva luhei agaidiya mani givetalaiyena be aimo

hinaveleyewena. Kaliva sa'eyana K5000 amine gibuki, kadu sa'eyana K500 gibuki. <sup>42</sup> Keke adifaiweya adi buki hinafatani againe, au adi'iselu adi buki giyawelina. Au unagaheku, kaliva adi'iselu adi tonuwakabubu againe hinuwanuwa tu hadema kaliva yana nuwanuwa lakahi-mo'ena?"

<sup>43</sup> Saimoni gigayo, "Iya gavaita bana ana buki lakahi-mo'ena tu giyawelina-ma kalivai-nadi bana againe ginuwanuwa lakahi-mo'ena." Yesu gigayo, "Ika, ugahe velemo'ena."

<sup>44</sup> Gigahe-yo kwamayoku agaidiya gihagavilani tu Saimoni againe gigahe gigayo, "Hida kwamayoku ahe u'itadi. Ya manuweya galuku gawakawaka tu yada dewa wakawaka amine keke udahuluva. Keke udavehimeya-yo gufa hida'aliyeni-yo ageku hidakolani tu hida kwamayoku matailudiya ageku hivebutana ada u'udiya hiluvehavehayana. <sup>45</sup> Veyauga againe keke udalusiuleyeku tu tova galuku againe badi hivebutu ageku hiveyaugi-fa'ilina. <sup>46</sup> U'uku bunama againe keke udabunamini tu badi ageku bunama wamagana againe hibunamina. <sup>47</sup> Hidema fa'ina againiya gagahe, kwamayoku yadi koyona moya'aina tu Yaubada ahe giyawelidi fa'ina yadi nuwanuwa lakahina agaikuya hiseyemaunena. Tu gava kaliva yana koyona keke moya'aina tu Yaubada giyawelina, medema yana nuwanuwa Yaubada againe kabi'ona." Au hidedemi Yesu Saimoni gigahena.

<sup>48</sup> Tu kwamayoku agaidiya Yesu gigahe gigayo, "Yami koyona ahe gayawelidi."

49 Hidedemi gigahe fa'ina wakawaka velugadiyao Bana buye hi'au'a-ma hivebutu hive'agahegahe higayo, “Ha! Bana hima hida gava kaliva yo koyona giyawelidi?”

50 Tu Yesu kwamayoku gigahedi gigayo, “Wave-tumaganeku fa'ina yami koyona adi aiyawela wanuhagana. Yami wanuwayamumu wanana.”

## 8

### *Vevine tufoidi Yesu hivelugana.*

1-3 Yesu gimiyami tu hivebutu melala moya'aina lakahidi be kabi'odi agaidiya ginunuwaliliuga, Yaubada yana itave'avina ana Venuwa'ata Yamumuna fa'ina gilulumamala. Ana tomuliya tuwelo hivebwa'uliyena kadu vevine tufoidi buye'i, badi vevine-dina boi wayafunediya kadu yadi wa'aulolo tulina tulina tu Yesu gisiveyawadi. Vevine-mo'edi hidede amine. Meli vineMagidala, bana yafune seveni hiluvaiyena tu Yesu giwavidi amanadi. Yowana bana Susa vavinena, kalivai-nadi Helodi yana manawa hinagena adi to'itave'avina. Susana kadu vevine velugadiyao moya'aidi. Badi vevine-dina Yesu hibwa'ulina be taudiya yadi giba againe Yesu ana tomuliya buye hi'ita'itave'avidu.

*Otova babi tulina tulina againe ana gahetalahobuhobu.*

*Madiu 13:1-9 Maki 4:1-9*

4 Tu kaliva moya'aidi melala tulina tulina agaidiya hitauya be Yesu againe hiyo'oyo'o, ada hida gahetalahobuhobu gilukahihiyena.

<sup>5</sup> Gigayo, “Kaliva sa'eyana yana otoa witi nafona yana faheya ginawena be gina'iyauyaulena. Witi nafona gi'liyauyaulena tu tufona edeya gibe'u be kaliva hivagavebabidi ada manuga hi'ela be hi'ana. <sup>6</sup> Kadu tufona babi dabodabona againe gibe'u. Ada babi keke dubadubana fa'ina gikabukabu tu gi'awa'ulodi. <sup>7</sup> Kadu tufona aboda againe gibe'u be aboda hinagene gikabu ada au yogo gifaiwala be witi gilufave'alikana. <sup>8</sup> Atu tufona babi yamumuna againe gibe'u be gikabu ma gitabo yamumuna guwana hanaledi hanaledi amine.” Au hidedemi Yesu gigahetalahobuhobu tu gikovadona gigayo, “Omi kaliva watagami, au bonaku wadavenogalena.”

*Yesu yana gahetalahobuhobu fa'ina gikivetu-tunu.*

*Madiu 13:10-23 Maki 4:10-20*

<sup>9</sup> Muliya ana tomuliya gahetalahobuhobu-nadi ana kaivila fa'ina Yesu hitolilulveluvena. <sup>10</sup> Yesu gigayo, “Yaubada yana itave'avina ana nuwanuwa sevasevauyana omi agaimiya giyauna tu mali kaliva agaidiya gahetalahobuhobugaga amine galukahihiyedi. Gagahetalahobuhobuyedi be higa hina'ita'ita tu keke hina'itahalamaneni, kadu hinanoganogala tu keke hinahalamaneni.

<sup>11</sup> Tu gahetalahobuhobu ana kaivila hidede amine. Otoa anafaiweya Yaubada bonana. <sup>12</sup> Witi nafona edeya gibe'u-ma anafaiweya kaliva Yaubada bonana hinogalina tu muliya Setani gilakayemu be bona ase'asediya givaihegena be higa Yaubada keke hinavetumaganeni-yo adi kibababala hinanuhagani. <sup>13</sup> Witi nafona

babi dabodabona againe gibe'u-ma anafaiweya kaliva Yaubada bonana hinogalina be yadi wavemwamwala ase'asediya hisena. Tu bonana keke hidanuwa-nunauyeni ada walamina keke ase'asediya gidavegilili fa'ina tova kabisonaga hivetumagana. Tu aladibidibi giyemaunidi ana toveya hinuwayewa. <sup>14</sup> Witi nafona abodeya ana nuwanuwa amanadi kaliva Yaubada bonana hinogalina tu tova hinunauwena againe hida babi ana vita ana kikaiwabu ana gakahikahi nuwadi givaina fa'ina, gaitomai-dina yadi vetumagana hilufave'alikana, keke gidatabo. <sup>15</sup> Atu witi nafona babi yamumuna againe ana nuwanuwa amanadi kaliva Yaubada bonana hinogalina be yadi wanuwunuwa tunutunugina kadu yadi wa'idibumuhiga hikidonena, ada yadi wa'atuvefa'ila guwadi hiseseyemaunena. Gahetalahobuhobu ana nuwanuwa au hidede amine.”

*Yaubada bonana ana venogala lamufa againe giluvefosena.*

*Maki 4:21-25*

<sup>16</sup> Kadu Yesu gigahedi gigayo, “Keke tamo hakwadi lamufa ginakabuni-yo avaeka hinagene o ka'i ivi dibune ginaseni. Au ana abasewadi againe ginasena be higa badi manuweya hiluku-ma matadi ginamahalina.

<sup>17</sup> Gavadi gavadi moya'aina tova adamoya keke i'ivemogatalina medema aimo tova mulina kabu'avane ginalakayemu, kadu gavadi gavadi sevasevauyana medema aimo

mahalina gina'iveyemaunina be moya'aidi hinahalamanena. <sup>18</sup> Hidema fa'ina Yaubada bonana wananogalina againe, wananogalihagihagiyena. Fa'ina hai kaliva Yaubada yana nuwanuwa ginogalina be gi'ita'itave'avina, medema againe kadu nuwanuwa moya'aina ginayauna. Atu hai kaliva Yaubada yana nuwanuwa keke gida'ita'itave'avini, medema yana halamana kabi'ona Yaubada ginavaihegena be ginamiya-kawowo.” Hidedemi Yesu gigahe.

*Yesu hinana kadu taineyao hilakayemu.*

*Madiu 12:46-50 Maki 3:31-35*

<sup>19</sup> Tu Yesu hinana kadu taineyao hi'ela hina'itana tu yo'o lakahina fa'ina keke adifaiweya hida'ela Yesu liline. <sup>20</sup> Au tamo kaliva givenuwa'atana gigayo, “Hina be taimomo eda'awaneya himidimidi, nuwanuwadi O hina'ita.”

<sup>21</sup> Tu Yesu yo'o agaidiya gigahe gigayo, “Badi gaveyao Yaubada bonana hinogalina be kadu hi'abi'abina, medema hinaku o kaikweyao.”

*Yesu mala lakahina gihawatana be gi'alovena.*

*Madiu 8:23-27 Maki 4:35-41*

<sup>22</sup> Tova sa'eyana Yesu ana tomuliya buye wakeya hiyage ada gigahedi gigayo, “Tobu yuwa fafaline kanadamana.” Au hilowoga. <sup>23</sup> Hinauna tu Yesu gi'enonuwaulu. Auhe'ama bolimana lakahina oyeya gihobu'ela be mala koyona tobu againe gilakayemu. Gufa waka hinagene gilukuluku ada abagilagi lakahina hinuhagana.

24 Badi tomuliya hina hiluvaguna higahena higayo, “Kauveya, Kauveya, kabisona kana'alika!” Au Yesu gimidi bolimana lefo lakahidi gihawatadi, auhe'ama mala gi'atagona bolimana gi'alovena.

25 Tu ana tomuliya gigahedi gigayo, “Hai yami vetumagana waseni?” Badi hiyaulowoga yadi wamatauta hive'agahegahe higayo, “Biyao! Bana hima gava kaliva yo bolimana lefo givehimeyedi ma bonana hi'abina?”

*Yesu kwanamiGadalini wayafunena gikiveya-mumuna.*

*Madiu 8:28-34 Maki 5:1-20*

26 Tu Yesu ana tomuliya buye miGadala yadi fafali againe hilakayemu, medema Galili ana fafali wamagigine. 27 Avaleya gihobu au kaliva sa'eyana melaleya gitauyama gimaduhagana. Bana kaliva ma yafune hiluvaiyena ada lauva tunugina konekonena gimiyami. Kadu keke manuweya gidamiyami au tomohuyahuya agaidiya givemanuwa. 28-29 Tova moya'aina yafune kaliva giluluvaiyena ada bulava kainumula againe nimana agena hiyogoyogona be hi'ita'itave'avina tu au ai'adi bulava gigologolohina ada yafune kaliva giwavina be melalagaga agaidiya gimiyami. Tu Yesu giyemu-yo yafune givehimeyena be kaliva ginanuyabuyabuna. Kaliva Yesu gi'itana againe, givebutu gikovakova Yesu agene gi'awawa gikova'awafatafata gigayo, “O'eni Yesu Yaubada Tomiyagetane-mo'ane Natuna.

Gavadi iya agaikuya unagani-yo u'ela? Againiya gahawayafayafa keke unakivetavetagigiku.”

<sup>30</sup> Au Yesu gitoliluveluvena gigayo, “Gavaimi a egana?” Bana gigayo, “Aku egana Yo'o.” Hidedemi gigahe fa'ina yafune moya'aidi hiluvaiyena. <sup>31</sup> Au yafune Yesu hihawayafeyafena be keke kahu tunugi-vadavada'aina againe ginawavidi.

<sup>32</sup> Tu yuwa oya fafaline bawe adi yo'o lakahina adiga hilelele, ada yafune hihawayafeyafena be ginahawahegedi bawe hinaluvaiyedi. Au gihawahegedi. <sup>33</sup> Gihawahegedi-yo yafune kaliva hinuyabuyabuna be bawe hiluvaiyedi, ada bawe adi yo'o matatabudi awaloloya hi'otahobu be tobu againe hitowa'alika.

<sup>34</sup> Tu bawe adi tolufolofologahi hida gaitoma hi'ita-yo hi'ota be hina, melalamo'ena kadu awa'awanine mena gaitomaidina hilukahihiyedi. <sup>35</sup> Kaliva hinogalini-yo hitauya be gavadi gilakayemu-ma hina'itana. Ada Yesu againe hiyemu kaliva yafune hinuyabuyabuna-ma hinuhagana, bana Yesu agene gihiyoto u'una a giyamumu be ana kaleko gi'osena. Hi'ita-yo himatauta. <sup>36</sup> Ada badi to'ita kaliva wayafunena gavaiya'amine yana yamumu ginuhagani ma tomiyami agaidiya hilukahihiyena. <sup>37</sup> Hilukahihi gihavaina Gadala ana fafali kalivai-dina moya'aidi Yesu hive'o'olena be ginanuyabuyabudi, fa'ina himatautave'ine. Au wakeya giyage be giyewana.

<sup>38-39</sup> Tu kaliva yafune hinuyabuyabuna-ma Yesu gihawayafeyafena gigayo, “Iya O buye



kadana.” Tu Yesu gi'atuveyewana gigayo, “Uyewa ya melaleya be gavadi lakahina Yaubada o fa'iniya gigugaiyeni-ma kaliva agaidiya unalukahihiyena.” Ada au kaliva gina gavadi lakahina bana fa'ine Yesu gigugaiyena-ma kaliva moya'aidi agaidiya gilukahihiyena, gina melala giluyabuna.

*Yailo natuna kwamayoku yana aulolo kahihina.*

*Madiu 9:18-19 Maki 5:21-24*

<sup>40</sup> Tu Yesu tobu fafaline giyewana againe, yo'o yuwadedei yadi wavemwamwala hilusiuleyena fa'ina moya'aidi hiyo'o be hibodabodana. <sup>41-42</sup> Tu kaliva sa'eyana gi'ela ana egana Yailo, bana manawa-abavehawala ana tonagona sa'eyana. Au Yesu againe gi'ibo'ula-mo'a gihawayafeyafena higa yana manuweya gida'ela, fa'ina natuna vine-tubu'eya ana malamala tuwelo gi'ali'alika. Ada au Yesu ginauna tu yo'o hiveve'atuwahega tu himid-iffina.

*Kwamayoku Yesu ana kaleko bwatana gikibwa'ena kahihina.*

*Madiu 9:20-22 Maki 5:25-34*

<sup>43</sup> Yesu yo'o hinagediya ginauna tu kwamayoku sa'eyana buye hinauna, bana yana vaikohi be dayagina tova moya'aina gimadu-vagata. Tuwaina givebutu gi'u'aulolo be ginunauwena malamala tuwelo, doketa agaidiya yana lokoloko moya'aina givehavaina tu keke adifaiweya. <sup>44</sup> Kwamayoku Yesu wamuline gi'ela be ana kaleko bwatana gikibwa'ena, ada auhe'amanadi dayagina gihayahaya.

<sup>45</sup> Au Yesu gigayo, “Hakwa'adi gikibwa'eku?” Moya'aidi hivekeke ada Fita gigahena gigayo, “Kauveya, yo'oyo'o himidifi be hiveve'atuwahega.”

<sup>46</sup> Tu Yesu gigayo, “Keke tu tamo hakwadi gikibwa'eku be yaku faiwala bana againe gina ma a ga'ayaunena.”

<sup>47</sup> Au kwamayoku Yesu ahe gihalamanena ma gi'tana againe, yana wavetatava gi'ela Yesu agene gi'ibo'ula-mo'a, ada kaliva moya'aidi matadiya yana kaibwa'e inubana gihawavemogatalena kadu yana maduyamumu fa'ina gilukahihi. <sup>48</sup> Au Yesu gigahena gigayo, “Natuku, uvetumaganeku fa'ina ubwaina. Ya wanuwayamumu unana.”

*Yesu Yailo natuna alikeya gisivemididina.*

*Madiu 9:23-26 Maki 5:35-43*

<sup>49</sup> Yesu aimo gilulukahihi tu kaliva sa'eyana manuwawa-abavehawala ana tonagona ana egana Yailo yana manuweya gitauya-ma giyemu Yailo gigahena gigayo, “Natu kwamayoku yawaina gihavaina. Keke Tovehawala unaluve'avaleni-yo una'aliye-kawowoni.”

<sup>50</sup> Tu Yesu kwamana valeyana ginogalini-yo Yailo gigahena gigayo, “Keke unamatauta, au unavetumaganeku be natu ginayamumu.”

<sup>51</sup> Ada manuweya giyemu-yo yo'o moya'aidi luku fa'ina gihawatadi tu Fita Yoni Yemesa kadu kwamana tamana hinana badi'iyaogaga Bana buye hiluku. <sup>52</sup> Ada moya'aidi hitagitagigina hitagitagilauhawa, tu Yesu gigahedi gigayo,

“Auwe tagiya, kwamana keke gida'alika au gi'enonuwaulu.”

<sup>53</sup> Kwamana velemo'ena gi'alika ma hihalamanena fa'ina moya'aidi Yesu hihawavelaigena. <sup>54</sup> Tu Yesu kwamana nimana gi'abina gikova gigayo, “Vinewe'owe'o, umidi.” <sup>55</sup> Au alu'aluwana kwamana againe giyewana ada auhe'ama gimidi. Ada Yesu givehimeya gigayo, “Tamo a'a kwamana wavele be gi'ani.” <sup>56</sup> Tu tamana hinana hiyaulowoga tu gihawatadi be gavadi gilakayemu-ma keke tamo hakwadi againe hinalukahihiyeni.

## 9

*Yesu yana yo'o tuwelo kaliva adi veluga fa'ina gi'iveninisedi.*

*Madiu 10:5-15 Maki 6:7-13*

<sup>1</sup> Tu Yesu ana tomuliya tuwelo gikovav-aga'auhidi ada faiwala kadu abavehimeya givedi be adifaiweya yafune moya'aidi hinawavidi kadu kaliva auloloya hinasiveyawadi.

<sup>2</sup> Au gi'atuhegedi be Yaubada yana itave'avina fa'ina hinalumamala kadu to'aulolo hinakiveyamumudi. <sup>3</sup> Ada gigahedi gigayo, “Keke tamo gavadi yamina againe wanauweni, keke aiwala keke fose keke a'a keke mani wanawahini. Kadu keke aikeva luhei wanauweni. <sup>4</sup> Gava manawa againe wanamidiluku, medede againe wanamiyami be wanalowoga. <sup>5</sup> Kadu gava melala againe wanayemu tu keke hinavetobohiyani, medema melalai-nadi wanahegena againe fwayafwaya agemiya wanavagahegehegena,

higa Yaubada yana nuwakoyo badi agaidiya ana iya'iyaya.” Au hidedemi Yesu ana tomuliya givenuwa'atadi.

<sup>6</sup> Au hilowoga melala tulina tulina agaidiya hinuwaliliuga, Yaubada yana Venuwa'ata Yamumuna hilumamalena, melala moya'aina agaidiya kaliva hisiveyawadi.

*Helodi Yesu fa'ine nuwana givegafo'uya'uya.*

*Madiu 14:1-2 Maki 6:14-16*

<sup>7-8</sup> Tu bana Helodi Galili ana tovehimeya gaitoma moya'aina gilakayemu-ma valeyadi ginogalina, ada kaliva moya'aidi Yesu inubana hi'abigahegahayena fa'ina Helodi nuwana givegafo'uya'uya. Tufoidi higahe vaita Yoni Tobafitaiso alikeya gidamididi-havagi. Kadu tufoidi higahe vaita Elaiya gidayemuna-havagi. Kadu tufoidi higahe vaita Yaubada bonana ana to'awatalatalaina sa'eyana tuwaina gimiyami-ma gidamididi-havagi. <sup>9</sup> Bana Helodi gigahe gigayo, “Iya gavehimeya be Yoni u'una hinikehegena tu hida hima hakwa'adi-yo valeyana tulina tulina ganoganogalini?” Ada au tova gilelelena be higa Yesu gina'itana.

*Yesu kaliva faifi tausani give'adi.*

*Madiu 14:13-21 Maki 6:30-44 Yoni 6:1-15*

<sup>10</sup> Tu afositolo hiyewadi-yo gavadi gavadi moya'aina higugaiyena-ma Yesu hivenuwa'atana. Au ginawedi be melala ana egana Bedasaida againe hitogavehaila be hinaveyawai. <sup>11</sup> Tu yo'oyo'o Yesu ana tomuliya buye hami hina

ma hinogalina againe, himuliyedi. Hiyemu-yo Yesu gilusiuleyedi, ada Yaubada yana itave'avina fa'ina gilukahihiyedi kadu gaveyao yadi wa'aulolo medema gisiveyawadi.

<sup>12</sup> Tu mala givebutu gisilavina tomuliya tuwelo Yesu againe hi'ela higayo, “Yo'o una'atuhegedi be melala eda'uoya kadu awa'awanidi agaidiya hinana adiga hinakimonena abadauda hinalelena. Fa'ina hida melalagaga againe kamimiyami.”

<sup>13</sup> Tu Bana gigahedi gigayo, “Auwe, omi wanave'adi.” Badi higayo, “Beledi kabi'odi faifigaga kadu igana luhei ime agaimeya gidadauda. Hima gavana-yo hida yo'ohala adiga anana anakimoneni?”

<sup>14</sup> Hidedemi higahede fa'ina kaliva adi yo'o 5,000 amine. Tu Yesu ana tomuliya gigahedi gigayo, “Wanagahedi be hinahiyoto adi loi fifti fifti amine.” <sup>15</sup> Au hidedemi tomuliya hihuluva. Yo'o higahedi be moya'aidi hihiyoto. <sup>16</sup> Hihiyoto-yo Yesu a'a faifi kadu igana luhei givaidi digo lobameya gi'italele Tamana againe givesiule, au a'a gikihinehineni-yo ana tomuliya givedi be higa yo'o agaidiya hinafolakena. <sup>17</sup> Ada au moya'aidi hi'a be hi'ahiyauwa, ada adi tufo tomuliya hikwakwana feyawa tuwelo kwadakwada againe hivemagadi.

*Fita Yesu inubana fa'ina gihawavemogatala.*

*Madiu 16:13-20 Maki 8:27-30*

<sup>18</sup> Tova sa'eyana Yesu anakaiibe gimiyami tu give'ove'o'ola ada ana tomuliya Bana liline himiyami. Au gitoliluveluvedu gigayo, “Iya inubaku fa'ina kaliva gavaimi higahede?”

<sup>19</sup> Badi higayo, “Tufoidi higahe vaita O Yoni Tobafitaiso. Kadu tufoidi higahe vaita O Yaubada bonana ana to'awatalatalaina ana egana Elaiya. Kadu tufoidi higahe vaita to'awatalatalaina sa'eyana tuwaina gimiyami-ma gidamididi-havagi.”

<sup>20</sup> Yesu gigayo, “Tu omi'iyao Iya vaita hakwa'adi ma gavaimi wagahe?” Fita gibonalaufata gigayo, “O'eni Yaubada yana Tovegida Keliso.”

*Yesu yana aulolo yana alika gilukahihyena.*

*Madiu 16:21-23 Maki 8:31-33*

<sup>21</sup> Fita Yesu inubana fa'ina hidedemi gigahe-yo Yesu ana tomuliya gihawatadi be Bana Yaubada yana Tovegida ma keke tamo hakwadi againe hinahawavemogataleni. <sup>22</sup> Kadu gigayo, “Iya Tohobu'ela aku vehimeya gavaina higa aulolo moya'aina kaliva nimadiya gananuhagana. Kaliva lakahidiyao ada abaveyao ana tofaisewa kikaiwabudiyao kadu Mosese yana vehimeya ana tovehawala hinakiloweku. Au kaliva hinaluve'alikaku tu aiyeta anaveto againe Yaubada ginasivemididiku.”

*Yesu ana muliya fa'ina vita kananuhagana.*

*Madiu 16:24-28 Maki 8:34-38 Yoni 12:23-26*

<sup>23</sup> Tu Yesu moya'aidi agaidiya gigahe gigayo, “Gava kaliva nuwanuwana tavagiku ginamafuna, medema gilubodana be tauna yana nuwanuwa gidavenuwauluyena, ada Iya agaikuya gidavetomuliya-yo tova tova gidahawahegena be vita tulina tulina gidanunuhagadi. <sup>24</sup> Ada gava kaliva keke

nuwanuwana Iya agaikuya ginahawahegeni tu taunaga fa'ina ginanuwanuwa tova moyo'aina, medema yawaina ginanuhegena. Atu gava kaliva ginahawahegena be aku vetumagana fa'ina yawaina ginanuhegena, medema yawai-vagahina ginanuhagana. <sup>25</sup> Ka'i kaliva babi ana lokoloko matatabuna ginavai-'owona tu tauna yawaina o ka'i alu'aluwana yana miya hagihagina ginanuhegena digo, keke tamo gavadi yamumuna ginanuhagani. <sup>26</sup> Fa'ina hai kaliva keke nuwanuwana bana yaku kaliva be bonaku givetumaganena ma yo'o matadiya ginahawavemogataleni yadi hawavelaiga gimatausena fa'ina, medema fa'ine aimo tova mulina Iya keke ganagahe vaita bana yaku kaliva. E, Iya Tohobu'ela Tauku yaku wakikaiwabu Kamaku yana wakikaiwabu yana tovenuwa'ata mahamahalidiyao yadi wakikaiwabu buye ganayewa'ela ana toveya, bana fa'ine keke ganagahe vaita yaku kaliva. <sup>27</sup> Gagahe velema'ena agaimiya tufoimi hidedei wamidimidi-ma aimo keke alika wananuhagani tu nagona Yaubada yana abavehimeya yana yemu wanamidi'itana.” Hidedemi Yesu gigahe.

*Yesu lobama ana nuya kikaiwabuna gi'osena.*

*Madiu 17:1-8 Maki 9:2-8*

<sup>28</sup> Mena gahegahe Yesu giyakahina be aiyeta eita amine himiyami tu Yesu Fita Yoni Yemesa ginauwedi be oyeya gilakavedi, higa wesedei ginave'o'ola fa'ina. <sup>29</sup> Give'ove'o'ola tu magigina ana ita tulina gilakayemu ada ana vaigau

gikwayanuwanuwa. <sup>30-31</sup> Ada auhe'ama Yaubada yana kaliva luhei tuwai-mo'ena himiyami-ma adi egana Mosese kadu Elaiya yadi wamahalina ve'akinamanamalina lobameya hihobu'ela Yesu buye hilulukahihi. Yadi ve'agahegahe againe Yesu Yelusalema againe gina'alika be gavaiya'amine Yaubada yana nuwanuwa alikai-nadi againe ginalakayemu velemo'ena ma hilukahihiyena. <sup>32</sup> Tu Fita tobohiyaneyao buye hidauda fa'ina wowodi gifwalele, ada hi'enoviladi againe Yesu yana mahalina ve'akinamanamalina hi'itana, kadu kaliva adi'iselu Bana buye himidimidi-ma hi'itadi. <sup>33</sup> Ada Mosese Elaiya hivebutu Yesu hinuyabuyabuni tu Fita Yesu gigahena gigayo, “Kauveya, ime O buye kamimiyami ma gilubodana. Vada tohiye anayogodi, sa'eyana O fa'iniya, sa'eyana Mosese fa'ine, kadu sa'eyana Elaiya fa'ine.” Tu gavaimi gigahegahe ma keke gidahalamaneni.

<sup>34</sup> Aimo gigahegaheni tu buhibuhi gihobu tomuliya adi'itoto giwa'utagodi. Ada buhibuhi gikevadi againe himatauta. <sup>35</sup> Ada buhibuhi hinagene ago'ago sa'eyana hinogalina gigayo, “Bana hidevama Natuku Bana galuwafana amanadi. Au bonana wanavenogalena.” <sup>36</sup> Ada ago'ago gi'agolohini-yo Yesu anakaibe gimiyami ma hi'itana. Ada hive'awa'ibodena medema aiyetai-dina gavadi tamo hi'itana-ma keke tamo hakwadi againe hidalukahihiyeni.

*Yesu kwamana wayafunena gisiveyawana.  
Madiu 17:14-21 Maki 9:14-29*



<sup>37</sup> Bogi hida mala gilauna oyeya hihobu'elayo yo'o lakahina Yesu himaduhagana. <sup>38</sup> Ada auhe'ama kaliva sa'eyana yo'o agaidiya gikova gigayo, “Tovehawala, gahawayafeyafe be natuku uda'itanuwakabubuyena fa'ina bana kwanatubu'eyana. <sup>39</sup> Bana wayafunena ada yafune gikive'avini-yo auhe'ama gikova'awafatafata, ada yafune gikivefavefanina au awabugo gi'ala'ala-hiwahiwagena. Yafune gififaiwala gi'i'iveki'onina ginunauwena keke gidamadunuyabuyabuni. <sup>40</sup> Ada a tomuliya gahawayafeyafedi be hinawavina tu keke adifaiweya.”

<sup>41</sup> Au Yesu gigahedi gigayo, “Omi kaliva tova adamoya watubuyemu-ma yami nuwanuwa keke tunutunugina, keke ma'ita wadavetumaganeku. Malamala gavaiyehi omi buye kanamiyami be gana'atuvefa'ilemi tu yami vetumagana ginayemu? Au natu u'aliye we'ai.”

<sup>42</sup> Kwamana aimo gi'ela'ela tu yafune gi'atagifatafata babiya gibaini-yo gikivefavefanina. Tu Yesu yafune gihawatana kwamana gikiveyamumuna be tamana giveleyewena. <sup>43</sup> Ada Yaubada yana faiwala lakahina fa'ina kaliva moya'aidi hiyaulowoga.

<sup>44</sup> Tu yo'o Yesu yana gugai moya'aina fa'ina aimo hiyauyaulowoga tu Bana ana tomuliya gigahedi gigayo, “Hida bonaku wananogalina be utumiya wanasena. Iya Tohobu'ela makewa kaliva nimadiya hinahegenauweku.” <sup>45</sup> Tu mena yana gahe ana nuwanuwa hifaniyena. Yaubada nuwanuwai-nadi badi agaidiya gisevauyena be

keke adifaiweya hinahalamaneni. Ada gahe-nadi ana tolilualuva fa'ina himatauta.

*Hakwadi kikaiwabuna Yaubada matane?*

*Madiu 18:1-5 Maki 9:33-41 Yoni 13:20*

<sup>46</sup> Bana Yesu gigahe-yo ana tomuliya hivebutu hivekwageya higa hakwadi badi agaidiya kikaiwabu-mo'ena. <sup>47-48</sup> Yesu yadi nuwahinage gi'ayauneni-yo kwamana kabi'ona gi'abina be liline gisi'aliyena ada gigahedi gigayo, “Hai kaliva hida kwamana aku eganeya ginasive'auyena, medema vaita Iya ginasive'auyeku. Ada hai kaliva Iya ginasive'auyeku, medema vaita Bana'e gi'iveniniseku-ma ginasive'auyena. Fa'ina gava kaliva moya'aimi agaimiya ana egana kabi'omo'ena, medema makewa'e kikaiwabu-mo'ena.”

<sup>49</sup> Yesu gigahe-yo Yoni gigahena gigayo, “Kauveya, kaliva sa'eyana a'itana, bana yafune a eganeya giwaviwavidu tu ahawatana, fa'ina bana keke ime tomuliya ama yo'o kalivana.”

<sup>50</sup> Yesu gigahedi gigayo, “Keke wanahawatani. Wa'ita, gava kaliva keke ami nibaina, medema tobohiyami.”

*MiSameliya Yesu hikilowena.*

<sup>51</sup> Tu tova giluedaveda'ufo be Yaubada Yesu lobameya ginasilakahina, ada au yana wa'atuvefa'ila Tauna givehimeya be Yelusalema againe ginana. <sup>52</sup> Ada tomaduyowayowana gi'iveninisedi be wai hinagona, miSameliya yadi melala sa'eyana againe hiluku be higa Bana yana yemu fa'ina hinakidewadewa. <sup>53</sup> Tu miSameliya miYuda keke hidavetobohiyana, ada miSameliya

hihalamanena Yesu yana nuwanuwa againe Yelusalema ana fou gitutuna be ginana fa'ina keke yadi melaleya hidavega'auleni. <sup>54</sup> Ada ana tomuliya Yemesa be Yoni miSameliya yadi kilowa hinogalini-yo higayo, “Kauveya, gavaimi unuwanuwa? Ka'i anavehimeya be ai'ala'alata lobameya ginahobu'ela gina'alayaweyawelidi?” <sup>55</sup> Tu Yesu gihagavilana be gidakeyedi. <sup>56</sup> Ada au mali melala againe hina.

*Kaliva adi'itoto Yesu ana muliya fa'ina higa-wayoga.*

*Madiu 8:18-22*

<sup>57</sup> Edeya hinauna tu kaliva sa'eyana Yesu againe gigahe gigayo, “Gahawahegeku be ha'amine ha'amine unana, iya kadu O buye kanana.”

<sup>58</sup> Bana Yesu gigayo, “Galu'eta-walawala'a adi wagou kadu manuga adi wa'uba tu Iya Tohobu'ela yaku abamiya keke, kadu yaku abaveyawai keke. Au aku muliya vitana.”

<sup>59</sup> Kadu kaliva sa'eyana againe gigahe gigayo, “Unamuliyeku.” Tu bana gigayo, “Kauveya, udahawahegeku be gadamiyami tu kamaku gadatauni-yo gada'ela gadamuliye.”

<sup>60</sup> Tu Yesu gigahena gigayo, “Badi yawaidi ivaguna keke amanadi, yadi to'alika hinatauna. O'eni ma unana Yaubada yana yo'ogaga ana luku fa'ina unalumamala.”

<sup>61</sup> Kadu kaliva velugana gigayo, “Kauveya, iya ganamuliye tu udahawahegeku be nagona aku unuma gadalukafoiyedi.”

62 Yesu gigahena gigayo, “Gava kaliva givebutu Iya fa'ikuya gifaisewa tu muliya ginuwanuwaluga be tauna yana faisewa againe giyewana, medema Yaubada yana yo'o ana luku fa'ina keke anafata.” Au hidedemi Yesu bonana.

## 10

### *Yesu tomuliya 72 gi'atuhegedi.*

1 Muliya Kaiwabu Yesu kadu tomuliya velugadiyao 72 givegidedi be melala lakahidi be kabi'odi agaidiya tomuliya luhei luhei amine gi'atuhegedi be wai hinanagona. Tu Yesu Tauna melalai-dina agaidiya aimo ginana.

2 Gigahedi gigayo, “A'a moya'aina give'afa amine kaliva moya'aidi himimiyami nuwadi ahe giludigadigaga be hinavetumaganeku, tu bonaku ana tolaumamala vaita faha ana toyaudi amine ma keke moya'aidi. Medema fa'ina Tonifaha againe wanave'o'ola be yana tolaumamala gina'iveninisedi be yana faha hinahege'au'auta.

3 Au wanana be kaliva wanalumamaledi. Tufoidi hinavenibainemi fa'ina, omi vaita sifi kabi'odiyao amine tu badi galu'eta manimaninidiyao adi egana wolivi amine hinafadiya wanana.

4 Keke mani ana abasewadi keke fose keke ageyafayafa wanauweni, kadu keke edeya wananimidimidi kaliva buye wanalulukahihina.

5 Gava manuweya wanaluku againe yami gahe wanamidisena wanagayo, Siule, Yaubada yana nuwakabubu againe wanamiyami. 6 Ka'i tonimanuwa nuwanuwana vetobohiyana, au yami gahenuwakabubu bana againe wasena-ma

ginaduva-vagata. Tu ka'i keke amine, kadu yami lusiule wanavaiyewena be yadi vemwamwala keke. <sup>7</sup> Manuwa sa'eyanaga againe wanamiyami, gava a'a gava bwai matamiya hinasena, medema wana'ana wanayuna. Fa'ina yaku tofaisewa gilubodadi be adi laufata hinavaina. E, keke mali manuweya wana'abimiyamiyanana.

<sup>8</sup> Gava melala againe wanaluku be hinavega'aulemi be gavadi matamiya hinasena, medema wana'ana. <sup>9</sup> Kadu mena melalainadi againe to'aulolo wanasiveyawadi ada wanagahedi wanagayo, Yaubada lilimiya gi'ela, nuwanuwana yana itave'avina againe wanamiyami be ase'ase miya ginavehivehimeya. <sup>10-11</sup> Tu gava melala againe wanaluku be hinadibutoyogemi, medema yadi eda'awaneya wanahobu wanagayo, Yami melala ana fwayafwaya agemeya gifotafotana-ma agaimiya avagavagahegehegena, higa Yaubada yana ila'a agaimiya ginayemu-ma ana iya'iyaya. Tu hidedemi wanahalamanena higa Yaubada lilimiya gi'ela, nuwanuwana yana itave'avina againe wanamiyami be ase'ase miya ginavehivehimeya. Au hidedemi wanagahedi. <sup>12</sup> Boi tuwai-mo'ena miSodoma dewa koyomo'ena hififaisewana. Tu gagahemi badi kalivaidina omi yaku kaliva hinakilowemi fa'ina, adi matahiwadi miSodoma adi matahiwadi ginatubuhegena aimo vedewayauga ana toveya.”

*Melala keke hidanuwaviladi-ma Yesu givehoiy-oiyedi.*

*Madiu 11:20-24*

<sup>13</sup> Kadu Yesu gigayo, “Hoiyoi miKolasini! Hoiyoi miBedasaida! Tova vita-mo'ena agaimiya ginalakayemu. Gavadi-yo? Ka'i aituha fifiwaladi omi hinafamiya gafaisewadi-ma badi miTaiya miSaidoni kaliva koyodiyao hinafadiya gadafaise-wadi digo, badi tuwai-mo'ena yadi dewa koyona hidahegena hidaludabudabu hidave'ofu au hidahiyoto, higa yadi nuwawilana ana iya'iyaya hida'veyemaunina. <sup>14</sup> Tu aimo vedewayauga ana toveya omi miKolasini kadu miBedasaida ami matahiwadi miTaiya miSaidoni adi matahiwadi ginatubuhegena, fa'ina yaku aituha fifiwaladi wa'itadi tu keke wadavetumaganeku. <sup>15</sup> Ada omi miKafeneumi ma nuwanuwami taumiyao ami egana wanakilakahina vaita lobameya wadalaka tu abaga koyona againe hinahegehobuyemi.”

<sup>16</sup> Ada au Yesu ana tomuliya agaidiya gigahe gigayo, “Hai kaliva omi givenogalemi, medema Iya givenogaleku tu hai kaliva omi gikilowemi medema Iya gikiloweku, ada hai kaliva Iya gikiloweku, medema Bana'e gi'iveniniseku-ma gikilowena.”

*Tomuliya 72 yadi wavemwamwala hiyewadi.*

<sup>17</sup> Tu badi tomuliya 72 boi Yesu gi'iveninisedi be yadi faisewa hiluyabuna-ma yadi wavemwamwala hiyewadi. Yesu againe higahe higayo, “Kauveya, badi yafune nonogana a eganeya avehimeyedi-ma bonama hi'abina.”

18 Yesu gigahedi gigayo, “Nama auhe'ama gisinamana amine, Setani yana faiwala gi'agolohini-yo lobameya gi'akakilina-ma ga'itana. 19 Wanogali! Yaku faiwala ahe gavelemi higa vaita oloto atagikwamana wanavagadi tu keke hinayovami. Hida yaku faiwala againe Setani yana faiwala wanavagatagona, ada keke tamo gavadi anafaiweya ginakivekoyomi. 20 Tu balauma koyodiyao wavehimeyedi be bonami hi'abina fa'ina, keke wanavemwamwala. Au ami egana lobameya Yaubada yana buki againe gi'etoladina, hidema fa'ina wanavemwamwala.”

*Yesu givemwamwala lakahina.*

*Madiu 11:25-27, 13:16-17*

21 Medema tovai-nadi Alu'aluwa Mahalina vemwamwala lakahina Yesu givelena ada Yesu gigayo, “Kamaku, O'eni lobama be babi ana Kaiwabu. O againiya gavesiule fa'ina yaku vehawala ana nuwanuwa badi tonuwahuya agaidiya usevauyena be keke hinahalamaneni fa'ina, tu badi tonaufani vaita kwamana kabi'ona amine agaidiya uhawavemogatalena. Ika Kamaku, ya nuwanuwa haghagina amine au ahe uhuluva.” Hidedemi Yesu give'o'ola.

22 Kadu Yesu gigayo, “Kamaku gaitoma moya'aina nimakuya gisedi. Keke tamo hakwadi Iya Yaubada Natuna aku ita'ita gidahalamaneni velemo'ena, au Bana Kamaku anakaibe gihalamane-mo'eku. Ada keke tamo hakwadi Kamaku ana ita'ita gidahalamaneni velemo'ena, au Iya Natuna akukaibe gahalamane-mo'ena,

kadu gava kaliva againe Iya nuwanuwaku Kamaku gana'ivemogatalina, au bana ginahalamanena.”

<sup>23</sup> Yesu hidedemi gigahe-yo ana tomuliya agaidiya gihagavilana badi'iyaogaga gigahedi gigayo, “Hida yaku gugai fifiwalana wa'itahalamanena fa'ina yami vemwamwala gavatubuga! <sup>24</sup> Fa'ina agaimiya gagahe Yaubada bonana ana to'awatalatalaina kadu tokikaiwabu moya'aidi nuwanuwadi yaku faisewa omi wa'ita'itana-ma hina'itana, tu keke hida'itani. Kadu nuwanuwadi yaku vehawala omi wanoganogalina-ma hinanogalina, tu keke hidanogalini.” Au hidedemi Yesu gigahe.

*KwanaSameliya ana nibaina edeya givelugana-ma*

*ana gahetalahobuhobu.*

<sup>25</sup> Tova sa'eyana vehimeya ana tonuwahuya sa'eyana nuwanuwana Yesu ginavebauna fa'ina gitowamidi be gitoliluveluvena gigayo, “Tovehawala, gavadi ganagani-yo yawai-vagahiku gananuhagani?”

<sup>26</sup> Yesu gigahena gigayo, “Mosese yana buki-vehimeya againe gavaimi gi'etoladini? Gavaimi uhawa?”

<sup>27</sup> Bana gibonalaufata gigayo, “Ase'ase matatabuna kadu alu'aluwa matatabuna kadu ya faiwala matatabuna kadu nuwa matatabuna Yaubada ya Kaiwabu againe unahawahege-owona be Bana againe unanuwanuwa lakahina. Kadu vehimeya sa'eyana ma,



Tauni unuwakabubuye amine tobohiyamomo unanuwakabubuyedi.”

<sup>28</sup> Yesu gigayo, “Ubonalaufata yamumuna. Hidede amine unahuluva be yawaini velemo'ena unanuhagana.”

<sup>29</sup> Tu vehimeya ana tonuwahuya nuwanuwana tauna wowona ginahawalakalakahina fa'ina Yesu againe gigahe gigayo, “Hakwa'adi tobohiyaku?”

<sup>30</sup> Yesu gigahetalahobuhobuyena gigayo, “KwanmiYuda sa'eyana Yelusalema againe gitauya be Yeliko againe gihobuhobu tu tomunugakai'afu hi'ela, ana vaigau hivehalilina be himunukoyokoyona vaita hidaluve'alikani tu hinuyabuyabuna. <sup>31</sup> Gimiyami tu abaveyao ana tofaisewa sa'eyana mena edai-nadi againe ginauna ada kaliva gi'ita-yo ginuvekemena. <sup>32</sup> Meda anafaiweya manuwatafalolo ana tofaisewa sa'eyana abagai-nadi againe giyemu ada kaliva gi'ita-yo kadu ginuvekemena. <sup>33</sup> Tu muliya kwanaSameliya miYuda adi nibaina ma mena edai-nadi amine ginauna tu kaliva gidauda-ma againe giyemu ada gi'ita-yo gihinekalikaliyena. <sup>34</sup> Kaliva againe gina ana koliya bunama kadu oine againe gilumulamulani-yo gifafana. Gifafana gihavaina yana yomuyomu againe gidodona digo wakawaka-manuwa againe gi'aliyena be gi'itave'avina. <sup>35</sup> Bogi hida mala gilauna kabala luhei ana foseya gi'ihobuna tonimanuwa givele tu gigahena gigayo, Kaliva una'itave'avina ada mani gavaiyehi bana fa'ine unahegena, medema aimo ganayewa'ela againe unagaheyena-ma ganafatana.”

<sup>36</sup> Yesu gigahetalahobuhobu gihavaina vehimeya ana tonuwahuya gitoliluveluvena gigayo, “Gavaiyami? Kaliva adi'itoto agaidiya gava kaliva bana kaliva tomunugakai'afu himununa-ma givetobohiyaneni velema'ena?”

<sup>37</sup> Vehimeya ana tonuwahuya gigayo, “Bana'e ana tohinekalikali amanadi.” Yesu gigayo, “Kadu o unana meda unahuluva.”

*Yesu Mata be Meli agaidiya giwakawaka.*

<sup>38</sup> Tu Yesu ana tomuliya buye hinauna tu melala sa'eyana againe hilakayemu. Medede againe kwamayoku sa'eyana ana egana Mata yana manuweya givega'auledi be hina'a. <sup>39</sup> Kadu taina gimiyami ana egana Meli ada bana Kaiwabu agene gihiyoto yana vehawala givanevanenegenena. <sup>40</sup> Tu Mata a'a ana kidewadewa againe gi'idamodamo fa'ina Meli againe gi'ago'uga. Au gi'ela Yesu againe gigahe, “Kauveya, u'ita. Keke iya fa'ikuya udanuwanuwa tu kaiku nonogana gihiyoto be gimimiyami tu akukaiibe gafififaisewa. Au udagahena be iya gidavelugaku.”

<sup>41</sup> Tu Kaiwabu gigahena gigayo, “Ho Mata, gaitoma moya'aina agaidiya nuwa ginanauna lakahina tu idamodamo againe uvedivediwe. <sup>42</sup> Au gaitoma sa'eyanaga giluboda. Meli gavadi gilubodana-ma againe gihawahegena. Yaku gahe ana vanenega againe gihawahegena fa'ina keke ganahawatani.”

# 11

*Yesu ve'o'ola fa'ina givehawala.*

*Madiu 6:5-14, 7:7-11*

<sup>1</sup> Tova sa'eyana Yesu give'ove'o'ola. Give'o'ola gihavaina ana tomuliya sa'eyana gigahena gigayo, “Kauveya, bana Yoni ana tomuliya ve'o'ola givehawaledi amine, meda ime udavehawalema.”

<sup>2</sup> Yesu gigahedi gigayo, “Wanave'o'ola againe hidede amine wanagahe wanagayo, Tamama, a egana mahamahalina anave'amohimohinena. Ya abavehimeya ana tova gidalakayemu ase'asemeya.

<sup>3</sup> Aiyeta sa'eyana sa'eyana amaga udavelevelema.

<sup>4</sup> Yama koyona O udavenuwauluyena, fa'ina gaveyao moya'aidi agaimeya hikoyo medema yadi koyona kadu ime avenuwauluyena. Kadu keke aladibidibi againe unahawahegema.”  
Ve'o'ola fa'ina hidedemi Yesu givehawala.

<sup>5-6</sup> Kadu gigahedi gigayo, “Ka'i agaimiya kaliva sa'eya uda'enonuwaulu tu bogi nafone tobohiya sa'eyana againiya gidalakayemu ada keke tamo a'a againiya gidadauda, au tobohiya velugana yana manuweya udana udagahena udagayo, Kusebo, tobohiyaku sa'eyana yanana againe agaikuya gilakayemu, ada keke tamo a'a agaikuya gidadauda-yo bana fa'ine ganakidewadewa, fa'ina a'a tohiye udaveleku.

<sup>7</sup> Tu ka'i tobohiya vetawaneya gidagahe gidagayo, Keke unakive'ive'itaku. Wana ahe gafalina natukweyao buye a'enobala. Au keke akufaiweya ganamidi tamo gavadi ganavele. <sup>8</sup> E gavaiyami?

Keke-mo'a ginamidi a'a ginavele bana tobohiya fa'ine tu ya ve'o'ola againe u'atuvefa'ila be bana keke nuwanuwana wowomumu ginanuhagani fa'ina, ginamidi be gavadi nuwanuwa ma ginavele.

<sup>9</sup> Ada Iya gagahemi, wanave'ove'o'ola be Yaubada ginavelemi. Wanalelele be wananuhagana. Wanakikifisifisi'a be Yaubada wana ginayauna. <sup>10</sup> Wa'ita, gaveyao hive'ove'o'ola medema Yaubada nimane hinavaina, kadu gaveyao hilelele medema hinanuhagana, ada gaveyao hikikifisifisi'a medema agaidiya Yaubada wana ginayauna.

<sup>11</sup> Omi kaliva wanogali! Ka'i natumiyao hida'ela hidagayo, Kamaku, tamo igana gada'ana, ma ka'i keke igana tu oloto wadaveledi? Keke. <sup>12</sup> O ka'i hidave'o'ola hidagayo, Kamaku, tamo kamukamu foudi gada'ana, ma ka'i atagikwamana wadaveledi? Keke. <sup>13</sup> Omi tokoyona tu nuwakabubu haghagana natumiyao waveleledi. Atu ka'i Tamada lobameya wanave'ove'o'olena amine, Bana'e Alu'aluwa Mahalina agaimiya ginahawahegena ginahawahege-mo'ena.”

*Yesu yana faiwala inubana ka'i Yaubada againe o ka'i Setani againe?*

*Madiu 12:22-37 Maki 3:20-27*

<sup>14</sup> Tova sa'eyana Yesu kaliva wayafunena ginuhagana. Bana kalivai-nadi yafune giluvaiyena fa'ina, awana gi'abodana. Ada Yesu yafune giwavi-yo kaliva awana gila'ana be givebutu gilukahihi. Au yo'o hiyaulowoga. <sup>15</sup> Tu tufoidi

higayo, “Biyelisibuli Yesu gifaiwalaveleni-yo yafune giwaviwawidi, bana yafune adi tokaiwabu higa Setani.” <sup>16</sup> Kadu tufoidi nuwanuwadi hinavebauna fa'ina, higahena higayo, “Aituha fifiwalana unafaisewani-yo O ya inuba velemo'ena Yaubada againe ma anahalamanena.”

<sup>17</sup> Tu Yesu yadi nuwanuwa gihalamanena ada gigahedi gigayo, “Hai fafali ana melala tulina tulina buye hilulugaviya, medema taudiyao hinavehavaidi. Kadu hai yo'o ana kaliva tova moya'aina buye hivekwavekwageya, medema hina'abi'ota'ota be taudiyao hinavehavaidi. <sup>18</sup> Meda anafaiweya ka'i Setani tauna yana yo'o ginavenibainedi, bana tauna yana yo'o ginavehavaidi ada au yana abavehimeya ginahavaina. Omi wagahe vaita Biyelisibuli higa Setani gidafaiwalaveleku-yo yafune gadawaviwawidi. Ka'i Setani hidedemi gidafaiwalaveleku digo, ana nuwanuwa vaita tauna yana yo'o gidawaviwawidi. Hima keke hidedemi. <sup>19</sup> Hida wagahe vaita Biyelisibuli yana faiwala againe yafune gadawawidi. Ka'i Iya Biyelisibuli yana faiwala againe gawawidi digo, hakwadi yami kalivamomo faiwala givediyo yafune hiwawidi? Ka'i Biyelisibuli faiwala givedi? Keke-mo'a. Omi wagahe-kawowo ma taumiyao yami kaliva hinavenuwa'atami. <sup>20</sup> Atu ka'i Iya Yaubada yana faiwala againe yafune gawawidi amine o Yaubada yana itave'avina againe wavebutu wamimiyami ase'asemiya givehivehimeya.

<sup>21</sup> Ka'i kaliva fifiwalana yana wafuluma yana

wagiyo yana manuwa gi'ita'itave'avina, au yana lokoloko moya'aina ginada yamumuna. <sup>22</sup> Tu ka'i kaliva sa'eyana gifaiwalahegena-ma gina'ela ginamununa be ginafaiwalahegehegena, au yana fuluma yana giyo givetumaganena-ma ginanauwena ada yana yabwana ginafolakena.

<sup>23</sup> Hai kaliva keke tobohiyaku, medema nibaiku kadu hai kaliva tomuliya adi yaudi againe keke gidavelugaku, medema gihuluva vaita kaliva gidawavidi be keke hinamuliyeku.”

*Ka'i kaliva boi wayafunena ma Alu'aluwa Mahalina keke*

*ginaluvaiyeni, au yafune ginayewana.*

*Madiu 12:43-45*

<sup>24</sup> Kadu Yesu gigayo, “Ka'i yafune kaliva ginanuyabuyabuna amine, ginanauna ai'aveya abaveyawai ginalelena. Ka'i ginalele-wayoga au ginagayo, Ganana be yaku abamiyami ganuyabuyabuna-ma againe ganayewaku. <sup>25</sup> E, bana yafune ginalakayemu yana manuwa yegayegana ma ginanuhagana vaita tamo hakwadi gida'ihagihagiyeni. <sup>26</sup> Au kadu ginana tobohiyaneyao yafune seveni ginavega'auledi be badi moya'aidi kaliva hinaluvaiyena. Bana yafune nagona koyona tu yafune seveni koyomo'edi. Nagona kaliva yana miyami koyona tu muliya yafune moya'aidi hinaluvaiyena againe yana miyami ginakoyo-mo'a.”

*Gaveyao yadi wavemwamwala velemo'ena?*

27 Yesu hidedemi gigahegahe tu kwamayoku sa'eyadi yo'o agaidiya Bana againe hikova higayo, “Badi kwamayoku O hivenatune be hivehuhu amanadi yadi wavemwamwala.”

28 Tu Yesu gigayo, “Ika tu badi Yaubada bonana hinogalina be hi'abina amanadi yadi vemwamwala gavatubuga.”

*Iya'iyaya sa'eyana Yona againe Yesu gilukahi-hiyena.*

*Madiu 12:38-42 Maki 8:11-12*

29 Kaliva hiyo'oyo'o tu Yesu givebutu gigayo, “Omi kaliva tova adamoya babiya watubuyemu amanadi yami nuwanuwa koyo-mo'ena. Nimaku ana iya'iyaya walelelena. Atu keke mena iya'iyaya wana'itani. Au iya'iyaya sa'eyanaga ganavehawalemi, higa iya'iyaya Yaubada bonana ana to'awatalatalaina ana egana Yona againe gilakayemu-ma amine. 30 Fa'ina gava iya'iyaya tuwai-mo'ena Yona giyemaunena medema miNiniva fa'idiya amine, meda Iya Tohobu'ela iya'iyaya omi kaliva tova adamoya babiya watubuyemu amanadi fa'imiya. 31 Aimo tova mulina vedewayauga ana toveya fafali sa'eyana wabolimaneya ana tokaiwabu kwamayoku hinatowamidi be omi hinahawavekoyoyemi. Fa'ina tuwai-mo'ena yuwa lauveya hitauya be miIsileli yada tokaiwabu Solomoni yana vehawala nuwahuyahuyana hinanogalina. Atu tova adamoya yaku vehawala Solomoni yana vehawala gitubuhegena tu omi keke nuwanuwami wananogalini. 32 Kadu'e tova

mulina vedewayauga ana toveya miNiniva hinatowamidi be omi hinahawavekoyoyemi. Fa'ina badi miNiniva bana Yona yana laumamala hinogalina againe hivenogalena be hinuwaviladi. Tu omi wanogali! Bana Yona yana laumamala gaitoma lakahina, tu tova adamoya yaku laumamala wanogalina-ma gaitoma lakahi-mo'ena tu omi keke wadavenogaleni.” Au hidedemi Yesu yo'o gigahedi.

*Nuwada ana lamufa fa'ina Yesu gilukahihi.*

*Madiu 5:15-16, 6:22-23*

<sup>33</sup> Kadu gigayo, “Ka'i kaliva lamufa ginakabuna, keke ginasevauyeni o ka'i avaeka againe ginavetalabodani, keke. Au ana abasewadi againe ginaselakahina be badi manuweya hinaluku-ma matadi ginamahalina. <sup>34</sup> Matami vaita nuwami ana lamufa amine. Ka'i matami ita'ita'eyana amine nuwami matatabuna mahamahalina. Tu ka'i matami ita'italugana amine, nuwami matatabuna uyu'uyuyuna, nuwanuwaluga againe wamimiyami. <sup>35</sup> Medema fa'ina wana'itave'avimi nuwami vaita mahamahalina tu velemono'ena uyu'uyuyuna. <sup>36</sup> Au ka'i nuwami matatabuna mahamahalina tu keke tamo uyuyu gidadauda, au omi velemona mahamahalimiga lamufa yana mahalina gituvemahalimi amine.”

*Yesu Falisi be vehimeya ana tovehawala gihawavekoyoyedi.*

*Madiu 23:1-36*

<sup>37</sup> Yesu gilukahihi gihavaina tonagona tafatafalolodiyao adi egana Falisi kalivana



Yesu giyowanina be buye hina'a. Au giluku gi'enolukekela be gina'a. <sup>38</sup> Yesu keke gidavenimakola tu gi'au'a. Bana Falisi gi'ita-yo giyaulowoga.

<sup>39</sup> Au Kaiwabu gigahena gigayo, “Omi Falisi wa'itami, ami gowa ami nau'a kwauna wakolakolana tu hinagena bwanebwane-nena gidadauda amine, meda wowomi wa'hagihagiyena tu nuwahinagemi kai'afu nuwanuwa koyo-mo'ena againe gimaga.

<sup>40</sup> Omi kwavakwavamiyao! Yaubada keke wowomiga gidabubuni. Au kadu nuwahinagemi gibubuna fa'ina luhei wana'ihagihagiyedi.

<sup>41</sup> Gavadi gavadi ami foseya gidadauda, medema koyokoyo agaidiya wanafolakena be yami yegayega velemo'ena ma moya'aidi matadiya wanaseyemaunena.

<sup>42</sup> Atu hoiyoi omi Falisimomo! Aimo vita lakahina wananuhagana. Fa'ina vehimeya kabi'ona wa'itave'avina, higa gaitoma-kawowo naiya'au'a saikuku mawa gavadi gavadi wamagana ami kevakeva ana kivehivehimala fa'ina wavaivaina be Yaubada yana tufo waseusena, tu vehimeya lakahina keke wada'itave'avini. Omi keke wadanuwanuwa tunutunugina kadu yami nuwanuwa keke Yaubada againe wadaseuseni. Mena vehimeya lakahina nuwanuwa tunutunugina Yaubada ana nuwanuwa wada'itave'avina tu kadu vehimeya kabi'ona wana'itave'avina, higa Yaubada yana tufo wanaseusena.

<sup>43</sup> Hoiyoi omi Falisimomo! Aimo vita lakahina wananuhagana. Fa'ina nuwanuwami manuwa-

abavehawala ana egana sinagogi agaidiya abavetoga kikaiwabuna againe wanavetoga, kadu kaliva abakimokimone againe yadi wave'amohimohina hinalusiuleyemi.

<sup>44</sup> Hoiyoi omi Falisimomo! Aimo vita lakahina wanaruhagana. Fa'ina omi vaita lahi keke ana tutu'ala be kaliva hivagavagana vaita babi-kawowo, tu hinagena gilada. Meda kaliva wowomi hi'ita'itana vaita haghagimiyao tu ase'asekiya bwanene gidadauda.” Au hidedemi Yesu gigahe.

<sup>45</sup> Tu vehimeya ana tonuwahuya sa'eyana giga-hena gigayo, “Tovehawala, mena ya gahe againe vaita udagahe kadu ime kaliva koyomeyao.”

<sup>46</sup> Yesu gigayo, “Meda hoiyoi omi vehimeya ana tonuwahuya! Kadu omi aimo vita lakahina wanaruhagana. Yami vehawala tulina tulina au vitana, vaita vainuwana lakahina kaliva wadave'avalani tu taumiyao mena vehimeya ana itave'avina againe keke ma'ita wadavelugadi.

<sup>47</sup> Hoiyoi omi'iyao, aimo vita lakahina wanaruhagana! Fa'ina Yaubada bonana ana to'awatalatalaina tuwai-mo'ena bwanenemiyao hiluve'alikadi-ma adi tomohuyahuya wakidewedewena. <sup>48</sup> Hidedemi wakidewedewena fa'ina bwanenemiyao yadi luve'alika omi wahalamanena ma waseyemaunena, kadu mena yadi dewa koyona wahawaveyamumuyena. Badi Yaubada yana kaliva hiluve'alikadi tu omi adi tomohuyahuya wakidewedewena. <sup>49</sup> Au hidedemi wahuluva fa'ina tuwai-mo'ena Yaubada Tonuwahuya-mo'a gigahe gigayo,

Bonaku ana to'awatalatalaina kadu ana towahidadana agaidiya gana'iveninisedi. Tufoidi hinakivekoyodi tufoidi hinaluve'alikadi. <sup>50-51</sup> Tuwai-lokalokana Yaubada babi gimidibubuna ana toveya be hinunauwena tova adamoya badi bwanenemiyao Yaubada bonana ana to'awatalatalaina moya'aidi hiluluve'alikadi. Ebeli ana luve'alika againe hivebutu be Sakalaiya againe hinunauwena, bana atudidiga liline manuwatafalolo ana eda'awaneya hiluve'alikana amanadi. Taumadi gagahemi omi kaliva tova adamoya babiya watubuyemu-ma bwanenemiyao yadi luve'alika ana laufata omi wanawahina.

<sup>52</sup> Hoiyoi omi vehimeya ana tonuwahuya! Aimo vita lakahina wanunuhagana. Yaubada ana halamana ana kihi wa'abina. Kaliva nuwanuwadi Yaubada yana nuwanuwa hinahalamanena tu omi badi agaidiya keke wadayauni. Omi keke Yaubada ana halamana againe wadawahagegemi, ada badi nuwanuwadi hinahalamanena-ma wahawatadi." Au hidedemi Yesu vehimeya ana tonuwahuya gidakeyedi.

<sup>53-54</sup> Yesu gilukahihi gihavaina Falisi yana manuweya gihobu be gina. Tu badi Falisi kadu vehimeya ana tonuwahuya hivebutu yadi wa'ago'uga hi'awa'awalavena kadu hitoli'uye'uyena be higa yana bonalaufata againe hinavebauna.

## 12

*Keke kaliva wanamatausedi, au Yaubada.  
Madiu 10:26-31*

<sup>1</sup> Tu Falisi hidedemi hihuluva tu kaliva moya'ai-mo'edi hiyo'oyo'o be hiveve'agevagasatagona. Hiyo'oyo'o tu nagona Yesu givebutu ana tomuliya agaidiya gilukahihi gigayo, "Falisi ahenao meyadi luhei. Yadi dewa vaita isi keke kada'itani tu falawa hinagene ginauna-ma amine. Taumiyao wana'itave'avimi be yadi nuwaluga keke agaimiya ginadamana. <sup>2</sup> Yadi nuwaluga keke adifaiweya hinasevauye-vagahini. Gavadi gavadi adamoya sevesevauyana, au medema aimo kabu'avane ginayemu. Kadu kaliva yadi nuwahinage aimo kaliva moya'aidi hinahalamanena. <sup>3</sup> Medema fa'ina gavadi uyuyuya wagahekauyena, medema aimo kaliva yo'oya hinanogalina. Kadu gava bona vetawaneya wa'alakululuyena, medema aimo kabu'avane didigeya kaliva agodi lakahina hinalukahihiyena.

<sup>4</sup> Tobohiyakweyao ganagahe agaimiya. Badi wowomi hinakivekoyona be wana'alika amanadi keke wanamatausedi, tu muliya kadu keke tamo adifaiweya agaimiya gavadi hinagani. <sup>5</sup> Hakwa'adi wanamatausena-ma ganavehawalemi. E, Bana Yaubada wanamatausena, fa'ina wowomi hinaluve'alikani-yo Bana anafaiweya ginavehimeya be alu'aluwami abaga koyona againe ginahegena. Ika, gagahemi Bana'e wanamatausena. <sup>6</sup> Manuga mukumukudiyao faifi yabune amine fatadi toea luhei amine tu keke tamo manuga sa'eyana Yaubada gidavenuwauluyeni. <sup>7</sup> Tu wanogali! Utuutu

u'umiya ana kilagalaga Tamami gihalamanena. Au keke wanamatauta fa'ina Yaubada matane omi manuga wakaiwabuhegedi.”

*Hawavemogatala o vekeke Yesu fa'ine yo'o matadiya.*

*Madiu 10:32-33, 12:32, 10:19-20*

<sup>8</sup> “Kadu gagahemi hai kaliva keke ginamatauta tu yo'o matadiya ginagahe ginagayo, Iya Yesu yana kaliva, medema fa'ine Iya Tohobu'ela Yaubada yana tovenuwa'ata matadiya ganagahe ganagayo, Bana'e yaku kaliva. <sup>9</sup> Tu hai kaliva ginamatauta be yo'o matadiya ginavekekeyeku ginagayo, Iya keke Yesu yana kaliva, medema fa'ine Yaubada yana tovenuwa'ata matadiya ganamidi ganagahe ganagayo, Bana'e keke yaku kaliva.

<sup>10</sup> Gava kaliva Iya Tohobu'ela ginahawavekoyoyeku, medema yana koyona Yaubada ginayawelina, tu gava kaliva Alu'aluwa Mahalina againe ginagahe'ihawadamana, medema yana koyona Yaubada keke-mo'a ginayawelini.

<sup>11</sup> Ada omi wamuliyeku fa'ina aimo manuwa-abavehawala againe hinanauwemi be tonagona kadu tovehimeya agaidiya hinavekotumi ana toveya, keke wananuwanuwa lakahina vaita gavaimi wanabonalaufata o ka'i gavaimi wanagahe. <sup>12</sup> Fa'ina medema bai-nadi againe Alu'aluwa Mahalina gavaimi wanagahe ma gina'alavelevelemi.”

*Wakalivana kwavakwavana ana gahetalahobuhobu.*

<sup>13</sup> Yesu gilulukahihi tu kaliva sa'eyana yo'o agaidiya gigahena gigayo, "Tovehawala, kawaku unagahena be tamama la'ovina ginafolakehagihagiyena, bana tufona iya tufona."

<sup>14</sup> Tu Yesu gigayo, "Kaliva unogali! Hakwa'adi aku vehimeya giseni-yo kaliva la'ovina ganafolakeni?" <sup>15</sup> Au moya'aidi agaidiya Yesu gigahe gigayo, "Taumiyao wana'itave'avimi be italuvadiga tulina tulina keke nuwami ginavaini. Kaliva yawaina velema'ena keke lokoloko kikaiwabuna moya'aina againe gidave'inuba."

<sup>16</sup> Kadu Yesu hida gahetalahobuhobu gilukahihiyena gigayo, "Wakalivana sa'eyana gimiyami yana babi againe a'a moya'aina giyaudi. <sup>17</sup> Au nuwahinagene ginuwanuwa gigayo, O hima yaku faha lakahina be yaku bolu gimaga-mo'a. Gavaimi ganagani? <sup>18</sup> Au tauna yana nuwahinage gifatana gigayo, O bolu kabi'ona ganayawelini tu velugana lakahina ganayogona be medema againe yaku faha yaku lokoloko moya'aina gana'ive'ave'ahina. <sup>19</sup> Ada agaikuya ganagahe ganagayo, Keke fwaya! Yaku faha yaku lokoloko lakahina kadu moya'ai-mo'ena, malamala moya'aina akufata. Yaku wagakahikahi yaku wavemwamwala ganamiyami, gana'a'a-mo'a ganayuyu-mo'a. Au hidedemi gigahe. <sup>20</sup> Tu wakalivana yana nuwahinage Yaubada gifatana gigayo, O kwavakwava! Adamo'uya-mo'a ya tova ginahavaina be mene gaitoma moya'aina tauni fa'iniya ukidewedewena-ma ginavela'ova."

<sup>21</sup> Ada Yesu yana gahetalahobuhobu hidedeiya giluyabuna gigayo, “Gaveyao babi ana kikaiwabu taudiyao fa'idiya hi'ive'ave'ahina, medema vaita wakalivana kwavakwavana amine. Badi kalivai-dina keke yadi walokoloko Yaubada againe.”

*Yesu gigahe vaita Tamada yana itave'avina  
kanavetumaganena.*

*Madiu 6:25-34*

<sup>22</sup> Tu Yesu ana tomuliya gigahedi gigayo, “Hidema fa'ina gagahemi, yami miyami fa'ina keke wanavenuwanauna vaita gavadi wana'u'ani. Kadu kaleko fa'ina keke wanavenuwanauna vaita gavadi againe wanelifi. <sup>23</sup> Au yawaimi gaitoma lakahina tu a'a gaitoma kabi'ona, kadu wowomi gaitoma lakahina tu kaleko gaitoma kabi'ona. <sup>24</sup> Bwayobwayo yadi dewa wananuwenuwena. Keke hidafahafaha, keke hidayauyaudi kadu keke kweda hidayogoyogoni-yo a'a hidasesewewadi tu au ai'adi Yaubada adiga giveleveledi. Ada Yaubada yana itave'avina omi'iyao be manuga agaidiya. Tu omi ami itave'avina manuga adi itave'avina gitubuhegena. <sup>25</sup> Kadu hakwadi agaimiya unavenuwanauna-yo afaiweya yawaini ana etowava babiya unakivetubugini? Keke-mo'a afaiweya. <sup>26</sup> Ka'i mena gaitoma kabisona keke afaiweya gavadi-yo uvenuwanauna mali gaitoma fa'idiya?

<sup>27</sup> Falafalawasi wala'aiya hikabukabu-ma wananuwenuwedi. Keke hidafifaisewa, keke doki hida'alulaua. Tu gagahemi bana tokaiwabu ana

egana Solomoni ana vaigau kikaiwabu-mo'ena tu hida falafalawasi adi vaigau bana ana vaigau gitubuhegena. <sup>28</sup> E, Yaubada isisi'u givevigauna, medema tova adamoya wala'aiya gikabu tu bogiyadi hinatuna be gina'alahina. Yaubada isisi'u givevigauna tu medema gaitoma kabi'ona. Tu omi'iyao ma gaitoma lakahi-mo'emī fa'ina, gina'itave'avi-mo'emī ami vaigau ginavelemi. Wona velemona yami vetumagana kabi'ona. <sup>29</sup> Amiga fa'ina keke wananuwanuwa vaita ka'i gavadi wana'ani o gava bwai wanayuni, kadu gaitoma moya'aina againe keke nuwami ginanauna. <sup>30</sup> Au fafali tulina tulina kalivaidina Yaubada keke hidahalamaneni-ma hida gaitoma fa'ina hinuwanuwa lakahina, kadu tova moya'aina hilelelena. Tu omi'iyao ma nuwanuwami hida gaitoma yami miya haghagina fa'ina Tamami a gihalamanena. <sup>31</sup> Ka'i Yaubada yana abavehimeya ana nuwanuwa fa'ina wanamidihawahegemi, au Bana'e gina'ita'itave'avimi amiga ami bwai ami vaigau ginavelelelemi be wanamiyami yamumuna.

*Yesu lobama ana lokoloko fa'ina gilukahihi.*

*Madiu 6:19-21*

<sup>32</sup> Yaku sifi, keke wanamatauta. Au ai'adi keke moya'aimi tu Tamami givenuwadadanemi be yami wakaiwabu Bana buye wanavehimeya. <sup>33</sup> Taumiyao yami lokoloko wanakimonevedamarena be fatana koyokoyo agaidiya wanafolakena. Au ami laufata lobama ana lokoloko wanavaina, lokoloko-nadi miyamiya-vagahina. Wesede



againé tokai'afu keke ginaki'afuni kadu tumotumo keke hina'onani, au fose vewabana againé ginadauda higa aimo keke ginakoyo. <sup>34</sup> Ada au ha'againé yami lokolokofou ginadauda, au medede againé nuwami ginanunauyena tova moya'aina.

*Tofaisewa yadi kauveya himiyamiyabodana.*

<sup>35-36</sup> Tu wanakidewadewa be yami Kaiwabu yana yewa'ela fa'ina wanamiyabodana. Tofaisewa dibudibumuhigidiyao wanave'u'uledi. Kauveya sa'eyana gina nagi ana avemwamwala againé be ginayewana, ada yana tofaisewa hikidewadewa adi kaleko hiluhivigena, yadi lamufa hikabuna be yadi kauveya fa'ina himiyamiyaboda. Ginalakayemu-yo wanafali againé ginakifisifisi'a auhe'amanadi wana hinayauna be ginaluku. Meda anafaiweya kadu omi wanamiyamiyaboda. <sup>37</sup> Tofaisewa gaveyao matadi keke gidaneganega au hivanevanenega tu yadi kauveya gilakayemu, medema yadi vemwamwala gavatubuga! Wona velemona gagahemi yadi kauveya tauna ana kaleko ginaluhivigena, adi ivi ginayavelina, adiga ginakidewedewena be hina'a. <sup>38</sup> Ka'i yadi kauveya yana ela bogi nafone o ka'i kamukamu ginakwage ada medema bai-nadi yana tofaisewa aimo hilulauboda, au yadi vemwamwala gavatubuga! <sup>39</sup> Atu hidedemi wanahalamanena. Ka'i tonimanuwa tokai'afu yana ela ana kauwana gidahalamanena digo, keke matana gidalowoni au gidalulauboda

be tokai'afu keke anafaiweya gidaluku yana manuweya. <sup>40</sup> Meda anafaiweya omi taumiyao wana'itave'avimi be wanalulauboda. Fa'ina gava kauwana Iya Tohobu'ela ganayewa'ela ma keke wadahamaneni. Ka'i wanamiya-kawowo wanagayo, Keke adamoya gina'ela, au medema tovai-nadi ganavefuta'ami.” Au hidedemi Yesu givenuwa'atadi.

*Tofaisewa bonabona'abina o dibudibutoyogina ana gahetalahobuhobu.*

*Madiu 24:45-51*

<sup>41</sup> Ada Fita gitolilualuva gigayo, “Kauveya, mena gahetalahobuhobu ulukahihiyena-ma gaveyao fa'idiya? Ka'i ime tomuliyagaga fa'imeya o ka'i kaliva moya'aima fa'imeya?”

<sup>42</sup> Ada Kaiwabu Yesu gigayo, “Gavaiyami? Gava tofaisewa ginadewadewa be bana fa'ine hinagahe hinagayo, Wada tofaisewa bonabona'abina yana wanuwahuya gifififaisewa? Yana kauveya ginavegidena be ginagahena ginagayo, Iya ganana tu o aku agetoga una'itave'avidi, aiyeta sa'eyana sa'eyana adiga unaveleveledi. <sup>43</sup> Ka'i gavaimi yana taubada givehimeyena medemi ginadewadewa tu yana taubada ginayewa'ela bonana bana gl'abi'abina-ma gina'itana, au bana tofaisewai-nadi vemwamwala ginanuhagana.

<sup>44</sup> Gagahe velemono'ena agaimiya kaliva lakahina yana lokoloko matatabuna ana to'itave'avina bana tofaisewai-nadi ginasena. <sup>45</sup> Tu ka'i bana tofaisewai-nadi nuwahingene ginagahe ginagayo, Hima yaku taubada givekwalu

lakahina, ka'i keke ginamadu'ela, au ginavebutu agetoga kaliva vevine ginamunukoyokoyodi kadu gina'a'a-fa'ila gufa laulaugina ginayuyu-fa'ila yo u'una ginavekwavakwava. <sup>46</sup> E, ka'i tofaisewa hidede amine ginahuluva, au yana taubada yana ela againe ginavefuta'ana. Yana aiyeta o ka'i yana kauwana tofaisewa keke gidahalamaneni tu yana taubada ginayewa'ela, ada au ginamunukoyokoyona ada ginahegenauwena be badi to'idibutoyoga adi matahiwadi amine bana ginanuhagana.

<sup>47</sup> Bana tofaisewa yana taubada yana nuwanuwa gihalamanena tu keke gidakidewadewa be nuwanuwai-nadi amine gidahuluva, bana kalivai-nadi ginamunukoyokoyona. <sup>48</sup> Tu gava tofaisewa yana taubada yana nuwanuwa keke gidahalamaneni ada tamo koyona gifaisewana, medema ginamununa kabi'ona. Gaveyao moya'aidi agaidiya Yaubada abavehimeya lakahina ginasena, medema gilubodana be yadi faisewa yamumu-mo'ena hinaseyemaunena. Kadu gava kaliva againe Yaubada faisewa lakahina amine ginavelena, medema yana faisewa guwana lakahina amine ginaveleyewena.” Au hidedemi Yesu gigahe.

*Yesu gihobu'ela be venibaina babiya ginasena.*

*Madiu 10:34-36*

<sup>49</sup> Kadu Yesu gigayo, “Gahobu'ela be higa ai'ala'alata babiya gana'aliyeni-yo tomiyababi matahiwadi hinanuhagana. Nuwanuwaku lakahina mena aku vehimeya

ganamaduluyabuna. <sup>50</sup> Bafitaiso sa'eyana ganaruhagana higa tagiya aulolo againe hina'utuviku. Yaku ase'u'aulolo gavatubuga ganahunauwena bafitaiso-nadi ginahavaina ana maka. <sup>51</sup> Ka'i mene wanuwauwa vaita gadahobu'ela-yo niwalova babiya gadaseni? Keke niwalova ganaseni fa'ina gada'ela, keke. Au Iya gahobu'ela be venibaina ginalakayemu fa'ina. <sup>52</sup> Adamoya be ginahunauwena tova mulina ka'i manuwa sa'eyana hinagene kaliva faifi hinamiyami, kaliva adi'iselu adi'itoto buye hinavekwageya, kadu kaliva adi'itoto adi'iselu hinavenibainedi. <sup>53</sup> Yadi venibaina hidede amine. Kaliva natuna kaliva againe ginavenibaina, meda natuna tamana againe ginavenibaina. Kadu kwamayoku natudi kwamayoku againe hinavenibaina, meda natudi hinana agaidiya ginavenibaina. Kadu kwamayoku be lawadi buye hinave'avenivenibaina. E, aku vetumagana fa'ina hidedemi hinavenibaina.” Au hidedemi Yesu givenuwa'atadi.

*Aituha tulina tulina ana iya'iyaya ana halamana fa'ina*

*Yesu gilukahihi.*

*Madiu 16:2-3, 5:25-26*

<sup>54</sup> Kadu yo'oyo'o agaidiya Yesu gigahe gigayo, “Buhibuhi oya gikevana ma wa'itana againe wagayo, Hima wehi ginalugaga. Ada au gilugaga. <sup>55</sup> Ada bolimana gimadu ma wa'ayaunena againe wagayo, Hima kauwana lakahina ginakabuna.

Ada au gikabuna. <sup>56</sup> Omi meyami lagalagan-ina! Wehi be kauwana adi iya'iyaya waha-lamanena. Tu gavadi-yo vita lakahina hida tovai-nadi ginalakayemu-ma ana iya'iyaya keke wada'itahalamanedi?

<sup>57</sup> Kadu'e gavadi-yo dewa tunutunugina keke taumiyao wadanuwenuweni-yo medede amine wadahuluva? <sup>58</sup> Ka'i kaliva sa'eyana ginasimane be tovedewayauga againe buye wanana, au edeya wananauna tu unagaluvaluva be wanaveyao. Ka'i keke wanamaduveyao, tovedewayauga againe ginasimadumaduge ada tovedewayauga filisimani nimadiya ginaseni be deliya hinanauwe. <sup>59</sup> Gagahe againiya, keke hinamaduyau. Tu nagona a laufata unase-'owona muliya hinayau.” Au hidedemi Yesu gigahe.

## 13

### *Ka'i keke nuwawilana digo, alika.*

<sup>1</sup> Tu medema tovai-nadi kaliva tufoidi hi'ela miGalili fa'idiya Yesu hivenuwa'atana, higa yomuyomu yadi abaveyao fa'ina Yaubada matane hiseusena tu Failato yana vehimeya againe tolugaviya hiluve'alikadi, ada badi dayagidi kadu yomuyomu dayagidi hive'atutamo'aina. <sup>2</sup> Au Yesu gigahedi gigayo, “Gavaimi wanuwanuwa? Ka'i badi hidevama miGalili tolugaviya hiluve'alikadi-ma fa'ina omi wavaita miGalili velugadiyao moya'aidi dewa koyona againe hidatubuhegedi? <sup>3</sup> Gagahemi keke medede amine. Atu ka'i omi keke wananuwawilani, kadu omi moya'aimi wana'alika. <sup>4</sup> Kadu kaliva eitini valeyadi wanogalina, higa manuwa

tunugi-vadavada'aina Sailomu againe gibe'u be gi'alatagodi ada hi'alika-'owoga. Gavaiyami? Badi kalivai-dina hidede amine hi'alika fa'ina, ka'i omi wavaita miYelusalema velugadiyao moya'aidi dewa koyona againe hitubuhegedi? <sup>5</sup> Gagahemi keke medede amine. Atu ka'i omi keke wananuwavilami, kadu omi moya'aimi wana'alika.”

*Yaubada keke nuwanuwana kaliva*

*ginamaduvematahiwadiyedi ma Yesu givehawala.*

<sup>6</sup> Kadu gahetalahobuhobu sa'eyana badi agaidiya Yesu gilukahihiyena gigayo, “Kaliva sa'eyana ai veguveguwana ana iviya fiki gifahana be gitabo. Tova moya'aina ginauna guwana gilelelena tu keke tamo gidaseni. <sup>7</sup> Medema fa'ina faha ana to'itave'avina againe gigahe gigayo, U'ita, malamala tohiye ga'elayewayewaku tu fiki guwana hida ai againe galele-wayoga. Au unatalana. Babi yamumuna gi'a'a-kawowona.

<sup>8</sup> Tu to'itave'avina gigayo, Kauveya, gimiya malamala sa'eya-mo'ena be'ena ai inubana bu-lumakau uledi buye ganatalavetauna. <sup>9</sup> Ka'i mala-mala yuwa gi'ela'ela againe ginayoyo digo, au yamumuna. Tu keke digo, au kanatalana.” Gahetalahobuhobu au hidede amine.

*Kwamayoku ginukwau'ubu'ubu-ma Yesu gikiveyamumuna.*

10-11 Tu sabati sa'eyana againe Yesu manuwa-abavehawala againe givehavehawala tu kwamayoku sa'eyana gimiyami, yafune giluvaiyeni-yo malamala eitini ginunukwau'ubu'ubu, mididimo'a keke anafaiweya. <sup>12</sup> Yesu kwamayoku gi'itayo gikovana be gi'ela ada gigahena gigayo, “Kwamayoku, ya aulolo a gihavaina.” <sup>13</sup> Gigahe-yo ni mana bana againe gisena ada auhe'ama gimididimo'a be Yaubada gihawadavadavana.

<sup>14</sup> Tu manuwa-abavehawala ana tovehimeya ginuwakoyo, fa'ina sabati againe Yesu kwamayoku gisiveyawana. Au yo'o gigahedi gigayo, “Faisewa ana aiyeta sikisi hidadauda. Medema aiyetai-dina agaidiya siveyawa fa'ina wana'ela. Keke sabati againe wana'ela.”

<sup>15</sup> Kaiwabu gibonalaufata gigayo, “Omi meyami luhei. Wa'ita, moya'aimi sabati againe yami yomuyomu wayaudi-yo wasehobuyedi be gufa wanaveyudi fa'ina. <sup>16</sup> Au hidedemi yami yomuyomu wahuluhuluvidi tu gavaiyami? Hida kwamayoku Abelahamo bwanenena ma Setani giyogona be ginunauwena malamala eitini. Ka'i gilubodana be yana aulolo giyogona-ma sabati againe kanayauna o ka'i keke? Makewa'e gilubodana.”

<sup>17</sup> Yesu au hidedemi gigahe-yo nibaineyao moya'aidi hiwowomumu tu yo'oyo'o yana gugai yaulyaulowogidi fa'idiya hivemwamwala.

*Yaubada yana itave'avina vaita masitada isi*

*yadi tubutubuga amine.*

*Madiu 13:31-33 Maki 4:30-32*

<sup>18</sup> Kadu Yesu gitolilualuva gigayo, “Kaliva Yaubada yana itave'avina againe himimiyami be ase'asediya givehivehimeya-ma yadi tubutubuga gavaiya'amine? Gavadi ana tubutubuga amine ganahawaluveluveni? <sup>19</sup> Me masitada yana tabo amine kanalukahihiyena. Masitada nafona kabikabi'ona tu kaliva givaina ada yana faheya gifahana be gikabu. Gikabukabu tu give'aihala ada laganina againe manuga adi uba hiyogona.” Au hidedemi Yesu gigahetalahobuhobu.

<sup>20</sup> Kadu gigahe-havagi gigayo, “Kaliva Yaubada yana itave'avina againe himimiyami be ase'asediya givehivehimeya-ma gavadi ana tubutubuga amine ganahawaluveluvedi? <sup>21</sup> Me yadi tubutubuga vaita isi amine. Kwamayoku sa'eyadi isi hivaina be falawa wanau'ana tohiye hivilana be falawa hinagene ginauna tu beledi matatabuna gitubuga.” Hidedemi Yesu gigahe.

*Lobama ana eda'awana kabi'ona.  
Madiu 7:13-14,21-23*

<sup>22</sup> Yesu ginauna Yelusalema tu melala lakahidi be kabi'odi agaidiya givehavehawalana. <sup>23</sup> Ada kaliva sa'eyana gitolilueluvena gigayo, “Kauveya, ka'i Yaubada kaliva tufoidiga ginakibababaledi o ka'i moya'aida?”

<sup>24</sup> Yesu gigahedi gigayo, “Wanavedivediwe be lobama ana eda'awana kabi'ona againe wanaluku. Wa'ita, gagahemi kaliva moya'aidi hinagalualuva be hinaluku tu hinamadu'ava. <sup>25</sup> Fa'ina lobama ana tovehimeya ginatowamidi be wana ahe ginafalini-yo au wana kwaune wanamidi wanakifisifisi'a wanagayo, Kauveya,



wanafali uyau be aluku. Tu bana ginabonalaufata ginagayo, Omi kaliva gaveyao ma keke gadahalamanemi?

<sup>26</sup> Au omi wanavebutu wanagayo, O buye ka'au'a kayuyu ada yama melala againe uvehave-hawala ma kalivai-mana.

<sup>27</sup> Tu Bana ginagayo, Gagahemi omi kaliva gaveyao ma keke gadahalamanemi. Au wana, omi moya'aimi tokoyona.

<sup>28</sup> E, aimo Yaubada yana itave'avina lobameya ide miIsileli bwanenedeyao Abelahamo Aisake Yakobu kadu Yaubada bonana ana to'awatalatalaina moya'aidi wana'itadi. Badi wana'itadi tu omi'iyao ma ginawavimi be kabu'avane wanamiyami, ada wanatagitagi lakahina, kumimi wanahobe'uwana nuwami ginavekubokubo. <sup>29</sup> Ada kaliva walaube'uya wa'oyeya wabolimaneya wayavalaseya hina'ela, Yaubada yana abageya hinaluku be yana tolameya hinavetoga yana avemwamwala hina'ana. <sup>30</sup> Ika, fanifanidiyao vaita wai hidamulini-ma wai hinanagona tu kikaiwabudiyao vaita wai hidanagoni-ma wai hinamulina.”

*Yesu miYelusalema yadi kilowa fa'ina gitagi'uvadi.*

*Madiu 23:37-39*

<sup>31</sup> Yesu hidedemi gigahe-yo medema bainadi tonagona tafatafalolodiyao adi egana Falisi tufoidi Bana againe hi'ela higayo, “Helodi nuwanuwana O ginluve'alika fa'ina unana mali fafaliya.”

<sup>32</sup> Yesu gigahedi gigayo, “Adamoya kadu bogiyadi yafune gawaviwavidu to'aulolo gasisiveyawadi tu tova anaveto yaku faisewa ganavehavaina. Au wanana hida yaku gahe wadema to'aikau vaita galu'eta ana egana fokesi amine wanalukahihiyena. <sup>33</sup> Hidedemi wanagahena tu iya'eku ma gilubodaku be adamoya bogiyadi kadu aiyeta anaveto yakuna Yelusalema againe gananunauwena. Yaubada bonana ana to'awatalatalaina moya'aidi Yelusalema againe hiluve'alikadi ada kadu Iya gilubodaku be medede againe gana'alika.

<sup>34</sup> Ho miYelusalema miYelusalema, omi Yaubada bonana ana to'awatalatalaina waluve'alikadi kadu yana tolaumamala omi agaimiya gi'iveninisedi-ma watutu'uve'alikadi. Kamukamu natudiyao hikokodi ofadiya hilutagodi amine, meda tova a gavaiyehi Iya nuwanuwaku vaita gadakova-vaga'auhimi be gadalugolegolemi tu omi wakiloweku. <sup>35</sup> Wa'ita, Yaubada ginanuyabuyabumi be ami tolugolagola keke amine wanamiyami. Au gagahemi aimo keke wana'itaku wanamiyami wananunauwena tu gana'ela-havagi yo wanagahe wanagayo, Bana Kaiwabu ana eganeya gi'ela-ma kanahawadavadavana.” Au hidedemi Yesu gigahe.

## 14

*Yesu kaliva wowona gitubukoyo-ma gisiveyawana.*

<sup>1</sup> Tu sabati sa'eyana Yesu gina tonagona tafatafalolodiyao adi egana Falisi adi yo'o kalivana kikaiwabuna againe be gina'a, ada kaliva hi'itakwanekwanena. <sup>2</sup> Ada medema manuwai-nadi againe kaliva sa'eyana gimiyami, wowona gitubukoyo. <sup>3</sup> Au Yesu badi Falisi kadu Mosese yana vehimeya ana tonuwahuya gitoliloveluvedi gigayo, “Ka'i yada buki-vehimeya gihawahegeda be sabati againe kaliva kanasiveyawana o ka'i keke?” <sup>4</sup> Tu hive'amata. Au Yesu kaliva gi'abina be gisiveyawana ada gigahena gigayo, “Au unana.”

<sup>5</sup> Kadu gitoliloveluvedi gigayo, “Ka'i kaliva sa'eyana agaimiya sabati againe natu o ka'i ya yomuyomu folufolu againe ginabe'u, sabati nonogana auhe'amanadi unasilakahina o ka'i keke? Makewa'e unasilakahina.” <sup>6</sup> Au hidedemi gigahe tu keke tamo bonalaufata adifaiweya.

*Nuwahobu kadu nuwadoga fa'ina Yesu give-hawala.*

<sup>7</sup> Kaliva Yesu buye Falisi againe hi'ela be hina'a tu wakawaka tufoidi abavetoga kikaiwabuna againe himaduhiyoto-ma gi'itadiyo gigahetalahobuhobuyedi. <sup>8-9</sup> Gigayo, “Ka'i tamo hakwadi kwamayoku kedukeduna ginatagovena againe ginayowani digo, keke didiga'u'uya unahiyoto. Ka'i mededei unahiyoto tu ka'i kaliva velugana gikaiwabuhege-ma muliya ginalakayemu, ada toni'inuba ami'iselu giyowanimi-ma againiya gina'ela ginagayo, Hei uhobu, didiga'u'u kaliva lakahina ana

ivi. Ka'i gidawavi, o udawowomumu udana didiga kumine udahiyoto. <sup>10</sup> Atu tamo hakwadi ginayowani againe, didiga kumine unahiyoto be higa aimo toni'inuba againiya gina'ela ginagayo, Kusebo, u'ela didiga'u'u againe unahiyoto. Ada au hidede amine wakawaka velugadiyao moya'aidi matadiya kaiwabu unanuhagana. <sup>11</sup> Fa'ina hai kaliva tauna ana egana ginakilakahina, Yaubada mena kaliva ginakivewowomumuna. Hai kaliva tauna ginanuwahobu, medema ana egana Yaubada ginakilakahina.” Au hidedemi Yesu gigahedi.

<sup>12</sup> Tu kaliva Yesu au fa'ina giyowaninama againe gigahe gigayo, “Avemwamwala unasena ana toveya, keke a kusebomomo o tobohiyamomo, keke ya yo'o kalivai-dina o ka'i wakalivadiyao unayowanidi. Ka'i badi unayowanidi digo, aimo ya nuwakabubu hinafatana ada au a laufata unavaina. <sup>13</sup> Atu avemwamwala unasena ana toveya, koyokoyo felafela tonube'ube'u tomatakoyo unayowanidi. <sup>14</sup> Badi keke adifaiweya ya nuwakabubu hinafatani fa'ina, vemwamwala gavatubuga ma unanuhagana. Aimo tova mulina Yaubada badi yegayegadiyao alikeya ginasivemidididi ana toveya, a laufata ginavele.” Au hidedemi Yesu gigahe.

*Avemwamwala lakahina ana gahetala-hobuhobu.*

*Madiu 22:1-10*

15 Tu kaliva sa'eyana Yesu buye hi'au'a-ma yana gahe ginogalini-yo gigahena gigayo, “Badi aimo Yaubada yana abageya hinaluku be yana tolameya hinavetoga yana avemwamwala hina'ana-ma yadi vemwamwala gavatubuga!”

16 Yesu gahetalahobuhobu amine gigahena gigayo, “Kaliva sa'eyana avemwamwala lakahina gisena ada kaliva moya'aidi giyowanidi.

17 Avemwamwala ana tova gilakayemu againe, yana tomaduyowayowana gi'iveninisena be kaliva avemwamwala againe giyowanidi-ma ginagahenauwedi ginagayo, Kidewadewa ahe gihavaina, au wana'ela.

18 Atu moya'aidi hivebutu gavadi gavadi yadi nuwanuwa gisebodana fa'ina hiyakayakahina, yadi gahe leleleya. Kaliva nagona gigahe gigayo, Adamoya babi sa'eyana gakimonena ada gilubodaku be ganana gana'itana fa'ina siule lakahina keke akufaiweya gana'ela.

19 Kadu kaliva anavelu gigayo, Adamoya okesi luhei luhei adi yo'o matatabuna teni gakimoned be gananauna ganagaluveluved i abakeyova hinatai-hagihagiyena o ka'i keke. Fa'ina siule lakahina, keke akufaiweya gana'ela.

20 Kadu sa'eyana ma gigayo, Adamoya kwamayoku ganagina fa'ina keke akufaiweya gana'ela.

21 Ada tomaduyowayowana yana kauveya againe giyewana kaliva bonadi gilukahihiyena. Au toni'inuba yana wanuwakoyo ana agetoga gigahena gigayo, Unamaduna melala kadu eda agaidiya be koyokoyo felafela tonube'ube'u

tomatakoyo unavega'auledi be hinaluku yaku manuweya.

<sup>22</sup> Ada tomaduyowayowana gina be giyewana yana kauveya gigahena gigayo, O uvehimeya amine kaliva ahe gavega'auledi tu yo'o aimo kabi'ona.

<sup>23</sup> Au kauveya ana agetoga gigahena gigayo, Kadu unana eda lakahina againe ada eda kabi'ona wala'aiya kaliva unasive'auyedi be hina'ela yaku manawa hinavemagana. <sup>24</sup> Wona velemona gagahe badi kalivai-dina gamidiyowanidi-ma agaidiya keke tamo hakwadi yaku avemwamwala a'ana kasimina ginavaini.” Au hidedemi Yesu yana gahetalahobuhobu.

*Yesu ana vetomuliya keke ihayana.*

*Madiu 10:37-38*

<sup>25-26</sup> Tu yo'oyo'o Yesu buye hinauna ada badi agaidiya gihagavilana gigahedi gigayo, “Gava kaliva Iya agaikuya una'ela be unavetomuliya, giluboda be tama hina vavine natumomo tobohiyamomo noumomo unavenikohiyedi kadu tauni ya nuwanuwa unavenikohiyeni-yo nuwa agaikuya unase-'owona. Ka'i keke hidede amine unavenikohiyedi, kadu keke afaiweya agaikuya unavetomuliya. <sup>27</sup> Kadu hai kaliva keke nuwanuwana tavagikuya ginanunaudadana kadu Iya fa'ikuya alika againe ginahawahegeni, medema keke anafaiweya Iya agaikuya ginavetomuliya.

<sup>28</sup> Ka'i nuwanuwami vetomuliya digo, nag-ona wananuwanuwa-hagihagi ka'i amifaiweya o

ka'i keke. Wa'ita, ka'i kaliva sa'eyana agaimiya nuwanuwana manawa tunugi-vadavada'aina ginakivemididina, gavaimi ginaga? Nagona yana mani ginahawana be ginahalamanena ka'i mani manawa anafata o ka'i keke. <sup>29-30</sup> Ka'i yana mani fa'ina keke ginanuwanuwa-hagihagi, tu yana manawa ginayalalakahina, au yana mani ginahavaina fa'ina fa'isewa gina'ilovena. Ada au gaveyao moya'aidi hina'ita-yo hinahawave-laigena hinagayo, Wa'ita, wama kaliva givebutu manawa gidayogona tu gimaduhegena.

<sup>31</sup> Kadu'e, ka'i tokaiwabu sa'eyana mali tokaiwabu yana yo'o 20,000 buye gaviya fa'ina hi'ela'ela ma valeyadi ginanogalina, gavaimi ginaga? Nagona ginanuwanuwa ka'i yana yo'o 10,000 anafaiweya yo'o 20,000 hinalugaviyadi o ka'i keke. <sup>32</sup> Ka'i keke adifaiweya digo, tomaduyowayowana gina'iveninisedi hinana mali tokaiwabu hinamidilauveni tu hinakova hinagayo, Ama tokaiwabu nuwanuwana veyao. <sup>33</sup> Meda anafaiweya ka'i keke wanahawahega be yami gaitoma moya'aidi Iya fa'ikuya wanavekwaulaugedi, kadu keke amifaiweya Iya agaikuya wanavetomuliya.

*Yesu givehawala ana muliya ana venuwakibok-ibo fa'ina.*

*Madiu 5:13 Maki 9:50*

<sup>34</sup> Lehaga gaitoma hagihagina. Tu ka'i lehaga yana digadigaga gidahavaina digo, keke adafaiweya kadakivedigagi-havagileni, au keke-mo'a.

35 Ka'i lehaga ana digadigaga keke, a'a o ke-vakeva ana iveyamumu fa'ina yana faisewa keke. Au kadahegena. Omi watagami bonaku wadav-enogalena.” Au hidedemi Yesu givehawala.

## 15

*Kaliva sifi sa'eyana ginuhegena-ma ana gahetalahobuhobu.*

*Madiu 18:12-14*

<sup>1</sup> Tova sa'eyana takesi ana toyaudi kadu tokoyona velugadiyao moya'aidi Yesu againe hiyo'oyo'o be bonana hinanogalina. <sup>2</sup> Tu tonagona tafatafalolodiyao adi egana Falisi kadu Mosese yana vehimeya ana tovehawala hivebutu hi'alawoluwolu higayo, “Medema kaliva tokoyona givevetobohianedi buye hi'au'a.”

<sup>3-4</sup> Au hidede amine higawe fa'ina Yesu hida gahetalahobuhobu agaidiya gilukahihiyena gigayo, “Ka'i kaliva sa'eyana agaimiya yana sifi 100 tu sa'eyana gidanuhegena, gavaimi gidagani? Au sifi 99 ubuleya gidanuyabuyabudi tu sifi ginuhegena-ma gidalelena. Gidalelelena gidanunauwena tu gidanuhagana. <sup>5</sup> Ada ahe gidanuhagana againe, gida'avalana be yana wavemwamwala gidanauwena yana manuweya. <sup>6</sup> Ada ahe gidayemu-yo tobohianeyao be yana yo'o gidakovavaga'auhidi gidagahedi gidagayo, Omi buye kanavemwamwala, fa'ina yaku sifi ganuhegena-ma ahe ganuhagana. <sup>7</sup> Gagahemi meda anafaiweya tokoyona sa'eyana yana nuwavilana fa'ina vemwamwala lakahi-mo'ena lobameya ginalakayemu, tu yamumudiyao 99 au



yegayegadiyao fa'ina keke hidanuwavilani-ma badi fa'idiya vemwamwala ma'ita.” Au hidedemi Yesu gigahetalahobuhobu.

*Kwamayoku yadi mani siliva teni tu sa'eyana*

*hinuhegena-ma ana gahetalahobuhobu.*

<sup>8</sup> Kadu Yesu gigayo, “Ka'i kwamayoku yadi siliva teni tu sa'eyana hidanuhegena digo, gavaimi hidagani? Lamufa hidakabuna manuwa matatabuna hidagili-'owona be hidalelena. Hidalele-hagihagiyena hidanunauwena tu hidanuhagana. <sup>9</sup> Ada ahe hidanuhagana againe tobohiyadiyao be yadi yo'o hidakovavaga'auhidi hidagayo, Omi buye kanavemwamwala fa'ina yama mani siliva anuhegena-ma ahe anuhagana. <sup>10</sup> Gagahemi meda anafaiweya tokoyona sa'eyana yana nuwavilana fa'ina Yaubada yana tovenuwa'ata hivemwamwala.”

*Yaubada yana hinekalikali tokoyona fa'idiya Yesu givehawala.*

<sup>11</sup> Kadu gahetalahobuhobu anaveto Yesu gilukahihiyena gigayo, “Kaliva sa'eyana natuneyao luhei. <sup>12</sup> Ada kwamaneya tamana againe gigahe gigayo, Kamaku, lokoloko aku du'u ma udaveleku. Au yana lokoloko natuneyao agaidiya gifolakena.

<sup>13</sup> Himiyami aiyeta keke moya'aina tu kwamaneya yana lokoloko moya'aina givagakokona, gilowoga be gina lauveya mali fafali againe gimiyami. Medede againe gakahikahi tulina tulina agaidiya yana mani giluyauyaulena. <sup>14</sup> Tu

ahe yana mani givehavaidi-yo mena fafali-nadi againe lokabudubudula gilakayemu, au givebutu mafu gilaulauna anaga keke. <sup>15</sup> Au gina melalai-nadi ana kaliva-lakata sa'eyana againe give'agetoga. Ada givegidena be ginana yana babi sa'eyana againe yana bawe gina'itave'avidu. <sup>16</sup> Ada nuwanuwana lakahina bawe adi bini a'a fwayafwayana againe gina'ahiyauwa tu keke tamo hakwadi ma'i a'a gidaveleni.

<sup>17</sup> Gimiyami tu nuwanuwa ayaugina a givaina be gi'ayaunena againe gigayo, Kwavakwavaku. Kamaku yana tofaisewa yuwa adi waga tu iya'eku ma hidedei mafulaugeya gana'alika. <sup>18</sup> Ganamidi be kamaku againe ganana ada bana againe ganagahe ganagayo, Kamaku ahe gakoyo Yaubada matane kadu o mataniya. <sup>19</sup> Keke gidalubodaku be unahawavenatuneku. Au unavehimeyeku be ya tofaisewa amine ganamiyami. Au hidedemi tauna nuwahnage gigahe. <sup>20</sup> Au gitowamidi be gilowoga tamana againe.

Aimo lauveya gi'ela'ela tu tamana gi'itana be gihinekalikaliena. Au gimadu gi'atulauhina giveyaugina.

<sup>21</sup> Au kwamana gigahe gigayo, Kamaku, Yaubada matane kadu o mataniya ahe gakoyo ada keke gidalubodaku be unahawavenatuneku.

<sup>22</sup> Au hidedemi gigahe tu tamana ana agetoga gigahedi gigayo, Wamadu, vaigau yamumu-mo'ena wa'aliye be wave'oseni, kadu nimalukabubu nimane wahifo, ageyafayafa agene waseni. <sup>23</sup> Bulumakau natudi veve'ahiyauwana wa'aliyeni be wamunu.

Avemwamwala againe kanavemwamwalamo'a. <sup>24</sup> Fa'ina natuku vaita gida'alika tu ahe giyemu-havagi, kadu vaita gadanuhegeni tu ahe ganuhagana. Au hivebutu hikidewadewa be hivemwamwala.

<sup>25</sup> Badi yadi wavemwamwala hi'au'a tu tomo'ainagona faheya gimiyami be giyewayewana melaleya. Manuwa liline giyemu tu alata kadu vaga ginogalina. <sup>26</sup> Au agetoga sa'eyana giyowanina be gi'ela ada gitoliloveluvena gigayo, Wada gavaimi-yo modawa butuna ganogalini? <sup>27</sup> Ma agetoga gigayo, Me o taini a gi'ela ada tama gigahe be bulumakau veve'ahiyauwana ahe amununa, higa natuna wayawaina ginuhagana fa'ina.

<sup>28</sup> Au tomo'ainagona gi'ila'a ada manuwa ana luku gidibutoyogena. Medema fa'ina bana tamana gihobu gihawanuwenuwena vaita ginaluku. <sup>29</sup> Tu tamana againe gibonalaufata gigayo, U'ita, hida malamala moya'aina againiya gaveve'agetoga. Ya vehimeya keke tamo gadadibutoyogeni tu keke tamo udaveleku, keke-mo'a. Keke tamo kevakeva kabi'ona manugose natudi amine udaveleku-yo tobohiyakweyao buye adavemwamwala. <sup>30</sup> Tu wama natu ya lokoloko vevine yamayamadadiyao agaidiya gihebana amanadi bana fa'ine bulumakau veve'ahiyauwana umununa.

<sup>31</sup> Tamana gigahena gigayo, Ho natuku, tova moya'aina o iya buye kamimiyami. Yaku gaitoma moya'aina kadu ya gaitoma. <sup>32</sup> Au gilubodada be kana'avemwamwala, fa'ina taini vaita gida'alika tu giyemu-havagi, kadu vaita kadanuhegeni tu

ahe kanuhagana.” Au hidedemi Yesu yana gahetalahobuhobu.

## 16

*Lokoloko ana to'itave'avina nuwahuyahuyana tu koyona.*

<sup>1</sup> Kadu'e Yesu ana tomuliya agaidiya gigahetalahobuhobu gigayo, “Wakalivana sa'eyana gimiyami, yana giba ana to'itave'avina valeyana ginogalina higa kaliva tufoidi hi'awatalatalainena vaita yana giba gihebahebana. <sup>2</sup> Au gikovana be gi'ela-yo gitoliluveluvena gigayo, Higa tamo gavadi ugana-ma ganogalina? Ya faisewa ana valeyana una'ihagihagiyena be yaku giba ana itave'avina againe ya vemadu ganahalamanena. Valeyana koyona ganogalina fa'ina ya faisewa ganadabana.

<sup>3</sup> Wakalivana hidedemi gigahe-yo yana giba ana to'itave'avina nuwahnage gigahe gigayo, Yaku taubada yaku faisewa ginalemaku. Gavaimi ganaga? Fa'ina iya hima faha againe keke fiwalaku, kadu a'a lokoloko ana ve'o'ola againe wowomumu gananuhagana. <sup>4</sup> Oo! Nuwaku gi'afolena. Hidemi hidemi ganahuluva be yaku faisewa yaku taubada ginadabani-yo kaliva hina'navetobohiyaneke be agaidiya ganamiyami.

<sup>5-6</sup> Au hidedemi gigahe-yo kaliva sa'eyana sa'eyana yana taubada againe hibuki-ma giyowanidi. Kaliva nagona gi'ela gigahena gigayo, Yaku taubada againe a buki gavaiyehi? Bana gigayo, Olive gufana dolomu 100. To'itave'avina

gigayo, A buki ana fefe uvaini uhiyoto be 100 unayawelina be 50 unamadu'etoladina.

<sup>7</sup> Kadu kaliva anavelu gitoliyena gigayo, Kadu o'eni a buki gavaiyehi? Bana gigayo, Witi wabaikina 100. Kadu to'itave'avina gigayo, A buki ana fefe uvaini be 100 uyawelini tu 80 u'etoladini. Au hidedemi to'itave'avina gihuluva.

<sup>8</sup> Tu yana taubada mena valeyana ginogalina againe gigahe gigayo, Yana dewa koyona tu kaliva adi buki gikivekabi'ona fa'ina yana wanuwunuwa gihuluva.” Kadu Yesu gigayo, “Wa'ita, badi babi ana kikaiwabugaga hinuwenuwena-ma yadi wanuwunuwa tobohiyadiyao nuwadi hikivedivedigagina be aimo tova mulina fa'ina hinakidewadewa. Tu badi mahalina ana kaliva ma keke hidanuwunuwa lakahina higa vaita tobohiyadiyao nuwadi ana kivedivedigaga guwana hinanuhagani. <sup>9</sup> Gagahemi babi ana kikaiwabu wanafolafolakena be medema againe kaliva wanavetobohiyantedi. Ada au aimo kikaiwabunadi ginahavaina ana toveya, abaga miyamiyavagahina againe wanaluku be wanamiyami.” Au hidemi Yesu gigahe.

*Babi ana kikaiwabu fa'ina gavaimi kananuwunuwa?*

<sup>10</sup> Kadu Yesu gigayo, “Hai kaliva vehimeya kabi'ona yana wa'idibumuhiga gi'itave'avina, kadu medema adafaiweya vehimeya lakahina kanavelena. Tu hai kaliva vehimeya kabi'ona keke gida'itave'avini, kadu medema vehimeya lakahina keke gina'itave'avini. <sup>11</sup> Au ka'i babi

ana kikaiwabu keke yami wa'idibumuhiga wada'itave'avini, hakwa'adi lobama ana kikaiwabu ginavelemi-yo wana'itave'avini? Au keke tamo. <sup>12</sup> Kadu ka'i gava kaliva yana giba keke yami wa'idibumuhiga wana'itave'avini, hakwa'adi giba taumiyao fa'imiya ginavelemi-yo wana'itave'avini? Au keke tamo.

<sup>13</sup> Tofaisewa keke anafaiweya taubada luhei fa'idiya ginafaisewa. Ka'i adi'iselu fa'idiya ginafaisewa digo, sa'eyana againe ginanuwanuwakoyo tu sa'eyana againe ginanuwanuwa yamumuna, kadu sa'eyana againe ginamiyave'avina tu sa'eyana gina'itatagona. Au keke amifaiweya wananuwanuwaluga. Ka'i nuwanuwami Yaubada digo, Yaubada ana nuwanuwa'eya. Ka'i mani digo, mani ana nuwenuwe'eya.” Au hidede amine Yesu gigahe.

<sup>14</sup> Tu tonagona tafatafalolodiyao adi egana Falisi mani nuwadi givaina fa'ina, mena Yesu yana gahe babi ana kikaiwabu fa'ina hinogalina againe Yesu hihawavelaigena. <sup>15</sup> Bana Yesu gigahedi gigayo, “Omi wafolafolaka be higa mali kaliva hinagayo, Badi kaliva yegayegadiyao, tu Yaubada ase'ase mi gihalamanena. Gavadi agaimiya kaliva hihawaveyamumuyedi, medema vaita iyohoyoho Yaubada matane.”

*Mosese yana vehimeya fa'ina.*

*Madiu 11:12-13, 5:31-32, 19:9 Maki 10:11-12*

<sup>16</sup> Kadu Yesu Falisi agaidiya gigayo, “Tuwai-mo'ena Yaubada yana vehimeya Mosese givelena kadu yana nuwanuwa bonana ana

to'awatalatalaina giveledi be hidedemi ginauna Yoni Tobafitaiso yana toveya. Yoni gilakayemu-yo Yaubada yana yo'ogaga ana luku fa'ina yana kaliva hilulumamala, ada kaliva moya'aidi hififaiwala alu'aluwadi givedivediwe be higa hinaluku. <sup>17</sup> Ihayana be lobama babi anafaiweya ginahavaiidi tu keke tamo Yaubada yana vehimeya gina'awowolini.

<sup>18</sup> Hai kaliva vavinena ginakilowedi-yo kwamayoku velugana ginanagina, medema ana egana to'udo. Kadu hai kaliva kwamayoku moganedi gikilowedi-ma ginanagidi, medema ana egana to'udo.” Au hidedemi Yesu givehawala.

*Wakalivana be Lasalo kahihidi.*

<sup>19</sup> Kadu Yesu gigahetalahobuhobu gigayo, “Wakalivana sa'eyana gimiyami, kaiwabu adi vaigau yabeyabelina be kwayakwaya-mo'ena againe givivaigau kadu aiyeta sa'eyana sa'eyana a'a kevakeva bunabunavina gi'au'ana. <sup>20</sup> Yana miyami yamumunaga tu koyokoyo sa'eyana ana egana Lasalo wowona kolikoliyana gimiyami, tova be tova tobohiyaneyao wakalivana yana eda'awaneya hi'ali'aliyena. <sup>21</sup> Ada nuwanuwana wakalivana ana awamukumuku gibe'ube'u-ma gina'au'a. Ada galu'eta hi'ela'ela ana koliya hiyamoyamona.

<sup>22</sup> Himiyami tu bana koyokoyo gi'alika be aluwana lobama ana tovenuwa'ata hinauwena be Abelahamo liline hisena. Tu muliya kadu wakalivana gi'alika be hitauna. <sup>23</sup> Ada

bana abaga koyona againe givedivediwe tu gida'italele ma yuwa lauveya Lasalo Abelahamo buye hivetogalugedi-ma gi'itadi. <sup>24</sup> Au gikova gigayo, Ho kamaku Abelahamo, udahinekalikaliyeku be Lasalo uda'iveninisena ada nimatabona gufa againe gida'utuvini-yo meyaku gidakiveduvedubana be gidatuluna, fa'ina ai'ala'alata againe gavedivediwe lakahina.

<sup>25</sup> Tu Abelahamo gigayo, Boi babiya ya walokoloko umiyami tu bana Lasalo yana miyami keke yamumuna medema tovainadi unanuwenuwena. Tu adamoya bana yana wanuwayamumu gimimiyami tu o ya wa'ase'u'aulolo umimiyami. <sup>26</sup> Kadu'e hahavi lakahina gilugolohina fa'ina gaveyao nuwanuwadi omi agaimiya hinadamana-ma keke adifaiweya. Meda keke tamo hakwadi ime agaimeya ginadamana.

<sup>27-28</sup> Ada wakalivana gigayo, Auwe tu kamaku, gahawayafeyafe gavaimi udagahe be Lasalo uda'iveninisena kamaku yana yo'o agaidiya, fa'ina tobohiyakweyao faifi himimiyami-ma gida'ago'abiyedi be hida hima aulolo lakahina ana abageya keke hina'ela.

<sup>29</sup> Tu Abelahamo gigayo, Auwe, Mosese yana buki-vehimeya be Yaubada bonana ana to'awatalatalaina yadi buki tobohiyamomo agaidiya hidadauda. Gilubodadi be bonai-dina hidavenogaledi.

<sup>30</sup> Tu kadu bana gigayo, Keke kamaku Abelahamo, ka'i keke hinavenogaledi. Atu tamo



hakwadi alikeya gidamididi-havagi be gidana agaidiya, au makewa hidanuwavilana.

<sup>31</sup> Bana Abelhamo gigayo, Mosese be to'awatalatalaina bonadi hikilowena, kadu meda ka'i tamo hakwadi gidamididi-havagi digo, bonana keke hinavenogaleni." Au hidedemi Yesu Falisi gigahedi.

## 17

*To'aladibidibi be tokoyona adi kivetuvetunu fa'ina.*

*Madiu 18:6-7,21-22 Maki 9:42*

<sup>1</sup> Kadu'e Yesu ana tomuliya agaidiya gigahe gigayo, "Makewa'e koyona ana abavebe'u moya'aina ginalakayemu tu hoiyoi bana kaliva koyona againe gina'aladibidibiyedi-ma vita lakahina ginanuhagana! <sup>2</sup> Ka'i kuga vita-mo'ena bana odone hidaluhifona be lehageya hidahegehobuyeni-yo gida'alika, au gidalubodana be gidamadu'alika-yo keke anafaiweya tamo kaliva kowakowana koyona againe ginavebe'uni-yo matahiwadi lakahina Yaubada nimane ginanuhagani. <sup>3</sup> Medema fa'ina taumiyao wana'itave'avimi. Ada ka'i tobohiyami ginahuluva koyona, au wanadakeyena be ka'i nuwana gina'avilana, au kadu yana koyona wanavenuwauluyena. <sup>4</sup> Ada ka'i aiyeta sa'eyana againe yana koyona seveni agaimiya ada kadu tova seveni agaimiya, gina'elayewayewa ginagahegahe higa vaita yana koyona wadavenuwauluyena, au gilubodami be yana koyona wadavenuwauluyena."

<sup>5</sup> Au hidedemi Kaiwabu Yesu koyona ana venuwauluya moya'aina fa'ina gigahe-yo afositolo higahena higayo, “Kauveya, udavelugama be yama vetumagana udakivetubugina.”

<sup>6</sup> Ada Kaiwabu gigayo, “Ka'i yami vetumagana ana tubuga vaita masitada nafona kabikabi'ona tu gikabukabu lakahina amine, au amifaiweya hida aihala againe wanagahe wanagayo, Tauni unahabu be unana lehageya unamidi, au bonami gidavenogalena.

*Agetoga yadi faisewa fa'ina.*

<sup>7-8</sup> Ka'i kaliva sa'eyana agaimiya ana agetoga gidavehimeyena be yana faheya gidafifaisewa o ka'i yana sifi gida'ita'itave'avidi ma gidayewana melaleya againe, bana againe gavaimi gidagahe? Ka'i gidagayo, Auhe'ama u'ela uhiyoto be u'a? Keke-mo'a hidede amine gidagahe. Au gidagayo, Akuga ukidewadewa be unavaigau-yo unahaulili, aku bwai unahiwana be gana'a ganayu. Tu muliya-yo o unana una'a. Au hidedemi gidagahe. <sup>9</sup> Kadu agetoga yana kauveya givehimeyena amine gihuluva fa'ina, ka'i yana kauveya bana againe ginavesiule? Keke-mo'a. <sup>10</sup> Meda anafaiweya omi'iyao. Ka'i ami vehimeya matatabuna ganavelemi-ma wanafaisewa-'owodi amine gilubodami be wanagayo, Ime agetoga hawaveyamaumu keke ama lauboda, fa'ina ama vehimeyagaga amine afaisewa.” Au hidedemi Yesu gigahe.

*Yesu tovedawodawowo teni gisiveyawadi.*

<sup>11</sup> Yesu Yelusalema againe ginauna tu Sameliya Galili ana fafali hinafadiya amine ginauna. <sup>12-13</sup> Ada melala sa'eyana againe giyemuyemu tu tovedawodawowo teni himadubodebodena. Yuwa himidilauva tu hikova'awafatafata higayo, “Yesu Kauveya, udahinekalikaliyema.”

<sup>14</sup> Yesu gi'itadi-yo gigahedi gigayo, “Wanana abaveyao ana tofaisewa agaidiya wowomi wanavehawaledi be wabwaina ma hina'itana.” Ada edeya hinauna tu hiyamumu.

<sup>15</sup> Tu kaliva sa'eyana agaidiya yana yamumu gi'ita-yo au Yesu againe giyewana, agona lakahina Yaubada gihawadavadavana. <sup>16</sup> Au Yesu agene gi'ibo'ula-mo'a be givesiuleyena. Hida kaliva au kwanamiSameliya badi miYuda hivenibainedi amanadi. <sup>17-18</sup> Bana Yesu gigahe gigayo, “Tovedawodawowo teni matatabudi gasiveyawadi. Tu hai kaliva naeni himimiyami? Gavadi-yo bana hida keke kwanamiSileli anakaibe giyewa-yo Yaubada gihawadavadavani?” <sup>19</sup> Ada kaliva againe gigahe gigayo, “Au umidi be unana. Uvetumaganeku fa'ina ubwaina.”

*Yaubada yana abavehimeya yana yemu fa'ina.*

<sup>20</sup> Tu tova sa'eyana tonagona tafatafalolodiyao adi egana Falisi Yesu againe hitolilualuva higayo, “Gava tova Yaubada yana abavehimeya kaliva agaideya ginalakayemu?” Bana gigayo, “Keke tamo iya'iyaya adafaiweya kana'itana-ma againe Yaubada yana abavehimeya ginalakayemu. <sup>21</sup> Kadu keke kaliva hinagahe hinagayo, Hidede againe Yaubada yana abavehimeya giyemu, o

ka'i hinagayo, Wadedei giyemu. Fa'ina Yaubada kaliva ase'asediya ahe givebutu givehivehimeya.”

*Yesu yana yewa'ela fa'ina gilukahihi.*

*Madiu 24:23-27,36-41*

<sup>22</sup> Yesu hidedemi Falisi agaidiya gigahe-yo ana tomuliya gigahedi gigayo, “Aimo tova gi'ela'ela be againe wanagahe wanagayo, Ho nuwanuwama Bana Tohobu'ela yana ivemogatala ana aiyeta sa'eyana ana'itana! Hidedemi wanagahe tu keke wana'itani. <sup>23</sup> Ada muliya valeya wananogalina vaita ahe gada'ivemogataliku ada kaliva hinagayo, Bana yuwa gi'ela, o ka'i hinagayo, Wa'ita hidei gi'ela. Yadi gahe keke wanamuliyeni. <sup>24</sup> Fa'ina nama gisinamana be auhe'ama lobama fafalina kadu fafalina gituvemahali-'owona amine, meda kaliva moya'aidi hinamadu'itaku Iya Tohobu'ela yaku yewa'ela ana tova. <sup>25</sup> Tu aku vehimeya gavaina higa kaliva tova adamoya himimiyami-ma hinakiloweku be aulolo moya'aina badi nimadiya gananuhagana.

<sup>26-27</sup> Boi tuwai-mo'ena Nowa yana toveya kaliva vevine himiyamiyabaubau, a'a hi'au'a bwai hiyuyu hinaginagi hivenavenagi, au yadi havivila tulina tulina hinunauwena tu Nowa waka againe giyage aiyetai-nadi. Giyage tu mala gituwa be moya'aidi gituwa'afufudi. Meda anafaiweya Iya Tohobu'ela yaku yewa'ela ana toveya kaliva vevine hinadewadewa.

<sup>28-29</sup> Meda boi tuwai-mo'ena Lota yana toveya kaliva himiyamiyabaubau, hi'au'a

hiyuyu hilulukimokimone hifahafaha  
 himanumanuwaiyogona, tu auhe'ama  
 Lota gimidi Sodoma gihege-yo ai'ala'alata  
 kadu gaitoma yagoyagona alamatafailina  
 lobameya gi'ililihiwana be moya'aidi  
 give'alayauyaule-'owodi. <sup>30</sup> Meda anafaiweya  
 kaliva agaidiya ginalakayemu Iya Tohobu'ela  
 gana'ivemogataliku ana toveya.

<sup>31</sup> Tu medema aiyetai-nadi hai kaliva yana  
 tolameya ginamiyami, medema keke yana  
 manuweya ginaluku be higa yana lokoloko  
 ginavaini. Meda anafaiweya hai kaliva yana  
 faheya ginamiyami, medema keke anafaiweya  
 melaleya ginayewani. <sup>32</sup> Lota vavinena agaidiya  
 nuwami ginanunauyena. Badi hi'ota'ota tu  
 hihagaviladi fa'ina hi'alika. <sup>33</sup> Gava kaliva  
 keke Iya agaikuya ginahawahegeni tu taunaga  
 yana miyami babiya ginanuwenuwena, medema  
 yawaina ginanuhegena. Atu gava kaliva yawaina  
 alikeya gihawahegena, medema yawai-vagahina  
 ginanuhagana. <sup>34</sup> Gagahemi bogi-nadi againe  
 kaliva luhei ivi sa'eyana againe hinadauda  
 tu sa'eyana gananauwena sa'eyana ginamiya.  
<sup>35</sup> Vevine luhei gufeya hina'i'ivilavila tu sa'eyadi  
 gananauwedi sa'eyadi hinamiya. [ <sup>36</sup> Kaliva luhei  
 faheya hinamiyami tu sa'eyana gananauwena  
 sa'eyana ginamiya.] ”

<sup>37</sup> Hidedemi Yesu gigahe-yo ana tomuliya  
 hitoliyena higayo, “Kauveya, hida gaitomai-  
 dina ha'againa hinalakayemu?” Bana gigayo,  
 “Hai ubula siyona gilakalaka, medede againe  
 manusiyo hinavaga'auta.” Hidedemi Yesu

givenuwa'atadi.

## 18

*Atuvefa'ila ve'o'ola againe fa'ina Yesu gigaheta-lahobuhobu.*

<sup>1</sup> Tu Yesu ana tomuliya agaidiya gigaheta-lahobuhobu be ginavehawaledi higa tova moya'aina hinave'ove'o'ola, be yadi atuvefa'ila againe keke-mo'a hina'ilova. <sup>2</sup> Gigayo, “Melala sa'eyana againe tovedewayauga sa'eyana gimiyami, ada Yaubada keke gidamatauseni kadu kaliva keke gidanuwenuwedi. <sup>3</sup> Kadu mena melalai-nadi againe sikwa sa'eyadi himiyami, ada tova moya'aina tovedewayauga againe hi'ela'elayewayewa higahegahe higayo, Kaliva sa'eyana agaimeya gidewa koyona ada kotu againe o udavehimeya be agaimeya gidalaufata.

<sup>4-5</sup> Tova moya'aina yadi ve'o'ola gidibudib-utoyogena ginunauwena tu muliya tauna nuwahnagene gigahe gigayo, Yaubada keke gadamatauseni kadu kaliva keke gadanuwenuwedi tu hida sikwa tova moya'aina dibuku hivevetoyogina fa'ina ganavelugadi. Ka'i keke ganavehimeya be nibaidi agaidiya ginalaufata, au yadi elayewayewa againe wowoku ginalogilogi.” Au hidedemi Yesu gigahetalahobuhobu.

<sup>6</sup> Kadu Kaiwabu gigayo, “Tovedewayauga koyona yana gahe wananuwenuwena. <sup>7-8</sup> Bana tovedewayauga koyona nonogana kwamayoku

givelugadi. Bana Yaubada kaliva hagihagi-mo'ena ma ka'i yana kaliva luluwafadiyao bogi uyadayada Bana againe hitagitagi-fa'ila ma ka'i ginavelugadi o ka'i keke? Ka'i yana veluga againe ginavekwalu? Keke-mo'a, au gagahemi adi veluga fa'ina ginavehimeya, e ginamaduvehimeya. Atu Iya Tohobu'ela babiya ganayewa'ela ana toveya, ka'i kaliva yadi wavetumagana hive'ove'o'ola-ma gananuhagadi o ka'i keke?" Au hidemi Yesu gigahe.

*Falisi be takesi ana toyaudi yadi ve'o'ola*

*ana gahetalahobuhobu.*

<sup>9</sup> Tu kaliva tufoidi taudiyao hivetumaganedi vaita badi yegayegadiyao tu mali kaliva moya'aidiyao hi'itatagodi. Hidedemi hinuwanuwa fa'ina Yesu badi agaidiya gigahetalahobuhobu. <sup>10</sup> Gigayo, "Kaliva adi'iselu manuwa-tafalolo againe hiluku be hinave'o'ola. Sa'eyana tonagona tafatafalolodiyao adi egana Falisi yadi yo'o kalivana tu sa'eyana takesi ana toyaudi. <sup>11</sup> Falisi gimidi tauna fa'ine give'o'ola gigayo, Yaubada yo, againiya gavesiule fa'ina yaku dewa keke mali kaliva moya'aidi yadi dewa amine. Badi to'alasebaseba, vehimeya ana todibutoyoga, to'udo. Kadu gavesiule fa'ina iya keke wada takesi ana toyaudi kiki'afuna amine. <sup>12</sup> Wiki sa'eyana sa'eyana hinagene aiyeta luhei galabelabewaviyo be higa ganave'o'ola fa'ina. Gava lokoloko o ka'i mani gavaivaina-ma

gadakadi adi yo'o teni tu sa'eyana O Yaubada gavelevele. Au hidedemi Falisi gigahe.

<sup>13</sup> Tu takesi ana toyaudi yuwa ma'i lauveya gimidi, yana wawowomumu fa'ina keke lobameya gida'itavedadaga au odona gi'aweweni tu gigahe gigayo, Ho Yaubada, iya tokoyona tu udahinekalikalijeku. Hidedemi gigahe.

<sup>14</sup> Gagahemi hida kalivai-nadi Yaubada matane gisena yegayegana tu gina yana manuweya, tu bana Falisi ma keke. Fa'ina hai kaliva tauna ana egana ginakilakahina, Yaubada mena kaliva ginakivewowomumuna. Atu hai kaliva tauna ginanuwahobu, medema ana egana Yaubada ginakilakahina.” Au hidedemi Yesu gigahedi.

*Yesu we'owe'o gi'itanuwakabubuyedi.*

*Madiu 19:13-15 Maki 10:13-16*

<sup>15</sup> Himiyami tu fwefweya nonogana Yesu againe hi'ali'aliyedi be ginakibwa'edi higa ginagahenuwakabubuyedi, atu ana tomuliya hi'itadi-yo to'aliya hidakeyedi. <sup>16</sup> Tu Yesu

we'owe'o gikovadi be Bana againe hina'ela ada ana tomuliya gigahedi gigayo, “We'owe'o keke wanahawatadi au Iya agaikuya hina'ela fa'ina gaveyao vaita we'owe'o keke yadi wakikaiwabu amine, medema Yaubada yana itave'avina againe hinamiyami be ase'asediya ginavehivehimeya.

<sup>17</sup> Gagahe velemono'ena gava kaliva Yaubada matane keke ginanuwahobu be kwamana kabi'ona amine ginanuwanuwa, medema keke Yaubada yana yo'ogaga agaidiya ginaluku be yana itave'avina againe ginamiyami, keke-mo'a.”



*Kwanatubulakahina yana walokoloko Yesu gikilowena.*

*Madiu 19:16-26 Maki 10:17-27 Madiu 19:27-30 Maki 10:28-31*

<sup>18</sup> Ada tonagona sa'eyana Yesu gitoliluveluvena gigayo, “Tovehawala yamumu, gavaimi ganadewa-yo yawai-vagahiku gananuhagani?”

<sup>19</sup> Ada Yesu gigahena gigayo, “Gavana fa'ina Iya uhawaveyamumuyeku? Keke tamo hakwadi yamumuna, au Yaubada anakaibe'u-mo'a yamumuna. <sup>20</sup> Yaubada yana vehimeya ahe uhalamanena higa keke unakelele keke unaluve'alika keke unakai'afu, tobohiya yana dewa fa'ina keke unagahe-kawowo. Kadu sa'eyana tama be hina unave'amohimohinedi.”

<sup>21</sup> Bana kaliva gigayo, “Mena vehimeyai-dina aimo kabi'okuya gavebutu ga'ita'itave'avina be ganunauwena tova adamoya.”

<sup>22</sup> Ada Yesu yana gahe ginogalini-yo gigahena gigayo, “Dewa sa'eyanaga againe aimo ukali'uho. Unana ya lokoloko matatabuna udakimon-vedamanena be fatana koyokoyo agaidiya udafolakena, ada au aimo laufata hagihagina lobameya unanuhagana. Unafolakeni-yo una'ela be Iya agaikuya unavetomuliya.”

<sup>23</sup> Bana kaliva Yesu yana gahe ginogalini-yo nuwana givita-mo'a, fa'ina bana yana walokoloko. <sup>24</sup> Yesu yana nuwavita gi'ita-yo gigahe gigayo, “Badi wakalivadiyao yadi luku Yaubada yana yo'ogaga agaidiya au vita-mo'ena.

<sup>25</sup> Ka'i yomuyomu lakahina ana egana kameli gaima matane ginaluku, medema vitana. Atu ka'i wakalivana Yaubada yana yo'o agaidiya ginaluku

be yana itave'avina againe ginamiyami, medema vita-mo'ena.”

<sup>26</sup> Badi gahe-nadi hinogalini-yo higahena higo, “Ha! Keke tamo hakwadi anafaiweya kibababala ginanuhagani.”

<sup>27</sup> Tu Yesu gigo, “Kaliva adi kibababala keke taudiyao adifaiweya, atu medema Yaubada ana tagalawalowa.”

<sup>28</sup> Au Fita gigo, “U'ita, ime yama melala ahegedi be O againiya avetomuliya.”

<sup>29-30</sup> Yesu gighedi gigo, “Gagahe velemo'ena gava kaliva yana melala gihegena o vavinena o tobohiyaneyao o tamaneyao o hinaneyao o natuneyao ginuyabuyabudi be higa Yaubada yana yo'ogaga ana luku fa'ina kaliva ginavenuwa'atadi, medema tova adamoya ana laufata lakahina, lakahi-mo'ena gavadi gavadi yamumuna ginavaina, ada kadu tova mulina yawai-vagahina ginanuhagana.”

*Tova anaveto Yesu yana alika fa'ina gilukahihi.*

*Madiu 20:17-19 Maki 10:32-34*

<sup>31</sup> Tu Yesu vetomuliya ana laufata fa'ina hidedemi gigahe-yo yana yo'o tuwelo gisi'aliyedi be gighedi gigo, “Wa'ita, Yelusalema againe kananauna ada gavadi gavadi Yaubada bonana ana to'awatalatalaina Iya Tohobu'ela fa'ikuya hi'etoladina, medema matatabuna ginalakayemu.

<sup>32-33</sup> Au yo'o tulidiyao kalivai-dina agaidiya hinahegenauweku be hinahawavelaigeku ada hina'ihawadamaneku hinakiwaliku hinamunukoyokoyoku tu

hinaluve'alikaku. Atu tova anaveto againe ganamididi-havagi.”

<sup>34</sup> Au hidedemi Yesu givenuwa'atadi tu to-muliya yana gahē matatabuna hifaniyena. E, bonai-nadi ana nuwanuwa sevasevauyana badi agaidiya, ada gavaimi Yesu gigaheyena-ma keke hidahalamaneni.

*Yesu tomatakoyo Yeliko againe gikiveyamuna.*

*Madiu 20:29-34 Maki 10:46-52*

<sup>35</sup> Tu Yesu Yeliko liline giyemuyemu tu tomatakoyo edeya gihiyoto leme fa'ina give'ove'o'ola. <sup>36</sup> Au yo'o hinauna-ma butudi ginogalini-yo gitolilualuva gigayo, “Omi gaveyao?” <sup>37</sup> Kaliva higahena higayo, “Yesu kwanaNasaledi ginanauna.”

<sup>38</sup> Bana gikova gigayo, “Yesu, O Devida bwane-nena gavaimi uda'itanuwakabubuyeku.”

<sup>39</sup> Kaliva wai hinagona-ma hidakeyena be higa ginave'amata, tu bana kadu agona gilakata-mo'a gikovadona gigayo, “O Devida bwanenena gavaimi uda'itanuwakabubuyeku.”

<sup>40-41</sup> Au Yesu ginumidi givehimeya be tomatakoyo Bana againe hinavega'aulena. Ada ahe Yesu liline gi'ela-yo gitoliyena gigayo, “Gavadi nuwanuwa o fa'iniya ganagani?” Bana gigayo, “Kauveya, nuwanuwaku gada'italele.”

<sup>42</sup> Au Yesu gigahena gigayo, “Mata gina'italele. Uvetumaganeku fa'ina ubwaina.” <sup>43</sup> Auhe'ama matana gi'ita'italele ada Yesu gimulimuliyena tu Yaubada ana egana gikikilakahina. Ada kaliva

moya'aidi hi'ita-yo kadu badi Yaubada hihawadavadavana.

## 19

### *Sakiusa kahihina.*

<sup>1</sup> Tu Yesu Yeliko melala againe giluku be ginanauna. <sup>2</sup> Medede againe kaliva sa'eyana gimiyami ana egana Sakiusa, ada bana takesi ana toyaudi kikaiwabuna yana walokoloko. <sup>3</sup> Ada nuwanuwana gavaimi Yesu ana ita'ita ma gina'itana, tu bana kaliva kali'uhona ada kaliva hiyo'oyo'o fa'ina keke anafaiweya gida'itani. <sup>4</sup> Au wai gimadunagona aihala ana egana sikomoli againe gilaka be gina'itana, fa'ina edai-nadi againe Yesu gi'ela'ela.

<sup>5</sup> Yesu ai-nadi inubane giyemu-yo givedadaga gigahena gigayo, “Sakiusa, umaduhobu fa'ina adamoya gilubodaku be ya manuweya buye kanamiyami.” <sup>6</sup> Auhe'ama gimaduhobu yana wavemwamwala givega'aulena be hina yana manuweya. <sup>7</sup> Ada kaliva moya'aidi hi'itana againe hivebutu hi'alawoluwolu higayo, “Bana kaliva koyona nonogana againe giluku giwakawaka.”

<sup>8</sup> Tu Sakiusa gitowamidi Kaiwabu againe gigahe gigayo, “Kauweya u'ita, adamoya yaku lokoloko ganalugolohina, tufona koyokoyo fa'idiya tufona iya fa'ikuya. Kadu kaliva gaveyao yadi mani gavai-kawowona, medema ganaveleyewedi. Ka'i sa'eyana amine gavaina, au fowa amine ganaveleyewedi.”

<sup>9</sup> Yesu gigahena gigayo, “Adamoya hida yo'o yadi koyona ana aiyawela hinuhagana, fa'ina hida kaliva takesi ana toyaudi nonogana bana Abelahamo yana yo'o kalivana. <sup>10</sup> Wa'ita, Iya Tohobu'ela gahobu'ela be badi Yaubada yana eda hifaniyena-ma ganaleledi kadu ganakibababaledi.”

*Tofaisewa yadi lukimokimone ana gahetalahobuhobu.*

*Madiu 25:14-30*

<sup>11</sup> Yesu yana yo'o buye kabisona Yelusalema againe hinayemu ada yo'oyo'o hinuwanuwa vaita Yaubada yana abavehimeya kaliva agaidiya auhe'ama gina'ivemogatalina. Medema fa'ina Yesu yana gahe aimo hinuwenuwena tu givebutu gahetalahobuhobu gilukahihiyena. <sup>12</sup> Gigayo, “Kaliva kikaiwabuna sa'eyana fafali lauveya ginana be tokaiwabu adi maka ginavaina be ginayewana. <sup>13</sup> Ginana fa'ina yana tofaisewa teni gikovadi be sa'eyana sa'eyana K100 giveledi ada gigahedi gigayo, Hida mani lukimokimone againe wanakivetubugina be wananunauwena yaku yewa'ela ana toveya.

<sup>14</sup> Gina tu yana melala kalivadi hivenikohiyena ada tovenuwa'ata hi'iveninisedi be hivemulitawaina higa tokaiwabu lakahina hinagahena hinagayo, Keke nuwanuwama hida kaliva agaimeya ginavetokaiwabu.

<sup>15</sup> Hidedemi higahē tu au ai'adi tokaiwabu adi maka givaina be giyewana yana melaleya.

Giyemu-yo yana tofaisewa mani giveledi-ma giy-owanidi be higa gavaiyehi yadi lukimokimoneya ana tufo buye hivaini-ma ginahalamanena.

<sup>16</sup> Au tofaisewa nagona gi'ela gigayo, Kauveya, ya mani K100 gave'atutamo'aina be K1,000 gi-lakayemu.

<sup>17</sup> Yana tovehimeya gigahena gigayo, O tofaisewa hagihagi. Gaitoma kabikabi'ona ya wa'idibumuhiga u'itave'avina fa'ina, abavehimeya melala teni agaidiya unavaina.

<sup>18</sup> Tofaisewa anavelu gi'ela gigayo, Kauveya, ya mani K100 gave'atutamo'aina be K500 gi-lakayemu.

<sup>19</sup> Yana tovehimeya gigahena gigayo, Kadu o'eni abavehimeya melala faifi agaidiya unavaina.

<sup>20-21</sup> Muliya kadu tofaisewa sa'eyana gi'ela gi-gayo, Kauveya, hidei ya mani, kalekoya gakevana be gidauda. O kaliva nuwa koyona fa'ina gamatause. Mali kaliva gififaisewa tu o fata uvaivaina, kadu mali kaliva gifahafaha tu o a'a uyauyaudi-kawowo.

<sup>22-23</sup> Yana tovehimeya gigahena gigayo, O tofaisewa koyo. Tauni ya gahe amine ganavedewayaugi. O ugahe va ita udahalamaneku iya kaliva nuwaku koyona. Mali kaliva gififaisewa tu iya fata gavaivaina, kadu mali kaliva gifahafaha tu iya a'a gayauyaudi-kawowo. Hidedemi o ugahe tu gavadi-yo yaku mani banika againe keke udaseni? Ka'i udasena digo, yaku mani ana ve'atutamo'ai gadavaina yaku yewa'ela ana toveya.

<sup>24</sup> Au ana agetoga liline himidimidi-ma agaidiya gigahē gigayo, Yana mani K100 wanalemana be bana K1,000 gi'abina-ma wanavelena.

<sup>25</sup> Badi higayo, Kauveya, yana mani ahe lakahina K1,000.

<sup>26</sup> Tu bana gigayo, Gagahemi hai kaliva yana halamana o ka'i yana faisewa Yaubada givelena-ma gi'ita'itave'avina, medema yana halamana o yana abavehimeya ginakivetubugina. Atu hai kaliva yana gava'adi Yaubada givelena-ma keke gina'itave'avini, medema yana halamana kabi'ona Yaubada ginavaihegena be ginamiya-kawowo. <sup>27</sup> Ma hida nibaikweyao keke nuwanuwadi badi agaidiya ganavetokaiwabu-ma wanakive'avidī be wana'aliyedi matakuya wanaluve'alikadi.” Gahetalahobuhobu au hidede amine.

*Yesu doniki kwaune Yelusalema againe giyemu.*

*Madiu 21:1-11 Maki 11:1-11 Yoni 12:12-19*

<sup>28</sup> Yesu gilukahihi gihavaina, ana tomuliya edeya ginagoyedi Yelusalema againe hinauna-tu.

<sup>29</sup> Melala luhei Bedefegi kadu Bedani oya ana egana Olive againe hi'iveda'ufodi tu ana tomuliya adi'iselu gigahedi be wai hinanagona. <sup>30</sup> Gigahedi gigayo, “Omi wai wanagona yuwa melala againe wanaluku, ada wanalukuluku tu doniki natudi ai againe hiluhifona-ma wana'itana. Mena doniki kwaune keke tamo hakwadi boi gidayage. Au wanayauna be wana'aliyena. <sup>31</sup> Ada ka'i tamo hakwadi ginagahe ginagayo, Gavana fa'ina wayauyauni? au wanagahena wanagayo, Yama Kaiwabu nuwanuwana me'ama.”

<sup>32</sup> Au tomuliya adi'iselu gi'iveninisedi-ma hilowoga be hina, ada Yesu gigaheyena amine hinuhagana. <sup>33</sup> Ada doniki natudi hiyauyauni waganeyao higahedi higayo, “Gavana fa'ina doniki wayauyauni?”

<sup>34</sup> Badi higayo, “Yama Kaiwabu nuwanuwana fa'ina.”

<sup>35</sup> Au doniki natudi Yesu againe hi'aliyena ada adi aikeva kwaune hiyavelini-yo Bana giyage. <sup>36</sup> Ada ginauna tu kaliva adi aikeva edeya hiyaveyavelina.

<sup>37</sup> Ada Yelusalema liline oya Olive ana eda gihobu againe giyemu-yo ana tomuliya yadi yo'o lakahina hivebutu yadi wavemwamwala Yaubada hihawadavadavana agodi lakahina, Yesu yana gugai fifiwalana tulina tulina hi'itana-ma fa'ina hivesivesiule higayo,

<sup>38</sup> “O Tokaiwabu Kaiwabu ana eganeya u'ela'elama

au Yaubada ginanuwakabubuye.

Kukuya ana toni'inuba lobameya kanadavadavana,

Tomiyagetane-mo'ane kanakivekaiwabuna.”

<sup>39</sup> Au hidedemi Yesu ana tomuliya hidavadava tu Falisi tufoidi yo'o agaidiya higahena higayo, “Tovehawala, a tomuliyamomo unahawatadi.”

<sup>40</sup> Bana gigayo, “Gagahemi ka'i badi hidave'awa'ibodeku digo, kuga aku davadava fa'ina auhe'ama hidakovakova.”

*Aimo miYelusalema nibaidiyao melala hinaluyaweyawelina.*



41 Tu Yesu Yelusalema gi'ivedaveda'ufona be melala-mo'ena gi'itana againe givebutu gitagi'uvadi. 42 Gigayo, “Hoiyoi miYelusalema! Vaita adamoya kukuya ana eda wadahalamaneni tu tova hidevama matami gi'itahowahowa eda wafaniyena. 43-44 Aimo tova vitana agaimiya ginayemu, nibaimiyao boda hinadudavina be hinabodabodafimi-yo melala hinaluyaweyawelina, omi'iyao kadu natumiyao melala ana alahinageya hinaluyaweyaweli-owomi. Keke tamo kabala hikivetalana-ma aimo kabalahiyana tabone ginada, au moya'aina hinatutuyauyaulena. Au hidedemi hinahuluvimi, fa'ina Yaubada gi'ela be ginakibababalemi-ma ana tova wafaniyena.”

*Yesu manuwa-tafalolo lakahina againe giluku.*

*Madiu 21:12-17 Maki 11:15-19 Yoni 2:13-17*

45-46 Yesu miYelusalema gitagi'uvadi gihavaina, manuwa-tafalolo lakahina ana eda'awaneya giluku be givebutu tolukimokimone giwavidi gigahedi gigayo, “Yaubada bonana eto'etoladina gigahede gigayo,

Yaku manuwa hinavewagana abave'ove'o'ola ana manuwa.

Hidedemi gigahede tu omi'iyao ma vaita tokai'afu yadi abaga amine wafaisewana.” Hidedemi Yesu gidakeyedi.

47 Ada au aiyeta sa'eyana sa'eyana agaidiya manuwa-tafalolo againe givehavehawala. Atu badi abaveyao ana tofaisewa kikaiwabudiyao kadu Mosese yana vehimeya ana tovehawala

kadu yo'o adi tonagona eda hilelena be higa hinaluve'alikana. <sup>48</sup> Tu eda hilele-wayoga keke adifaiweya, fa'ina yo'o moya'aidi Yesu bonana hivenovenogalena keke nuwanuwadi tamo gahe hinanogalibabuni.

## 20

*Yesu yana abavehimeya inubana fa'ina hitolilulveluvena.*

*Madiu 21:23-27 Maki 11:27-33*

<sup>1-2</sup> Tova sa'eyana Yesu manuwa-tafalolo againe kaliva givehavehawaledi kadu Yaubada yana Venuwa'ata Yamumuna fa'ina gilulumamaledi tu abaveyao ana tofaisewa kikaiwabudiyao be Mosese yana vehimeya ana tovehawala kadu kaliva lakahidiyao buye Bana againe hi'ela higayo, “O ughema, ha'againa ya abavehimeya uvaini-yo boiyesedi mena gaitoma tulina tulina uffaisewadi? Hakwa'adi mena abavehimeya givеле-yo hidedemi uhuluva?”

<sup>3-4</sup> Yesu gigayo, “Kadu tolilualuva sa'eyana agaimiya ganasena. Au omi wanagaheku, hakwa'adi abavehimeya Yoni Tobafitaiso givеле-yo kaliva gikivebafitaisoyedi? Ka'i yana abavehimeya Yaubada againe giv'e'inuba o ka'i kaliva agaidiya?”

<sup>5</sup> Yesu gigahe-yo badi buye hive'agahegahe higayo, “Ka'i kanagahe vaita Yoni yana abavehimeya Yaubada againe gidave'inuba au Bana ginagayo, Ka'i Yaubada againe digo, gavadi-yo Yoni yana gahe keke wadavetumaganeni? <sup>6</sup> Tu ka'i kanagahe vaita kaliva agaidiya gidave'inuba,

kaliva moya'aidi hinatutuve'alikada, fa'ina badi hinuwave'avina vaita Yoni Yaubada bonana ana to'awatalatalaina.”

<sup>7</sup> Hidedemi hinuwanuwa fa'ina Yesu yana to-lilualuva hidemi hifatana higayo, “Ka'iwa. Ime keke adahalamaneni.”

<sup>8</sup> Au Yesu gigahedi gigayo, “Omi keke wadagaheku fa'ina, meda anafaiweya Iya keke ganavenuwa'atami hade'againa yaku abavehimeya give'inuba-yo hida gaitoma gafifaisewadi.” Au hidemi Yesu gigahe.

*Faha ana to'itave'avina koyodiyao adi gahetala-hobuhobu.*

*Madiu 21:33-46 Maki 12:1-12*

<sup>9</sup> Tu Yesu badi tonagona bonadi gifatayo yo'o agaidiya gahetalahobuhobu hidede amine gilukahihiyena gigayo, “Kaliva sa'eyana ai guwana ana egana kelefii yana babi againe gifahana, ada kaliva tufoidi faha ana to'itave'avina gisedi tu yana melala gihegena gina mali fafaliya gimiyami lauva tunugina. <sup>10</sup> Himiyami tu kelefii ana aikolu

ana tova giyemu againe, tonifaha ana agetoga faha ana to'itave'avina agaidiya gi'iveninisena be yana faha guwana tufona hinavelena fa'ina. Atu to'itave'avina agetoga himununa be makagekagena hiwavina. <sup>11</sup> Au kadu agetoga velugana gi'iveninisena tu to'itave'avina himununa be hikivekoyo-mo'ena au makagekagena hiwavina. <sup>12</sup> Kadu agetoga anaveto gi'iveninisena ada hida kalivai-nadi hi'iveki'onina be ala kwaune hihegevihilena.

<sup>13</sup> Au tonifaha gigahe gigayo, Gavadi ganagani? Natuku natu'ase'aseku gana'iveninisena. Ka'i bana'e hinave'amohimohinena. Hidemi gigahe.

<sup>14</sup> Tu to'itave'avina hi'ita-yo taudiyao hive'agahegahe higayo, Hida hima bana ana hilafa. Kanaluve'alikana be higa yana babi taudeyao kanavaina. <sup>15</sup> Au ala kwaune hituwa'atugena be hiluve'alikana.”

Au hidedemi Yesu gigahe tu gitolilualuva gigayo, “Wanawanuwa. Tonifaha badi to'itave'avina agaidiya gavaimi ginaga? <sup>16</sup> Au ginayewa'ela be ginaluve'alikadi ada yana faha to'itave'avina velugadiyao nimadiya ginasena.” Tovanenega hinogalini-yo higahe higayo, “Au keke, keke-mo'a.”

<sup>17</sup> Au Yesu gi'itadonedonedi gigayo, “Omi wavekeke vaita gava vita galukahihiyena-ma keke ginalakayemu tu omi wakiloweku ma kahihiku Yaubada bonana eto'etoladina giyakahina. Bonai-nadi ana nuwanuwa ma'i wahalamanena o ka'i keke? Gigayo, Ogola manawa ana to'aiyogona hikilowena-ma au holili'abi manawa hinafane-mo'ane gimidimidi.

<sup>18</sup> Wa'ita, gaveyao moya'aidi ogolai-nadi againe hinabe'u-ma luludi hinadobona, atu hai kaliva ogola gina'alatagona, medema ginafuwa-mo'ena.” Au hidemi Yesu gigahe.

<sup>19</sup> Tu badi Mosese yana vehimeya ana tovehawala kadu abaveyao ana tofaisewa kikaiwabudiyao mena gahetalahobuhobu badi fa'idiya Yesu gigaheyena-ma hi'ayaunena fa'ina, nuwanuwadi medema bai-nadi againe

hinakive'avina. Atu yo'o himatausedi fa'ina, higa-wayoga keke adifaiweya.

*Yesu takesi ana sewadi fa'ina hitoliluveluvena.*

*Madiu 22:15-22 Maki 12:13-17*

<sup>20</sup> Tu badi miYuda adi tonagona keke adifaiweya Yesu hinamadukive'avini fa'ina, aimo hilulubodena ada yadi kaliva tufoidi hivegidedi be yo'o hinafadiya hinanaukau tu vaita kaliva velemodi amine hinahuluva. Nuwanuwadi Yesu tamu yana bonalaufata againe hinavebauna be higa adifaiweya kabemani yana wafaiwala ma yana abavehimeya againe hinahegenauwena.

<sup>21</sup> Au tonaukau hitoliluveluvena higayo, “Tovehawala, ime ahalamanena ya gawe ya vehawala au tunutunugina, kadu kaliva moya'aidi u'itadi leleleya tu Yaubada yana eda fa'ina uvehavehawala velemo'ena. <sup>22</sup> Au anatoliye, kwanaLoma yada tokaiwabu lakahina Sisa againe takesi kanasena, ka'i medema gilubodana o ka'i keke?”

<sup>23-24</sup> Hidedemi hitoliluvuluva tu Yesu yadi nuwanuwakau gi'ayaunena ada gigahedi gigayo, “Mani kabala wanavehawaleku. Hida hakwadi magigina? Kadu hakwadi ana egana mene kabala againe hikilumini?” Badi higayo, “Bana Sisa.”

<sup>25</sup> Bana gigahedi gigayo, “Au hadema Sisa yana lokoloko, medema Sisa againe wanasena. Kadu hadema Yaubada yana lokoloko, medema Yaubada againe wanasena.”

<sup>26</sup> Au keke adifaiweya Yesu yana bonalaufata againe hinavebauni-yo ginakoyo kaliva

matadiya. Ada yana bonalaufata fa'ina hiyaulowoga ada au hive'amata.

*To'alika yadi mididi-havagi fa'ina Yesu hitoliyena.*

*Madiu 22:23-33 Maki 12:18-27*

<sup>27</sup> Tu tonagona tafatafalolodiyao adi egana Sadusi tufoidi Yesu againe hi'ela be hinatoliluvelevuena. Badi'iyao ma higahe vaita aimo tova mulina to'alika keke hinamididi-havagi. <sup>28</sup> Badi higayo, "Tovehawala, Mosese yana buki-vehimeya againe hidede amine gi'etoladi. Ka'i kaliva sa'eyana kwamayoku ginagina ada natudi keke tu gina'alika, au kaliva tobohiyana yana vayasi anafaiweya gidanagina be tobohiyana ana hilafa fa'ina natuneyao gina'ivetubugidi. Au vehimeya hidede amine Mosese giveleda. <sup>29</sup> Au kaliva tobohiyaneyao seveni himiyami tu tomo'ainagona kwamayoku ginagina ada natudi keke tu gi'alika. <sup>30-31</sup> Ada taina yana vayasi ginagina ada natudi keke tu gi'alika. Meda anafaiweya kaliva anaveto be hinunauwena tu taina kaliva anaveseveni natuna keke tu gi'alika. <sup>32</sup> Muliya-mo'ane kadu kwamayoku gi'alika. <sup>33</sup> Au kaliva adiveseveni kwamayoku sa'eyana hinagina fa'ina, aimo tova mulina kaliva hinamididi-havagi ana toveya bana kwamayoku-nadi ma gava kaliva vavinena?"

<sup>34</sup> Tu Yesu bonadi gifatana gigayo, "Badi kaliva vevine hida aituhai-nadi babiya himimiyami-ma hinaginagi hivenavenagi. <sup>35-36</sup> Atu badi gaveyao Yaubada givehawadi vaita gilubodadi be alikeya hinamididi-havagi be aimo tova mulina aituhai-nadi againe hinamiyami,

medema keke hinanagi, kadu keke hina'alika-havagi fa'ina yadi miyami badi lobama ana tovenuwa'ata yadi miyami amine. Kadu Yaubada alikeya ginasivemidididi fa'ina, badi Yaubada natuneyao. <sup>37</sup> Omi wagahegahe vaita to'alika keke hinamididi-havagi tu kaliva velemona hinamididi-havagi ma Mosese tauna yana buki againe givehawaleda. Wa'ita, ai giyabelina tu keke gida'alahini ma kahihina againe Mosese Kaiwabu givewagana Abelahamo yana Yaubada kadu Aisake yana Yaubada kadu Yakobu yana Yaubada, badi kalivai-dina alu'aluwadi yawayawadi himimiyami amanadi. <sup>38</sup> Bana Yaubada ma keke ali'alikadiyao yadi Yaubada, au kaliva alu'aluwadi yawayawana yadi Yaubada, fa'ina badi kalivai-dina tuwai-mo'ena hi'alikama adamoya wayawaidi Yaubada matane himimiyami.”

<sup>39</sup> Hidedemi Yesu gigahe-yo Mosese yana ve-himeya ana tovehawala tufoidi higahe higayo, “Tovehawala, ubonalaufata yamumuna.” <sup>40</sup> Yesu bonadi gifatana yamumuna fa'ina badi tonagona tafatafalolodiyao tolilualuva kadu keke velugana hidaseni, au himatauta fa'ina hi'ilova.

*Keliso inubana fa'ina.*

*Madiu 22:41-46 Maki 12:35-37*

<sup>41</sup> Tu Yesu tonagona tafatafalolodiyao agaidiya tolilualuva gisena gigayo, “Gavadi-yo tovehawala higahe vaita Yaubada yana Tovegida ana egana Keliso Devida bwanenena? <sup>42-43</sup> Bana

Devida tauna Same ana buki againe gigahe gigayo,

Bana Yaubada Kaiwabu iya yaku Kaiwabu giga-hena gigayo,

Nima i'atagikuya unahiyoto. O unamiyami tu nibaimomo ageyafayafaniya ganasedi.

<sup>44</sup> Au hidede amine Devida Keliso givewagana yaku Kaiwabu, tu gavaiya'amine yana Kaiwabu kadu bana bwanenena muliya gitubuga amanadi?"

*Yesu Mosese yana vehimeya ana tovehawala*

*gihawavekoyoyedi.*

*Madiu 23:1-12 Maki 12:38-40 Luke 11:43*

<sup>45-46</sup> Yesu au hidemi givehawala ada kaliva moya'aidi aimo hivanevanenega tu ana tomuliya givenuwa'atadi gigayo, "Taumiya wana'itave'avimi be Mosese yana vehimeya ana tovehawala yadi dewa keke nuwami gina'abini. Nuwanuwadi aikeva tunugina hina'oseni-yo abakimokimone againe hinanunudadana be kaliva hinalusiuleyedi kadu hinagayo, Velemodi. Nuwanuwadi manuwa-abavehawala ana egana sinagogi agaidiya kadu avemwamwala againe abavetoga kikaiwabuna againe hinavetoga.

<sup>47</sup> Ada sikwasikwadiyao yadi lokoloko hilemadi ada hive'ove'o'ola-fa'ila be higa kaliva hinahawaveyamumuyedi. Yadi koyona ve'o'ola-fa'ila againe hikevana fa'ina adi vita gavatubuga hinanuhagana." Au hidedemi Yesu givenuwa'ata.



## 21

*Sikwa sa'eyadi yadi velekawowo fa'ina.*

*Maki 12:41-44*

<sup>1</sup> Yesu manuwatafalolo lakahina againe givetoga ada gi'italele be wakalivadiyao yadi velekawowo abavedodoga againe hiseusena-ma gi'itadi. <sup>2</sup> Kadu sikwa koyokoyodi gi'itadi, hi'ela kabala kukwauhina luhei hidodona. <sup>3</sup> Au gigahe gigayo, “Gagahe velemo'ena wakalivadiyao yadi velekawowo mani lakahina hidodona tu hida sikwa koyokoyodi yadi velekawowo kabi'ona againe hitubuhegedi. <sup>4</sup> Fa'ina badi wakalivadiyao yadi mani tufonaga hidodona ada yadi tufo lakahina aimo gidadauda, tu badi sikwa koyokoyodi gavadi againe adiga o adi kaleko hidakimonena-ma mani-nadi matatabuna hidodo-'owona.”

*Tova mulina aulolo tagiya lakahina babiya ginalakayemu.*

*Madiu 10:17-22, 24:1-14 Maki 13:1-13*

<sup>5</sup> Tu Yesu ana tomuliya tufoidi manuwatafalolo lakahina hiyofeyofena higayo, “U'ita, manawa ana kabala gavavewaga! Kaliva yadi abahawahaga againe manawa hivevigauna.” <sup>6</sup> Bana Yesu bonadi ginogalini-yo gigahe gigayo, “Hida manawa wa'ita'itana-ma tova gi'ela'ela be badi nibaimiyao hinaluyaweyaweli-'owona. Kabala againe hikivetalana tu aimo keke tamo kabala kabalahiyana tabone ginada, au moya'aina hinatutuyauyaulena.”

<sup>7</sup> Badi higayo, “Tovehawala, gava tova hidedemi ginalakayemu? Gava aituha ana'ita-yo anahalamaneni mena gaitomai-dina ulukahihiyedi-ma kabisona hinalakayemu?”

<sup>8</sup> Yesu gigayo, “Aituha hidede amine. Taumiyao wana'itave'avimi be keke tamo hakwadi yana fwaya againe ginanuwa'abiyemi. Fa'ina aimo kaliva moya'aidi hina'ela aku egana hinayakahina hinagayo, Kaliva Yaubada givegidena-ma iya kaliva-mo'eku. Kadu hinagayo, Keliso yana yewa'ela ana tova gilurveda'ufo-mo'a. Tu bonadi keke wanavenogaleni. <sup>9</sup> Kadu aituha sa'eyana ma gaviya kadu vekwageya moya'aina valeyadi wananogalina againe keke ase'ase mi gina'akolukoluni lakahina. Mena gaitoma anafaiweya gidalakayemu tu tova ana lauyabu keke auhe'ama ginamadulakayemu.” Au hidemi Yesu givenuwa'atadi.

<sup>10</sup> Kadu Yesu gigayo, “Yo'o sa'eyana mali yo'o buye hinave'amunumunuga, kadu fafali sa'eyana mali fafali buye hinalulugaviya. <sup>11</sup> Fafali tulina tulina agaidiya li'uli'u lakahina kadu lokabudubudula kadu aulolo koyona nudamadamanina hinalakayemu. Ada abamatauta kadu iya'iyaya ase'asekolukoludi lobameya hinalakayemu.

<sup>12</sup> Tu hida gaitomai-dina aimo keke hinalakayemu tu nagona hinakive'avimi be hinakivekoyomi, kadu manuwa-abavehawala ana tonagona agaidiya hinahegenauwemi o ka'i deliya hinasemi. Kadu omi yaku kaliva fa'ina

kini be kabemani matadiya hinahegeliyemi be hinavedewayaugimi. <sup>13</sup> Au higa tova yamumuna be Iya fa'ikuya wana'awatalatalaina. <sup>14-15</sup> Kadu yami bonalaufata aimo kotu againe fa'ina keke wanavenuwanauna, fa'ina kotu againe wanamidi ana toveya gana'alavelevelemi kadu gananuwahuyavelemi be nibaimiyao agaidiya keke tamo hakwadi anafaiweya yami gahe ginamadubodani o ka'i ginavele'atuyewemi. <sup>16</sup> Ada tamamiyao hinamiyao o tobohiyamiyao o tubudelideli o ami kusebo nonogana tovehimeya agaidiya hinahegenauwemi, ada hinavehimeya be tufoimi hinaluve'alikami. <sup>17</sup> E, omi yaku kaliva fa'ina moya'aidi hinavenikohiyemi. <sup>18</sup> Atu u'umi keke tamo gina'agologolohi, au yamumumiyao wanamiyami. <sup>19</sup> Ada yami atuvefa'ila againe yawai-vagahimi wanunuhagana.

*Yelusalema ana lauyawela fa'ina gigaheye-vagahina.*

*Madiu 24:16-21 Maki 13:14-19*

<sup>20</sup> Tu tolugaviya adi yo'o moya'aina Yelusalema hinabodafifina-ma wana'itadi ana toveya, au wanahalamanena melalai-nadi ana lauyawela gilurveda'ufo. <sup>21</sup> Medema tovai-nadi omi Yudiya ana fafaliya wanamiyami-ma au oyeya wana'ota, kadu omi melala hinagene wanamiyami-ma melala wananyabuyabuna, ada omi wala'aiya wanamiyami-ma keke wanayewami melaleya. <sup>22</sup> Fa'ina hida aiyetai-dina agaidiya Yaubada miYuda ginavematahiwadiyemi be higa gavaimi Bana bonana eto'etoladina gigaheye-vagahini,

medema ginalakayemu velemo'ena. <sup>23</sup> Hoiyoi vevine wahifugadi kadu vevine natudiyao aimo hivehuvéhuhudi amanadi! Fa'ina medema tovai-nadi mulolova lakahina omi miYuda yami fafali againe ginalakayemu, ada Yaubada yana ila'a wananuhagana. <sup>24</sup> Nibaimiyao fetu againe tufoimi hinaluve'alikami, tufoimi hinakive'avimi be fafali tulina tulina agaidiya hinanauwemi. Ada yo'o tulidiyao Yelusalema hinavagatagona be hinanunauwena tu yo'o tulidiyao yadi abavehimeya ana tova Yaubada gisena-ma ginahavaina ana maka.

*Tohobu'ela yana yemuna-havagi fa'ina.*

*Madiu 24:29-36 Maki 13:24-33*

<sup>25</sup> Kadu'e iya'iyaya kauwana vaikohi ibadibadi agaidiya hinalakayemu. Babi againe yo'o tulina tulina ase'asedi gina'u'aulolo, lehaga mala yadi wainefa fa'ina nuwadi ginavegafu'uya'uya. <sup>26</sup> Kaliva yadi matauta fa'ina hina'enota'u, kodulele babiya ginalakayemu-ma fa'ina asekolukolu againe keke ma'ita hina'ilova. Hinamatauta fa'ina lobama ana gaitoma fifiwaladiyao adi iviya gina'atuliyeliyedi. <sup>27</sup> Hidedemi lobama ana loi hinahuluva tu Iya Tohobu'ela buhibuhi tabone gayewayewa'ela-ma hina'itaku. Yaku wafaiwala kadu yaku wamahalina ve'akinamanamalina gayewayewa'ela-ma hina'itaku. <sup>28</sup> Hida gaitomaidina hinavebutu hinalakayemu wanamididimo'a wanavedadaga, fa'ina ami tutuvehobu tova

kabi'ona wananuhagana.” Au hidedemi Yesu givenuwa'ata.

<sup>29</sup> Kadu Yesu badi agaidiya gigahetalahobuhobu gigayo, “Lalava kadu ai moya'aina adi dewa wananuwenuwena. <sup>30</sup> Ai hinatafa ma taumiyao nuwamiya wa'itahalamanena wagayo, Kauwana yana tova gilurvedaveda'ufo. <sup>31</sup> Meda anafaiweya mena aituhai-dina hinalakayemu ma wana'itadi againe, au wanahalamanena tova kabisona kaliva Yaubada yana itave'avina againe hinamiyami be ase'asediya ginavehivehimeya.

<sup>32</sup> Gagahe velema'ena hida tova ana yo'o keke moya'aidi hina'alika-'owoga tu nagona mena gaitomai-dina moya'aina hinalakayemu. <sup>33</sup> Lobama be babi ginayawowola tu bonaku keke ginayawowola, au ginaduva-vagata.

<sup>34</sup> Tu taumiyao wana'itave'avimi be higa abavemwamwala kwavakwavana kadu gufa laulaugina yana ivekwava kadu babi ana gaitoma ana venuwanauna keke nuwami ginavaini-yo yaku yewa'ela ana tova dai amine ginavefuta'ami. <sup>35</sup> Fa'ina tovai-nadi tomiyababi moya'aidi fafali tulina tulina agaidiya ginavefuta'adi. <sup>36</sup> Tova moya'aina wanavanevanenega kadu wanave'ove'o'ola be higa Yaubada ginafaiwalavelemi-yo mena vitai-dina hinalakayemu-ma agaidiya wana'atuvefa'ila, kadu Iya Tohobu'ela matakuya amifaiweya wanamidi.” Au hidedemi Yesu givenuwa'ata.

<sup>37</sup> Tu aiyeta sa'eyana sa'eyana agaidiya Yesu manuwa-tafalolo lakahina againe

givehavehawala, ada mala gibobogi gilolowoga ginana oya Olive ginunauda. <sup>38</sup> Ada kaliva moya'aidi manuwa-tafalolo againe hi'eno'enhobu be bonana hinanogalina.

## 22

*Yudasi Yesu nibaineyao agaidiya ginahawave-mogatalena.*

*Madiu 26:1-5,14-16 Maki 14:1-2,10-11 Yoni 11:45-54*

<sup>1</sup> Tu tafalolo ana egana lobama ana tovenuwa'ata yana Abamaduviyiya giludevaveda'ufo. Medema tovai-nadi beledi keke wa'isina hi'au'ana, fa'ina tafalolo-nadi ana egana velugana Beledi keke Wa'isina. <sup>2</sup> Ada badi abaveyao ana tofaisewa kikaiwabudiyao kadu Mosese yana vehimeya ana tovehawala eda hilelana be gavaimi Yesu hinaluve'alikani, tu yo'o himatausedi. <sup>3</sup> Hidemi hinuwanuwa tu Yudasi-Isikaliyota ase'asene Setani giluku, bana Yesu yana yo'o tuwelo kalivana. <sup>4</sup> Au gina abaveyao ana tofaisewa kikaiwabudiyao kadu tuilala adi tonagona buye hilulukahihi be gavaimi Yesu badi agaidiya ginahawavemogataleni. <sup>5</sup> Au badi nuwadi giyamumu ada higahe higa vaita mani hinavelana. <sup>6</sup> Ada bana gigayo, "Au yamumuna." Au gina tu tova yamumuna gilelana be badi agaidiya ginahawavemogatalena yo'o keke hinavaga'auta againe.

*Tomuliya Abamaduviyiya a'ana  
hikidewedewena.*

*Madiu 26:17-19 Maki 14:12-16*

<sup>7</sup> Himiyami tu tafalolo ana egana Beledi keke Wa'isina ana tova giyemu, medema tovai-nadi Abamaduviyiya ana sifi kabi'odiyao himunumunudi. <sup>8</sup> Au Yesu Fita be Yoni gi'iveninisedi gigahedi gigayo, “Wana Abamaduviyiya a'ana wakidewedeweni be buye kana'a.”

<sup>9</sup> Higahena higayo, “Ha'againu nuwanuwa anakidewedeweni?”

<sup>10</sup> Bana gigayo, “Wanogali! Melala againe ahe wanayemu-yo kaliva gufa watuwavina gi'avalana-ma ginamaduhagami. Au wanamuliyena be gava manawa againe ginaluku mededei buye wanaluku. <sup>11</sup> Au tonimanuwa wanagahena wanagayo, Tovehawala gigahe gigayo, Hadema vetawana Iya fa'ikuya uhawahegeni be Abamaduviyiya a'ana aku tomuliya buye ana'ani? <sup>12</sup> Ada vetawana lakahina manawa getane ivi ahe hi'iyaveyavela-ma ginavehawalemi. Mededei wanakidewadewa.”

<sup>13</sup> Au tomuliya adi'iselu hina ada Yesu gilukahi-hiyena amine hinuhagana. Au Abamaduviyiya a'ana hikidewedewena.

*Yesu ana tomuliya buye hi'a tu sakalamenti ana  
dewa*

*giseyemaunena.*

*Madiu 26:20-30 Maki 14:17-26 1 Kolinita 11:23-  
25*

<sup>14</sup> Tu au ana tova ahe gilakayemu againe, Yesu gi'enolukekela ada badi afositolo Bana buye

hi'enolukekela. <sup>15</sup> Ada gigahedi gigayo, “Iya nuwanuwaku lakahina hida Abamaduviyiya a'ana omi buye kana'ana. Nagona kana'a, muliya yaku tagiya ginalakayemu. <sup>16</sup> E, gagahemi Abamaduviyiya a'ana keke-mo'a kadu gana'a-havagileni tu tova mulina hida a'a ana nuwanuwa badi Yaubada yana yo'ogaga agaidiya hinaluku-ma nuwahnagediya ginalakayemu velemo'ena yo gana'ana.”

<sup>17</sup> Gigahe-yo au gowa givaina digo Yaubada againe givesiule gitunena gigayo, “Hida wavaini be agaimiya wanafolaka. <sup>18</sup> E, gagahemi aimo keke tamo oine ganayu-havagileni tu tova mulina Yaubada yana avemwamwala ana tova ginalakayemu, kadu oine ganayuna. Mena avemwamwalai-nadi badi yana yo'ogaga agaidiya hiluku-ma fa'idiya gisena.”

<sup>19</sup> Au a'a givaina digo givesiule gikihinena au ana tomuliya givedi gigayo, “Hida wowoku gahawahegena-ma omi fa'imiya. Hidede amine tova moy'a'ina wananuwa-nunauyeku.”

<sup>20</sup> Meda anafaiweya hi'a gihavaina gowa givaina gigayo, “Hida gowa dayagiku omi fa'imiya ginamadu be Yaubada yana veyao ivaguna omi agaimiya gisena-ma ana iya'iyaya. <sup>21</sup> Tu wa'ita, bana'e nibaikweyao agaidiya ginahawavemogataleku-ma, we'a buye atogaluga be a'a'au'a. <sup>22</sup> Au Iya Tohobu'ela gana'alika tuwai-mo'ena Yaubada givehimeya amine, tu hoiyoi bana kaliva nibaikweyao agaidiya ginahawavemogataleku amanadi! Bana'e vita lakahina ginanuhagana.” <sup>23</sup> Au hivebutu



hive'atolitoli higa vaita hakwadi badi agaidiya medede amine ginahuluva.

*Tomuliya kaiwabu hivekwageyena.*

<sup>24</sup> Kadu'e, ana tomuliya kaiwabu hivekwageyena ka'i hakwadi badi agaidiya kaiwabu againe wai ginago-mo'eni kaliva matadiya. <sup>25</sup> Ada Yesu gigahedi gigayo, “Yo'o tulidiyao adi tokikaiwabu yadi wa'agodadaga hi'ita'itave'avidu, kadu yadi tovehimeya taudiyao hivewagadi tonuwakabubu. <sup>26</sup> Tu omi'iyao ma keke medede amine wanahuluhuluva. Hai kaliva kikaiwabu-mo'ena, medema ginavekwana-we'owe'o. Kadu hai tonagona, medema tobohiyaneyao agaidiya ginave'agetoga. <sup>27</sup> Fa'ina hakwadi kikaiwabu-mo'ena? Ka'i bana'e givetoga be gi'au'a amanadi o ka'i bana'e give'agetoga amanadi? Au bana'e givetoga gi'au'a amanadi, tu Iya'eku agetoga amine hinafamiya gamimiyami. <sup>28</sup> Tu omi'iyao vita tulina tulina ganuhagana-ma agaidiya lilikuya wamidi be wavelugaku kalivai-mina. <sup>29</sup> Ada Kamaku abavehimeya giveleku amine, meda abavehimeya omi ganavelemi. <sup>30</sup> Tova mulina yaku wa'abavehimeya ganamiyami ana toveya, yaku tolameya wana'au'a wanayuyu kadu didiga'u'uya wanavetoga miIsileli ami yo'o tuwelo kalivai-dina wanavedewayaugidi.”

*Yesu Fita yana vekeke fa'ina gilukahihi.*

*Madiu 26:31-35 Maki 14:27-31 Yoni 13:36-38*

<sup>31</sup> Kadu gigayo, “Ho Saimoni, Saimoni! Setani give'o'ola be vehimeya givaina higa witi hisibutuna be yogo hinasevehailena amine, omi gaveyao yogo ma ginasibutumi. <sup>32</sup> Tu o fa'iniya gave'o'ola be ya vetumagana Yaubada againe keke ginahavaini. Ada aimo Iya agaikuya ahe unahagavila againe tobohiyamomo ase'asedi unakivevatuna.”

<sup>33</sup> Tu Fita gigahena gigayo, “Kauveya, iya gahawahegeku be O unaluku deliya kadu iya buye kanaluku. Ka'i O una'alika kadu iya buye kana'alika.”

<sup>34</sup> Yesu gigayo, “Fita o ganagahe. Tova adamoya kamukamu keke ginakwage tu nagona unamidi-vekekeyeku tohiye vaita keke udahalamaneku.”

<sup>35</sup> Hidemi gigahe, kadu moya'aidi gigahedi gigayo, “Boi melala tulina tulina agaidiya gal'iveninisemi be keke yami mani ana fose, keke yami vainuwana, keke ami ageyafayafa wana ana toveya, ka'i tamo gavadi againe wakali'uhō?” Au higayo, “Keke tamo gavadi.”

<sup>36</sup> Au Bana gigayo, “Tova adamoya hakwadi yana wamani, au gidavaina be gidanauwena, meda anafaiweya vainuwana. Kadu hakwadi yana fetō keke, au ana aikeva gidatunedamanena be yana fetō gidakimonena. <sup>37</sup> Fa'ina agaimiya ganagahe, gavaimi tuwai-mo'ena Veyao Tuwaina ana buki Iya fa'ikuya gigaheye-vagahina, anafaiweya medemi gidalakayemu vele-mo'ena gigayo, Hivaita bana'e tokoyona adi yo'o kalivana. E, gavaimi tuwai-mo'ena Aiseya Iya fa'ikuya gi'etoladina, medemi adamoya gilakalakayemu.”

<sup>38</sup> Yesu gigahe-yo badi higayo, “Kauveya u'ita, hide'i fetu luhei.” Bana gigayo, “Au adafata.”

*Yesu yana wavedivediwe Tamana againe give'o'ola.*

*Madiu 26:36-46 Maki 14:32-42*

<sup>39</sup> Tu Yesu Yelusalema gihegena be gina oya Olive againe yana huluva tova moya'aina amine. Ada ana tomuliya hivebwa'uliyena. <sup>40</sup> Ada ahe hiyemu-yo gigahedi gigayo, “Wanave'ove'o'ola be keke aladibidibi againe wanaluku.” <sup>41-42</sup> Au gina kabala ka'atugena ana lauva amine be tugana give'etodonena give'ove'o'ola gigayo, “Kamaku, ka'i ya nuwanuwa amine digo, hida aulolo ana gowa udavaihegena tu keke yaku nuwanuwa amine, au ya nuwanuwa amine unahuluva.”

<sup>43</sup> Hidede amine give'o'ola-yo lobama ana tovenuwa'ata sa'eyana giyemu gilemena. <sup>44</sup> Tu ase'asena gi'aulolove'ine fa'ina, yana ve'o'ola againe gifaiwala-mo'a au gihitana ana hitana vaita dayaga babiya gidahelohelolo amine.

<sup>45-46</sup> Ada give'o'ola gihavaina, gimidi ana tomuliya agaidiya giyewana, badi yadi wanuwavita fa'ina hidauda-ma gigahedi gigayo, “Gavana fa'ina wadadauda? Wamidi wanave'ove'o'ola be keke aladibidibi againe wanaluku.”

*Yesu nibaineyao hikive'avina.*

*Madiu 26:47-56 Maki 14:43-50 Yoni 18:2-11*

<sup>47</sup> Gigahegaheni yo'o hilakayemu, ada kaliva ana egana Yudasi ginagoyedi, bana Yesu yana

yo'o tuwelo kalivana. Au Yesu liline gi'ela be higa ginaveyaugina. <sup>48</sup> Tu Yesu gigahena gigayo, “Yudasi, ka'i hima veyauga againe Iya Tohobu'ela nibaikweyao agaidiya unahawavemogataleku?”

<sup>49</sup> Au Yesu ana tomuliya gavadi ginalakayemu ma hi'ita-yo higayo, “Kauveya, ka'i fetu againe kanamunudi?” <sup>50</sup> Ada tomuliya sa'eyana abaveyao ana tofaisewa adi tokaiwabu ana agetoga gilauna tagana wa'i'atagine giluyo'ena.

<sup>51</sup> Tu Yesu gigayo, “Auwe gimiya.” Au tagana gikivefosena be gisiveyawana.

<sup>52</sup> Ada abaveyao ana tofaisewa kikaiwabudiyao kadu tuilala kadu kaliva lakahidiyao hi'ela vaita hidakive'avina be hidanauwena-ma agaidiya Yesu gigahe gigayo, “Vaita Iya tomunugakai'afu amine yo wa'ela wafetomiyao wafulumamiyao.

<sup>53</sup> Tova tova manuwatafalolo againe omi buye kamiyami tu keke wadakive'aviku. Atu tova adamoya ma yami tova higa umalovana yana abavehimeya giyemu.”

*Fita Yesu givekekeyena.*

*Madiu 26:57-58,69-75 Maki 14:53-54,66-72 Yoni 18:15-18,25-27*

<sup>54</sup> Yesu gigahe-yo au hikive'avina be hinauwena abaveyao ana tofaisewa adi tokaiwabu yana manuweya. Bana Fita wai gimulina lauveya.

<sup>55</sup> Atu ahe hiyemu be manuwada'awana hinafane ai hikulina digo buye hihiyoto-ma againe, Fita gi'ela badi buye hihiyoto. <sup>56</sup> Gihiyoto tu agetoga kwamayoku sa'eyana ai mahaline Fita gi'itana, ada gi'itadonedonena gigayo,

“Hei! Hidema kalivai-nadi kadu Bana'e buye himiyami.”

<sup>57</sup> Tu gihawavekema gigayo, “Kwamayoku, Bana kalivai-nadi iya keke gadahalamaneni.”

<sup>58</sup> Himiyami tu kadu kaliva sa'eyana Fita gi'itana gigahe gigayo, “Kadu o'eni sa'eya agaidiya.” Fita gigayo, “Kaliva iya keke.”

<sup>59</sup> Bai sa'eyana himiyami tu kadu kaliva velugana gigahedona gigayo, “Au makewa hidema kalivai-nadi Bana'e buye himiyami, fa'ina bana kadu kwanaGalili!”

<sup>60</sup> Tu Fita gigayo, “Kaliva, gavaimi ugahegaha ma iya keke gadahalamane.” Ada auhe'ama aimo gigahegaheni kamukamu gikwage. <sup>61</sup> Ada Kaiwabu gihagavilana be Fita gi'itadonena. Au Fita Kaiwabu yana gahe nuwana gi'afolena gigahena gigayo, Kamukamu keke ginakwage tu nagona unamidivekekeyeku tohiye. <sup>62</sup> Ada gina yuwa kabu'avane gitagitagi agona lakahina.

*Yesu miYuda yadi Koniselo agaidiya hinawuena.*

*Madiu 26:57-68 Maki 14:53-65 Yoni 18:12-14,19-24*

<sup>63</sup> Tu badi kalivai-dina Yesu hikive'avina-ma hivebutu hihawahawavelaigena himunumununa. <sup>64</sup> Kadu matana kalekoya hisebodana au hitolilualuva higayo, “Hakwadi gimunumunuma mene u'ayauneni?” <sup>65</sup> Kadu wonakoyokoyo moya'aina againe hi'ihawadamanena.

<sup>66</sup> Tu mala gilauna abaveyao ana tofaisewa kikaiwabudiyao kadu Mosese yana vehimeya ana tovehawala higa miYuda yadi Koniselo

hivaga'auta, ada Yesu hinauwena yadi vaga'auta againe.

<sup>67</sup> Au higayo, “Ka'i makewa O Keliso Yaubada yana Tovegida, au agaimeya udahawavemogatala.”

Tu gigahedi gigayo, “Ka'i ganahawavemogatala, keke-mo'a wanavetumaganeku. <sup>68</sup> Kadu ka'i agaimiya ganatolilulvaluva, keke bonaku wanalaufata. <sup>69</sup> Tu tova adamoya Iya Tohobu'ela abavetoga kikaiwabuna Yaubada Tofaiwala-mo'a i'atagine ganahiyoto be ganamiyami.”

<sup>70</sup> Au moya'aidi hitoliyena higayo, “Ka'i O'eni Yaubada Natuna?” Ada gigahedi gigayo, “Wagahe amine Iya'eku.”

<sup>71</sup> Au higayo, “Kadu kaliva velugadiyao yana hawatagona Yaubada againe hinahawavemogatalena-ma keke kanalele. Au taudeyao Bana Tauna awane ahe kanogalina.”

## 23

*Yesu ana vedewayauga Failato matane.*

*Madiu 27:1-2,11-14 Maki 15:1-5 Yoni 18:28-40*

<sup>1</sup> Tu badi miYuda yadi Koniselo moya'aidi hitowamidi be Yesu Failato againe hinauwena.

<sup>2</sup> Ada hivebutu hihawavekoyoyena higayo, “Hidema kalivai-nadi anuhagana, Bana ime miYuda yama yo'o ginuwa'abiyedi be omi miLoma hinavekwageyemi. Gihawatama higa vaita Loma Tokaiwabu lakahina Sisa againe keke takesi anaseni. Kadu gigahe vaita Tauna

Yaubada yana Tovegida Keliso, higa vaita Bana'e tokaiwabu lakahina.”

<sup>3</sup> Au Failato gitoliyena gigayo, “Ka'i O'eni miYuda adi Tokaiwabu?” Yesu gigayo, “Au ugahe amine Iya'eku.”

<sup>4</sup> Tu Failato abaveyao ana tofaisewa kikaiwabudiyao be yo'oyo'o agaidiya gigahe gigayo, “Keke tamo koyona hida kalivai-nadi againe gadanuhagani.”

<sup>5</sup> Tu badi kaliva hikwagekwageye-mo'ena higaayo, “Yana vehawala againe yo'o nuwadi gisigadadalina. Galili againe givebutu tu ginawuena Yudiya ana fafali matatabuna agaidiya au gi'ela hidedei.”

*Yesu ana vedewayauga Helodi matane.*

<sup>6</sup> Tu Failato hidedemi ginogalina againe, gitolilualuva gigayo, “Ka'i hida kalivai-nadi kwanaGalili?” <sup>7</sup> Galili ma Helodi yana abavehimeya againe gidauda, ada ahe gihalamanena bana kwanaGalili au Helodi againe gi'iveninisena, medema tovai-nadi bana tauna Yelusalema againe gimiyami.

<sup>8</sup> Helodi Yesu gi'itana againe au nuwana giyamumu lakahina, lauva tunugina nuwanuwana gina'itana fa'ina. Yesu valeyana moya'aina ginogalina ada ginuwanuwa higa nimana ana iya'iyaya sa'eyana ginafaisewana be gina'itana. <sup>9</sup> Au tolilualuva moya'aina Yesu againe giyakahina, tu keke gidabonalaufata. <sup>10</sup> Abaveyao ana tofaisewa kikaiwabudiyao kadu Mosese yana vehimeya ana tovehawala

himidimidi, yadi wa'ago'uga hihawahawavekoyoyena. <sup>11</sup> Ada Helodi yana tolugaviya buye hihawave'iyoyohoyena kadu hihawavelaigena. Au vaigau yamumu-mo'ena hive'oseni-yo Failato againe giveyewana. <sup>12</sup> Ada medema aiyetainadi Helodi Failato buye hiveyao, tuwaina ma hive'avenivenibaina.

*Failato Yesu alika againe gihawahegena.*

*Madiu 27:15-26 Maki 15:6-15 Yoni 19:1-16*

<sup>13</sup> Tu Helodi Yesu Failato againe giveyewana tu Failato abaveyao ana tofaisewa kikaiwabudiyao be miYuda adi tonagona velugadiyao kadu yo'o buye gikovavaga'auhidi. <sup>14</sup> Au gigahedi gigayo, “Hidema kalivai-nadi iya agaikuya wahege'aliyena, vaita yo'oyo'o nuwadi gidasigadagadalinu tu wa'ita, matamiya gatoliloveluvena ma keke tamo vita yami hawavekoyo amine Bana againe gadanuhagani. <sup>15</sup> Meda anafaiweya Helodi yana koyona gilele-wayoge, au ime agaimeya giveyewana. Keke tamo gavadi koyona gidafaisewani tu gadamiyaluve'alikana. <sup>16</sup> Fa'ina ganavehimeya be tolugaviya bulava againe hinalauni-yo ganayauna.”

[ <sup>17</sup> Tu miLoma adi vehimeya sa'eyana ma tafalolo ana egana lobama ana tovenuwa'ata yana Abamaduviya againe yogoyogonina sa'eyana gidayauyauna be miYuda agaidiya gidawahawahegena.] <sup>18</sup> Au moya'aidi tamotamo'aine hikova higayo, “Wadema kalivai-nadi uluve'alikani tu Balaba uyau.”



19 Bana Balaba ma tobohiyaneyao buye Yelusalema againe hive'atalalakalaka be kaliva hiluve'alikadi, ada medema fa'ina Balaba deliya hisena.

20 Failato nuwanuwana Yesu ginayauna fa'ina yo'oyo'o gigahe-havagiledi. 21 Tu hihawahawaya'ala higayo, “Wanakivekelosena, wanakivekelosena.”

22 Au tova anaveto gigahedi gigayo, “A! Gavadi yana koyona? Keke tamo gadanuhagani tu gadamiyaluve'alikana. Au ganavehimeya be hinalauni-yo ganayauna.”

23 Tu higahegaheya'aya'ala agodi lakahina againe hikovakova higa vaita kelose againe gina'alika. Au yadi kovadona-luya'aya'ala againe Failato bonadi gi'abina. 24 Au gihawahegedi be yadi ve'o'ola amine givehimeya. 25 Kaliva vekwageya luve'alika fa'ina deliya hisena-ma giyauna, bana'e hive'o'olena kalivai-nadi, tu Yesu givetalaiyena be gavaimi hinuwanuwa amine hinahuluvina.

*Yesu kelose againe hitutuvefosena.*

*Madiu 27:32-43 Maki 15:21-32 Yoni 19:17-24*

26 Tu Yesu hinauwena. Hinauna tu kaliva sa'eyana, kwanaSailini ana egana Saimoni himaduhagana. Bana wala'aiya gitauya be Yelusalema againe ginauna. Au hikive'avina digo kelose hive'avalani tu higayo, “Ulau'avala be Yesu muline una.”

27 Ada yo'o lakahina hivebwa'uliyena, vevine buye'i. Ada badi vevine ase'asedi hi'atu'atutagona tu Yesu fa'ine hitag-itagi'awafatafata. 28 Yesu badi agaidiya

gihagavilana gigayo, “MiYelusalema vevine, keke Iya fa'ikuya wanatagiya. Au taumiyao fa'imiya wanatagi, kadu natumiyao fa'idiya wanatagi. <sup>29</sup> Wanogali! Aimo tova vitana ginayemu be wanagahe wanagayo, Badi kakalidiyao ma hagihagidiyao! Vevine keke hidavenatuna keke hidavehuvuhuhu-ma hagihagidiyao! <sup>30</sup> Au hinavebutu oya agaidiya hinagahe hinagayo, Ho oya, wadadobomi be wadavetalabodama. Kadu oya kabi'odi agaidiya hinagayo, Wadasevauyema. <sup>31</sup> Ka'i Iya vaita ai mahi'ina amine aku vita keke ma hidedemi hinahuluviku, aimo miYelusalema vaita ai bouna amine adi vita lakahina ma hinakivekoyo-mo'edi.”

<sup>32</sup> Kadu kaliva adi'iselu tokoyona-mo'a ma buye hinauwedi be hinaluve'alikadi. <sup>33</sup> Ada ahe oya ana egana Utouto againe hiyemu-yo Yesu hikivekelosena, kadu tokoyona-mo'a buye'i, sa'eyana wa'i'atagine, sa'eyana wa'i'imawane. <sup>34</sup> Ada Yesu gigahe gigayo, “Kamaku, yadi koyona keke unalaufata, badi hima fanifanidiyao.” Au kabala hihegelakahina be gava iya'iyaya higaheyena-ma ginalakayemu, medema kalivai-dina Yesu ana kaleko hinavaina.

<sup>35</sup> Ada yo'o himidimidi hilulauboda tu adi tonagona hihawaluvetonovena higayo, “Wa'ita, mali kaliva gikibababaledi. Ka'i bana velemona Keliso, Yaubada givegidena-ma digo, Tauna gidak-ibababalena!” Hidemi higaha.

<sup>36-37</sup> Kadu tolugaviya hihawahawavelaigena, hi'ela'ela vaita oine golagolana hidaveleni higayo, “Ka'i O'eni miYuda adi Tokaiwabu digo, Tauni unakibababale.”

38 Kadu Bana u'una getane hida hifufu hi'etoladina, “Hidevama miYuda adi Tokaiwabu.”

*Tokoyona luhei kelose againe Yesu buye hilukahihi.*

*Madiu 27:44 Maki 15:32 Yoni 19:18*

39 Tokoyona sa'eyana kelose againe hitutufefosena-ma, givebutu gihawaluvetonovena gigayo, “Vaita Yaubada yana Tovegida O'eni. Au Tauni unakibababale, kadu ama'iselu buye'i!”

40 Tu bana velugana tobohiyana gidakeyena gigayo, “Ka'i keke Yaubada udamatauseni? Moya'aida kelose againe kanagilagi. 41 Ada'iselu ma yada dewa ana vita kawahiwahina tu hidema kalivai-nadi keke tamo gavadi koyona gidagani.”

42 Au Yesu againe gigahe gigayo, “Ho Yesu, tovai-nadi ya wakikaiwabu unayemu, udanuwanunauyeku.”

43 Yesu gigayo, “Gagahe velemo'ena againiya, adamoya o'eni Iya buye Yaubada yana abamiyami Faladaisi againe kanamiyami.”

*Yesu gi'alika.*

*Madiu 27:45-56 Maki 15:33-41 Yoni 19:28-30*

44 Ada au kauwana getadiya gilaka tu umalovana babi moya'aina gi'uyuyubodena be ginauwena mala gilavina bai tohiye amine, kauwana gikibodana fa'ina. 45 Ada manuwa- tafalolo vetawana-tabu ana abaseboda kaleko gi'ahailugana be higa vaita abaluku Yaubada againe gi'ayauna. 46 Au Yesu gikova'awafatafata

gigayo, “Kamaku, alu'aluwaku nimaniya ganasena.” Gigahe-yo yawaina gihavaina.

<sup>47</sup> Tu togiyomatana gavadi gilakayemu-ma gi'itana againe, givebutu Yaubada gihawadavadavana gigayo, “Wona velemona hidema kalivai-nadi yegayegana.” <sup>48</sup> Kadu yo'oyo'o moya'aidi medede againe matawabuwabu fa'ina hivaga'auta-ma huluvai-nadi hi'itana againe, hiyewayewadi ase'asedi hi'atu'atutagona. <sup>49</sup> Ada Yesu tobohiyaneyao moya'aidi kadu vevine Galili againe hitauya be hivebwa'uliyena-ma, himidilauva gaitomai-dina hilakayemu-ma hi'itadi.

*Kaliva Yesu tomohuyehuyeya hihuyana.*

*Madiu 27:57-61 Maki 15:42-47 Yoni 19:38-42*

<sup>50</sup> Tu kaliva sa'eyana ana egana Yosefa gimiyami kwanaAlimadiya, medema Yudiya melalina. Ada bana miYuda yadi Koniselo kalivana tu bana kaliva hagihagina yana dewa tunutunugina. <sup>51</sup> Tu Koniselo yadi vevai be yadi dewa Yesu yana alika fa'ina keke gidavenogaleni. Au Yaubada yana Tovegida Tauna yana ela fa'ina gibodaboda. <sup>52</sup> Bana kalivai-nadi gina Failato againe Yesu wowona give'o'olena. <sup>53</sup> Au gikakilina digo kaleko kwayakwayana againe gifafana au tomohuyahuya boi kuga hinagene hiyalana-ma againe gisena, medede againe keke tamo to'alika boi hidaseni. <sup>54</sup> Tafalolo ana abakidewadewa ana aiyeta gihavahavaina tu sabati kabisona ginavebutu.

<sup>55</sup> Au Yosefa Yesu wowona gihuyana againe vevine hivebwa'uliyena, badi boi Galili againe Yesu buye hitauya. Tomohuyahuya hi'itana kadu gavaiya'amine Yesu wowona gisena-ma hi'itana. <sup>56</sup> Hi'ita-yo au hiywewadi manuweya, vanedimodimo bunama buye hikidewedewena. Tu sabati againe hiveyawai, Yaubada yana ve-himeya amine.

## 24

*Yesu gimididi-havagi.*

*Madiu 28:1-10 Maki 16:1-8 Yoni 20:1-10*

<sup>1</sup> Tu sabati higa Satadei hihege tu tafaloloya mala giwedala vevine vanedimodimo hi'ihagihagiyena-ma hivaina be hina tomohuyehuyeya. <sup>2</sup> Hiyemu-yo kabala tomohuyehuyeya tamo hakwadi ahe give'awawana-ma hi'itana. <sup>3</sup> Tu hiluku againe Kaiwabu Yesu wowona hi'i'avana. <sup>4</sup> Ada mema nuwadi givevegafo'uya'uya tu kaliva adi'iseli gilufuneunedi lilidiya himidi, adi vaigau ve'akinamanamalidi. <sup>5</sup> Au vevine himatauta be babiya hi'ibo'ula-mo'a tu kaliva higahedi higayo, “Gavana fa'ina yawayawana waleleleni to'alika yadi abageya? <sup>6</sup> Bana'e keke hidedei gidamiyami, au gimididi-havagi. Yana gahe agaimiya boi Galili againe aimo gimiyami tu gigahemi, medema nuwami ginanunauyena. <sup>7</sup> Gigayo, Iya Tohobu'ela kaliva koyodiyao nimadiya hinahegenauweku ada kelose againe hinatutuvefoseku, ada aiyeta anaveto ganamididi-havagi. Hidedemi gigahemi.” <sup>8</sup> Au yana gahe againe vevine nuwadi ginauna.

<sup>9</sup> Ada tomohuyehuyeya hitauya be hiyewadi melaleya, hida gaitoma moya'aina tomuliya ileveni kadu kaliva velugadiyao moya'aidi agaidiya hilukahiyena. <sup>10</sup> Vevine ma Meli vineMagidala, Yowana, Meli Yemesa hinana kadu mali vevine hibwa'ulidi-ma gaitoma hidevama afositolo agaidiya hilukahiyena. <sup>11</sup> Tu afositolo hivaita badi vevine hidagahe-kawowo fa'ina yadi gahe keke hidavetumaganeni. <sup>12</sup> Atu Fita gitowamidi be gimadu tomohuyehuyeya. Giyemu-yo gi'ibo'ula be gilukenala againe, to'alika yana lifigaga gi'itana. Au ginauna manuweya tu nuwana givevegafo'uya'uya gaitomai-nadi ahe giyemu-ma fa'ina.

*Yesu Emeusa ana edeya gilakayemu.*

*Maki 16:12-13*

<sup>13</sup> Tu medema aiyetai-nadi tomuliya luhei agaidiya melala ana egana Emeusa hinauna, Yelusalema ana lauva kilomita ileveni. <sup>14</sup> Ada hida gaitoma moya'aina ahe gilakayemu-ma fa'ina buye hilukahihi. <sup>15</sup> Buye hilulukahihi hiveve'atolitoli tu Yesu Tauna lilidiya giyemu be buye hinauna. <sup>16</sup> Tu matadi giluhowahowa be hifaniyena. <sup>17</sup> Ada gigahedi gigayo, “Medema gavaimi waveve'agahegahe tu wananauna?” Au walumagiboudiyao himidi-vagata.

<sup>18</sup> Kaliva sa'eyana ana egana Kaliyofasi gigahena gigayo, “O'eni, wakawaka Yelusalema againe umimiyami tu gaitomai-dina tova hidevama hiyemu-ma ka'i O akaibe keke udahalamenedi?”

19 Bana gigayo, “Gava gaitoma!”

Badi higayo, “Yesu kwanaNasaledi fa'ine, Bana'e ma Yaubada bonana ana to'awatalatalaina, gugai be gahe againe gifaiwala Yaubada matane kadu kaliva moya'aima matameya. 20 Kadu abaveyao ana tofaisewa kikaiwabudiyao kadu ama tonagona badi miLoma agaidiya hihegenauwena be alika againe hinahegena, ada au hikivekelosena. 21 Tu ime anuwave'avina vaita Bana'e miIsileli nibaideyao agaidiya ginakibababaleda. Kadu'e Yesu a gi'alika tu aiyeta tohiye ahe kahegedi. 22-23 Ada vevine tufoidi yama yo'o agaidiya yadi gahe againe ase'asema gi'alililihiwana. Badi hi'enohobu be hina tomohuyehuyeya tu wowona hi'i'avana au hi'ela higayo, Lobama ana tovenuwa'ata a'itadi, badi higahema Yesu yawayawana gimimiyami. 24 Kadu tufoidi ime buye amiyami-ma hilowoga be hina. Ada vevine higaheyena amine hi'itana tu Bana'e keke hida'itani.”

25 Hidedemi kaliva higahe-yo Yesu gigahedi gigayo, “Kwavakwavamiyao! Yaubada bonana ana to'awatalatalaina yadi gahe moya'aina Veyao Tuwaina ana buki againe gidadauda-ma ase'asemi givenogale-'abobowena. 26 Keliso Yaubada yana Tovegida ana vehimeya ma aulolo kaliva nimadiya ginanuhagana, ada muliya yana wakikaiwabu ginamiyami. Mena to'awatalatalaina yadi gahe ma'i wanuwenuwena o ka'i keke?” 27 Ada Yesu givebutu gahe moya'aina Tauna fa'ine Veyao Tuwaina ana bukiya gidadauda-ma gahe-nadi fa'ina gikivetuvetunudi. Givebutu Mosese

yana buki agaidiya kadu Yaubada bonana ana to'awatalatalaina yadi etoladi agaidiya be ginunauwena buki moya'aina giluyabuna.

<sup>28</sup> Tu melala againe hinauna-ma liline hiyemu-yo Yesu gihuluva vaita ginanulovedi. <sup>29</sup> Tu yadi gaheya hisiveyewana higayo, “Mala a gilavina kabi'ona ginabogi fa'ina au buye kanamiyami.” Au giluku buye himiyami. <sup>30</sup> Ada hi'enolukekela hi'au'a tu Yesu a'a givaina digo Yaubada againe givesiule gikihinena ada giveledi. <sup>31</sup> Au matadi gimahalina be hihalamane-mo'ena, auhe'ama gil'uamuedamana. <sup>32</sup> Ada buye hive'agahegahe higayo, “Wona velemo'ena ada ayauna giyamuyamumu edeya kanauna tu Bana ide buye kalulukahihi be Yaubada bonana fa'ina gikivetuve-tunuda.”

<sup>33-34</sup> Auhe'ama adi'iselu hitowamidi Yelusalema againe hiyewadi, yo'o ileveni hinuhagadi kaliva velugadiyao buye hivaga'auta higahegahe higayo, “Makewa Kaiwabu ahe gimididi-havagi ada Saimoni againe gilakayemu.” <sup>35</sup> Au kaliva adi'iselu gaitoma edeya gilakayemu-ma hilukahihiyena, kadu higayo, “A'a gikihinena againe ahalamarena.”

*Yelusalema againe Yesu ana tomuliya agaidiya gilakayemu.*

*Madiu 28:16-20 Maki 16:14-18 Yoni 20:19-23 Afositolo 1:6-8*

<sup>36</sup> Aimo hilulukahihi tu Yesu Tauna gil'afuneunena hinafadiya gimidi gigahedi gigayo, “Ase'asemi gina'ilova.”



<sup>37</sup> Tu ase'asedi gi'akolukoluna ada himatautave'ine, hivaita balauma hida'ita'itani. <sup>38</sup> Tu Yesu gigahedi gigayo, “Gavadi-yo wa'ase'u'aulolo? Gavana fa'ina ase'ase'emi gi'amalakibo?” <sup>39</sup> Nimaku ageku wana'itana. Hima Iya Tauku. Wanakidadaniku be wana'itaku. Balauma keke wawowona keke waluluna tu we'a wawowoku waluluku.”

<sup>40</sup> Gigahe-yo nimana agena givehawaledi. <sup>41</sup> Tu badi hivemwamwala lakahina kadu nuwadi giyaulowoga fa'ina, aimo keke hidavetumagane-mo'eni tu Yesu gigahedi gigayo, “Ka'i mene tamo a'a?” <sup>42-43</sup> Au igana kabukabunina hivelena ada givaina be matadiya gi'ana.

*Yesu nuwadi gikiyauyauga be Yaubada bonana hihalamanena.*

*Afositolo 1:2-5*

<sup>44</sup> Ada gigahedi gigayo, “Boi aimo buye kamiyami tu gavenuwa'atami-ma hidede amine. Gilubodana be gavadi moya'aina boi tuwai-mo'ena Iya fa'ikuya Veyao Tuwaina ana bukiya hi'etoladina, medema gidalakayemu velemo'ena. Gahe-nadi Mosese yana buki-vehimeya againe gi'etoladina, kadu Yaubada bonana ana to'awatalatalaina hi'etoladina, kadu Yaubada yana kaliva Same againe hi'etoladina.”

<sup>45</sup> Au Yesu nuwadi gikiyauyauga be Yaubada bonana ana nuwanuwa hinahalamanena. <sup>46</sup> Ada gigahedi gigayo, “Hidede amine hi'etoladi higa Iya Keliso ganatagi tu aiyeta anaveto againe alikeya ganamididi-havagi. <sup>47</sup> Kadu yaku kaliva nuwavilana be koyona ana aba'aiyawela aku eganeya hinalulumamalena. Hinavebutu

Yelusalema againe hina'avalalakahina be hinanunauwena fafali moya'aina agaidiya. <sup>48</sup> Gaitoma hidevama ana tohawavemogatala omi'iyao. <sup>49</sup> Ada wanogali! Abahawahega Kamaku giwonadabedabemi-ma gana'iveninisena higa Alu'aluwa Mahalina, tu hidei melaleya wanabodaboda tu lobama yana faiwala againe ginave'osemi.”

*Yesu gilaka lobameya.*

*Maki 16:19-20 Afositolo 1:9-11*

<sup>50</sup> Tu Yelusalema hitauya be Bedani tufone givega'auledi, ada nimana gikilakahina be giga-henuwakabubuyedi. <sup>51</sup> Gigahegaheyeni Yaubada lobameya gisilakahina be ginuyabuyabudi. <sup>52</sup> Au hihawadavadavana be yadi wavemwamwala Yelusalema againe hiyewadi. <sup>53</sup> Ada tova moya'aina manuwa-tafalolo againe himiyami be Yaubada hihawadavadavana.

(Yesu kahihina iya Luke ga'etoladina-ma au hidede amine.)

**Yaubada Bonana Veyao Ivaguna Bona  
Iduna  
The New Testament in the Iduna Language of Papua  
New Guinea  
Nupela Testamen long tokples Iduna long Niugini**

copyright © 1983, 2003 Wycliffe Bible Translators, Inc.

Language: Iduna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 11 Nov 2022 from source files dated 22 Nov 2019

73458371-ad55-5c77-8b6b-5eca8d58f667